

奚囊蠹餘詩序

元洲張公殖學邃中敷華林實悠然自得之意時形於詩篇什既衍日星斯爛即所韞奚囊蠹餘若有觀其深云初予之釋褐也聞公在秋冬二曹即咸以文學飭吏治而庶績興焉已而出守廬江補大名中正泣民去後



見思至為立祠蓋得公於政事間矣
繼遷藩臬番鎮關陝委蛇棘寺經理
漕河居貞履順始終以之境有變遷
而處之如一蓋得公於行誼間矣道
成而隆望積而章簡在

帝心節鉞斯授威稜瞻乎二粵元元之
民罔不胥匡以生蓋得公於德業間

矣聞公之風仰其盛而未接其儀刑
邇以被

命南來幸得謁公大叅莊石坡君復教
以公詩而屬予序之予俯而讀仰而
思諷詠竟月若有得公之為心者語
曰詩可以觀若是者非耶今夫情本
乎中理非自外代而有作其誰曰不

然竊謂風雅未興之前未嘗無詩世
不以詩而名也風雅既亡之後未嘗
無詩詩不以世而晦也天地之道運
而為元化散而為元聲其在於人也
感物而動不得已而為言苟有見乎
吾之為詩也即吾之為言也則元聲
無盡藏而詩之道昭焉矣以是而論

公所造述其大較不可睹耶蓋公博
稽群典統宗六籍取裁上世叅訂近
體而會之吾心故恬適足以發性靈
酬贈足以昭嘉淑登臨足以舒襟度
題詠足以暢物情出乎筆墨蹊徑之
外而裒然成一家言豈不躋哉明月
之珠夜光之璧海內咸願見焉而公

之自序且歆內之囊中是豈得而終
閉也哉行當以偉烈夙望晉而晝接
於

朝則夫倡陳詩之義以鳴

國家之盛其不在茲乎以是知清風之
誦不特見於周廷太和之音益並顯
於

昭代者矣

隆慶戊辰季秋上澣之吉

賜進士出身

南京工部尚書柳州治生徐養正頓
首拜撰



刻元洲先生雜文序

今海內名公卿德業文章予知有古
杭元洲張公久矣頃者公以少司馬
兼中丞開府蒼梧兼節制兩廣諸軍
事而祐以職事承下風叅諮謀厥亦
幸哉歲戊辰冬祐至蒼梧獲睹公奏
疏及諸吟咏各一冊伏而讀之忠嘉

之猷大雅之什燦乎章矣顧論議敘述紀載諸體闕焉獨不備祐乃奏記公曰夫文猶樂也樂有一音不備不足爲大成惟明公其終教之公自案牘間揭以示焉則近所製沖霄山記吳文惠公集序也祐拜手曰高山仰之景行嚮之殆謂是乎明日祐復進

曰夫管窺者未睹衆星之麗天飲河者不識分量之易足願明公盡以所論著者惠多士公遜謝曰予平生隨事酬應具有述顧散失者多矣夫文中亦奚必富篇什哉勿已則存諸篋中猶十之一二其惟是耶祐受而卒讀焉則嘆曰婉而章近而遠廣博而有

則泯泯乎文哉竊惟公之生也光嶽
氣淳且當

中興之運際

聖作之期故其文渾成而不雜壘達而
有條其學以聖賢爲本故其文出入
六經而不詭于道平生樹氣節履清
脩不苟徇流俗故其文穆然凝然矩

矱森嚴雖善詆者無所投其間性樂
善所交遊盡海內名士故其文如美
玉然更琢磨而愈益溫潤識之者皆
以爲瑚璉之器性靈洞徹神思舒閑
絕不以世之毀譽利害動其心故其
文沛乎其順浩乎其不可禦不觀諸
水乎其源涓涓而大不可極其出洋

洋而深不可測微而不可得托握也
漸進而不可止息也與萬物資生與
天地鴻洞而不自為德也夫水所以
能成至文於天下者以其順無累也
公嘗作文每出好事者快先得之寸
楮片詞悉為時所珍視而公歆然不
自以為多傳曰江海所以異百瀆者

以其能大受也其公之謂乎雖然善
知公者真不特詞章間爾也夫文非
組織之為工而用世之為貴公起進
士為郎歷官藩臬臺省卿貳凡所經
緯百度而潤飾治道者孰非文哉行
且佐贊

天子明堂禮樂之治以化成邦國天下

文章孰大于是既踰月集成蒼梧郡
陸守一鵬以公奏疏及諸吟咏俱有
序今是不可無一言也祐曰然祐之
欲附驥久矣竊感王褒四子講德之
義綴一言於末簡可也
隆慶三年正月吉日廣西布政使司
右叅政昌江曹天祐頓首謹序

奚囊蟲餘

余奔走四方三十餘年每以一囊自隨凡
得簡札詩帖及所裁荅漫興諸草亂內其
間積久蟲蝕殘缺不可檢閱梧鎮兵戎之
間命童子認余手筆取字畫稍全章句可
讀者錄出成帙賦才本拙向爲俗吏豈能
脩詞發藻希爾雅溫厚之旨望風人堂奧
之末哉感於物發於聲出諸性情不爲湊
釘掇拾襲故牘以飾鄙陋譬之貧窶之士

布衣常帶甕牖繩樞使人望而知其處約
則固寒士面目四體無恙若假富勢冠裳
甲第泰然示人以盈不知者亦必疑於心
知之者將其掩其口彼其人宜何如愧且
赧邪吾知免夫閱既適爾掩卷題曰奚囊
蠹餘仍令內諸囊中時

隆慶戊辰夏六月望虎林張瀚識

奚囊蠹餘目錄

卷之一

賦

平山賦

上達樓賦

庭栢賦

正士不遇賦

卷四言古詩

自慙詩

懷舊五首

卷之二

五言古詩

雜詩十首

渡江望金焦山

初夏入濟

七月十五夜泛湖楊丹泉同賦

贈別

與張子談玄

賦雲樹圖

酬鄧元學

泛湖風雨

次韻答陳玉泉

夏日雨霽過韋氏山庄得雨字

將往廬陽別省中諸同志

夏日鎮淮樓登眺和劉侍御作

沈生桂林生瓊楊生郇王生教以應試

行各贈四韻壯其志云

宵征

靈雪篇

淮揚道中

歸鶴篇

舟中紀夢

懷高光州

貞女篇

入天台境

尋源覽勝贈錢尹

濟川贈吳子

題月桂美人圖

宿天姥山房

送陳倅巡山順德

贈李會泉封君還蜀

古曠別業

卷之三

五言古詩

西嶽宋侍御同遊

自華山趨蒲城值雨停車待霽乃發
浴溫泉

卷之十 關中十首

公署對雪

秋日關城登眺客有談王官龍門之勝
者漫賦見意

酬王廷尉元案

寄和野翁睢州阻雨

悼亡四首

冬日西行偶述

贈傅右使近山

贈督府公

初冬江閣觀湖以到江吳地盡隔岸越
山多分韻余得地山二字

題秋江獨釣圖

荆門道中避雨觀音巖下

與奚憲使學山話舊

自江津放船渝州投治平寺

五丁峽

寓兵康國詩

再入潼關

三月二日東園讌集

上巳景隆池讌集

省中會餞雷參伯以別後相思復何益

分韻余得相字

折楊柳

日晚署中言懷

送孟省長入賀 萬壽

飲何中丞荷亭分得夏荷二字

同藩臬諸公登終南普明寺

送孫學使轉官入蜀

公署登樓述懷

食秀亭

卷之四

七言古詩

結交行

石梁篇

送白德純之廣平

馬右使索題紅梅圖

送晏東之還廬陽

夢椿贈王尹汝和

柳亭歌贈葉中翰

題畫壽沈光祿

天雄陳倅話別

仙姝行壽唐母

萬壽

中秋李節推官舍對月時唐丞防秋易

州李倅捧表入

賀朱倅擁兵邯鄲

余子櫟還浙大比慨然有懷各賦月

字

雪夜柬王葛墩

贈別陳友琴

闔草圖

江淮道中

漕河水

吳東山金餘
目錄
七月既望省長朱鳴霄讌集王氏第即
席賦此

乙巳夏六月苦旱禱祠良久一夕獲大
雨喜而有述

蒲石

明言

暗言

登金山

瓜洲行

春鶯歌戲東清七弟

春歸詞

驪山溫泉

種竹

關中送孔左使之河南

聞文甫轉官馳報

江南行

出京贈陶使君

送靳左使奏績

贈田憲使夢鶴

卷之五

五言律詩

入京早朝

早春慈恩寺同年會宴座主值雪

早春柬白石

聖駕謁陵還宮

南樓

和王舍人初寒秉燭集

送高穎湖還武林

送王廷尉元案

送友北上

登雨花臺

中秋前夕泛月次省長周陽山韻

龍江泛舟投弘濟寺

宿曹濮陽官舍

秋野

送艾居麓北上

目錄
八
聞歌

有所思

龍江發舟將入楚

卧病

遊靈隱山次近山韻

九月梅花次東川韻

日暮山行

題綠崖贈沈生

和康礪峰泛西湖晚登萬松山

碧溪

宿湖上

保所山登眺得峰字

晚登松臺

落星石

京師送呂梅東之金陵

春日南郊分得郊字

春日過姚令園

晚春真覺寺集

送友歸杭

題竹山

挽錢母

從軍曲

月湖

省中白雲樓晚眺次陳玉泉韻

甲辰除夜

公庭對雪

登較弩臺次郭郡丞韻

迎春次桐岡韻

送晏五秀才澄之

半陽池

過萬家山訪王喬洞

巢縣道中

鳳陽恭謁 皇陵

途逢立秋

小憩香積寺

舒城遇雨

石梁渡泛舟

暮宿都管塘

壽春謝公祠

珍珠泉

題扇

挽葉南湖

張會稽邀飲星宿閣

玉泉亭上次壁間韻

明妃詞

題畫

吳門周臣作溪亭春曉圖景致幽曠筆

法妍潤展玩殊愛之漫賦一律書盛

子扇頭圖

野閒隱居

湛泉贈詹廣文

偕孫文揆訪沈紹興

訪沈紹興不遇

過萬年寺值雨

水簾洞

過德純官舍

贈石梁琬上人

新昌道中

容閒閣爲楊道甫作

靈萱晚秀圖

方塘圖贈虞士賢

卷之六

五言律詩

送高光州南歸

行縣十首用楊侍御韻

李于翔追送清源

函谷道中

老子故宅

過許尚書墓

許中翰別業彭給舍同遊

自華山移蓮花小池中花開對酒漫賦

織女詞

琴鶴雙清

雲樹懸思

華陰行臺對月望西嶽作次宋侍御韻
和孫侍御臺端晚步次韻

風夕感懷

立春

智子學遠寄詩次韻奉答

賀孔右使誕子

登潼關山樓

守歲

元日

脩園會餞留別席上諸公得天字遊字

恩榮雙壽詩

贈富陽桂令

孤山林處士

途經謝憲使宅留款尋別時謝方轉官

二子登科適還

送王尉

巴東道中

夷陵渡江

玉泉寺

歲暮玉局觀隨諸寅長同遊

見梅

覺林寺

送闌帥王君入賀 萬壽

捧表行經棧道

善繪事者作釣臺西湖海潮鴈蕩四圖

皆吾鄉佳景往時孫侍御斗城嘗招
余入鴈山未赴閱之感懷各系短章
未致此意

武關懷古

草涼樓

扶風吟

高陵公署次壁上間韻

題陳醫士長春圃

寄槐亭

呂克厚哀挽

飲張中丞別業

贈趙州許判官

友泉

芋原別游許二省長次韻

宿延祚寺

重經華陰

野寺贈王生

偶過臬司學甫留酌

阜林別友

竹溪

金佛峽

問月亭

贈唐司訓赴廬陽

以詩代書謝四兄寄鏡時爲周府教授

次韻答沈鴻臚

田節婦

贈馬隱君

公署新荷

卷之七

五言排律

蟠龍洞

弘濟寺

鷺子磯

有懷王徵君元案

遊東山

登定州開元寺寶塔

張母挽詞

送張憲使之河南

送石右使之江西

哭亡兒

贈別舅氏野翁

送使臣出海封琉球國王

題畫梅贈友

梧鎮閣武

七言律詩

廷試即事

讀五倫書有述應制

日暮

新江閱戰艦次松谿韻

送蔣石庵司空

王廷尉擢少司徒贈別

省居

至日齋居次葛墩韻

登報恩寺塔偕梅東居麓午山

送周雙林

湖上偶成

登飛來峰

泛湖次韻

丹陽道中

句容道中

西行次潘生

玄真觀葛墩見過

送魏郡守致仕還山西

紫雲洞

送張順之司訓全椒

贈王少府守泗州

冬日玉泉席上鏤銀杏作蠟梅花分韻

得安字

一隅為張文憲作楚人也

壽顧母

天長道中次壁間韻

烏江謁霸王祠

贈吳蘇原

早春郊行東晏石橋僚友

暮春高井晚行

壘前韻答吳蘇原兼乞題卷

遊蜀山次聯泉韻

舟中感懷

晚投龍城寺

中秋值雨

高郵道中感懷

自盱眙山晚投火橋鎮

秋行懷郭桐岡

寄王上舍方泉時聞新誕子兼以為賀

卷之八

七言律詩

客瓜州江樓

登金山

次韻答王箕泉

移山潭次壁間韻

送程于民南還次來韻

白水公署次壁間韻

青柯坪

雲臺觀

次韻答彭孔加

九日河中書院讌集次宋侍御韻

萬固寺

華州值雪

冬日登華山

莎蘿坪

潼關閱武

歲暮述懷

玉陽山房

玉女潭次劉參伯韻

眉山贈孫醫士

壽慎軒叔

孫文揆同登越王臺

宜松

南明寺宋尹同遊

沈明府邀飲戒珠寺

秋夜子暘宅讌集得秋字

夜渡揚子江次汪生韻

蕙坡贈馬封君

九日邀仲良童侍御登演武臺次韻

九日偕僚友登上達樓作

孟憲使讌集紫陽山晚眺次韻

巨石園亭讌集次孟君韻

贈馮憲使晉叔入楚得餘字

贈殷醫士冠帶

赴丁徵君招次青門韻

丁孝芳宅讌集次沈隱君韻

送許叅伯赴京得遊字時予將入蜀

巴東見王叅伯題壁詩次韻寄懷

題像

表賀得與宴賞恭述

重經咸陽述懷

元日蜀府慶賀

訪張中丞里第賦贈

秋夕獲鹿公署書懷

聞義四兄分教松滋寄贈

何中丞荷亭次韻

固原道中

大佛寺

和許使相祈穀陪祀值雪

次韻答鄧元學

大梁別張憲使次韻

姑孰舟中

次韻寄謝周諫議

卷之九

五言絕句

剡溪曲

題畫

挽江處士

題畫

周墓六景為用之作

日暮

題畫

見歸鴈

植花

題畫

宮詞

題畫

田家嘆

題石橋石田

題畫

盛瑩八景為盛司徒作

題畫

卷之十

七言絕句

出塞十首

題畫

華山逢道者

和茗山途中歌江南柳詞戲成口號

題畫

雨夜

四時宮詞

九月梅花

朱家巷

漫興

兗州述懷

冬日東園讌集

宮詞

紀夢

讀史雜詠十四首

待玉泉不至辭以中酒次韻戲答

渡濠梁有感

題扇贈王生

題清河傅氏民居

過歌風臺

望盱眙縣

朝楊郡丞

盱眙道中

望真州

採蓮曲

途中苦雨憶弟

午日餽諸生食

渡錢塘江

王母蔣氏哀詞

挽莫處士

民言十首次巡臺楊君韻

徐邳道中

途中值雪

題林廣文卷

送萬碧峰還江右

行經萬縣

昭君村

屈原祠

野馬荒

題松竹梅

獲嘉贈潘令

歸思

贈紀生

題畫

卷之十一

序

贈竹川張先生序

贈沈少吳擢四川按察副使序

贈桐岡郭先生序

當陽簿謝君五十序

贈芹山陳先生序

壽外舅野亭翁六秩

同選錄後序

祝壽圖序

贈陳醫士序

刻野亭集序

贈閩帥東澣王君序

卷之十二

序

贈金雙虹二守序

刻引川心秘序

刻瞿存齋先生文集序

會泉雙壽序

吉郡丞十弟五秩序

陳小石改官順德序

贈王省齋致仕歸松江序

刻吳清惠公文集序

卷之十二

記

淝寧橋記

石橋記

重建白雲茅屋記

四賢祠記

魚異記

省吾記

出師禦敵圖記

太尉楊公墓碑記

重脩太平府知府端敏胡公祠堂記

沖霄山記

卷之十四

雜著

貞女傳

跋畢子石祿命卷

跋廣居交遊卷

列祖像讚并序

王處士像贊

錢通政見齋像贊

野亭馬公小像贊

曹隱君像贊

自箴

養愚軒箴并引

孟銘六首

卷之十五

墓志銘

江西南昌府通判野亭馬公墓志銘

朱近城墓志銘

陸靜泉墓志銘

顧玩川墓志銘

滑縣儒學教諭程君墓志銘

勅封孺人張氏墓志銘

鄭母吳氏墓志銘

卷之十六

墓志銘表

崔淑人李氏墓志銘

長姊鍾室張氏墓志銘

仲姊墓志銘

仲兄雙洲公墓志銘

明處士彬齋李君墓志銘

明文林郎廣西潯州府貴縣知縣半村

夏公墓志銘

明杭州前衛中所正千戶麓泉陳君墓

志銘

明贈徵仕郎中書舍人玉泉林公暨配

贈太儒人張氏合葬墓表

卷之十七

行狀行畧

從兄東川公行狀

成都知府邵公行狀

唐府典儀正柴淳齋行狀

高祖介然公行畧

太父質庵公行畧

先考亭山府君行畧

卷之十八

祭文

祭包孝肅公文

重瘞古塚文

祭長姊文

祭朱母文

祭魏令孫禹麓文

祭十二弟子德文

祭顧方伯六泉文

祭孫柳西文

祭劉安人文

祭張封君文

祭蔣僉憲環山文

祭周母文

祭李封君文

祭郭聚菴侍御文

祭方室王孺人文

祭郭封君文

祭朴齋李公文

祭封君靳公文

卷之十九

書

寄沈廷尉文

寄謝巡臺八景文

寄劉沂東侍御文

寄韓司馬苑洛

寄翁冶山郡伯

上內閣時事

寄張臨溪都臺

上督撫公

寄孫蜃川司寇

寄毛介川中丞

寄高南宇司成

寄許茗山右使

寄王鑑川憲使

寄陸五臺

卷之二十

書

上存翁閣老

寄冢宰嚴公

寄余午渠憲伯

寄郭一泉督府

寄楊朋石中丞

寄郭東野閣老

寄黃司寇葵峯公

寄孫侍御

寄黎樂溪叅伯

寄李麓南侍御

寄楊虞坡冢宰

上內閣諸公

奚囊蠹餘目錄終



奚囊蠹餘卷之一



賦

平山賦



覽群像於儀內兮獨神契乎茲山卑不可踰兮
高匪危而可攀若踰蹊以紆徐亦蜿蜒而迴還
比衡斯懸兮若几斯安靡軋沕之荒忽奚鬱嶮
之艱難頽闐闐于林麓仰穹窿於雲間既宣氣
以誕秀仍居靜而體閑伊際天兮昆侖砥滄海
兮蓬來戴巨鰲以柱蒼昊兮渺靈域乎仙臺信

濟漾以崔巍將目眩而神移夫焉藉以棲息徒
延佇於無涯誠不若茲山之夷曠兮且中天若
長陌彼坤何心兮衍爲丘陵唯仁能樂兮眷茲
窟宅爾其覆五色之大雲啓蘿關於紫石長舒
元亮之嘯徜徉靈運之屐鷗飛洞庭之酒柯爛
天台之奕飮神兮芝苓資身兮芋栗泉飛鳴兮
雜鳥弄而爲音雲卷舒兮吐巒岫以逞色夭桃
燦兮春熙井梧墜兮秋瑟彼四序何推遷歷千
齡猶一日不騫不崩匪徐匪疾鑒嗜險而蹈危
祗樂易以取逸因自然以見性托幽貞以北質
等萬感於均齊眇升沉於得失坦蕩蕩兮無偏
終優游乎道術

上達樓賦

伊隆崇之飛閣奠畿輔之坤隅仰蛟螭于雕甍
煥玄綠于層檻梗栝壯其弘麗班輸殫其巧思
眇龍攀其靡及肆絕趨而可踰試摳衣以循欄
爰奮足而躡梯啓八窻之玲瓏倚曲檻而躊蹰
左爲魏郡雄鎮王都右通佛國緝殿浮屠百雉

山峙於巍廓維億坻湧於豐庾群賢祠兮立準
青衿育兮下帷間槐榆兮比屋蕩垣堰兮陂池
爾其清衛帶淇黎而環繞濁漳入黃魏以洶涌
蝦蟇萌決兮直下飲牛滉漭兮流東太行萬壘
接亾浮之龍從高陽百里走白馬以鬱葱控宛
冀兮納宇內分三晉兮來域中眺北闕兮雲擁
焜日下兮雙龍俯南國兮櫛比靄烟際兮周墉
古顛頊之開建兮姬康叔之侯封歷廢興之靡
常兮紛創置之不同李唐魏博趙宋天雄金堤

橫兮流水銅臺迥兮秋風牛羊放牧兮殘壘禾
黍離披兮故宮爾其重扉晃朗四顧晶光摘星
辰于杳眇兮羅幻象于混茫隘六合之九州兮
小烏兔之騰翔却坐塵於晝永兮結陰森之夏
涼何地維之偏迥兮信天體之下降于時涼颺
乍起寒蟬倦鳴黃雲帶沙塵之色朔鴈雜胡茄
之聲心煩懣兮月滿氣懣恨兮潦清思深兮王
粲愁結兮張衡誕周宣之文教兮訝徽稅之內
侵戒九邊之烽燧兮徵六郡之民兵村農賣牛

以買劍學士投筆而請纓繫元元兮曷恃徒總
總兮未寧覺憂增於遠覽又神竦乎高登爾乃
憐然自釋浩然慨慷仰神禹之文德兮矧我武
之惟揚中甫兮神降於維嶽赳赳兮羆虎之騰
驤戢戈矛兮舞干羽走豺狼兮烹犬羊屈群策
之多奇兮恃一人之有慶苟安攘之有賴兮余
何爲乎遑遑迺舒懷於寥濶兮思超忽於八荒
眷羲節之靡留兮崦嵫迫兮斜陽申金蘭於三
益兮要歲寒以相將托燕賞以消散兮胥浮遊
以徜徉吹參差兮伐鼓按歛謳兮宮商莫宣情
于柔翰聊寄意於兕觥

庭柏賦有序

獨處關河再經寒暑庭前四柏砌畔重
陰退食之餘裴徊其下方春莫窺其生
色入夏何有於潔齊當暮收而不衰處
玄冥以如故似君子之一致順應不遷
協老氏之三全攝生尤要觸物有悟寓
意於詞

偉閒庭之四象稟勁氣於五行敷雲葉以翳翳
挺霜幹而錚錚俯而就之團欒兮飛蓋之影墜
仰而望之龍從兮遠山之黛橫實垂垂兮孕秀
華飄飄兮暗馨厭的爍之闔彩守安靜以儲精
未與宮閭之守兮秩秩聊遠斧斤之伐兮丁丁
遷彼大谷賓我前楹選千樹於泰岳配二株於
華林採摘兮效文賓之辟穀游息兮希赤頰之
全真諒列仙非我徒願比德以淑身爾其青陽
肇歲艷日鮮雲條風旣達膏雨載零芬紅芳紫

嫩綠柔青此方蒼蒼刺刺離離落落爭似龍池
之柳離宮之柞已而金氣旣騰商飈初過原隰
蕭條歲聿其莫冰柯雪卉風偃霜墮迺其矯矯
穹穹鬱鬱恣恣何言蓬山之籀天陵之松辨修
短於異歲兮齊寒燠而同姿眇百感以無累兮
越千祀而爲期噉杲杲兮翔林鳥夜皎皎兮挂
驪珠撓颼颼兮激蒼龍之噴吼潤靈霖兮降翠
鳳之葳蕤被巖穴兮亭亭自足登廊廟兮蹇蹇
有餘不茹不吐匪䟽匪腴抗天德以肅肅順坤

載而于于允矣百木之長卓哉大壯之需爾迺
睇盼昕夕徙倚躊躇媿樸檉兮峭直又樗櫟兮
迂愚思致用之非才竊感物而起予繫炎景之
易邁慨秋風之旋移苟根柢之未固何枝葉之
紛披試觀化於歲晚表榮瘁於桑榆托栽培以
滋息幸貞心之未殊若夫曩倩譚浪於鵲立方
儲孝感乎鸞樓西嶽行成行之仙路昭陵然勝
妖之古株本乎好事之傳異何關節槩之有無

士不遇賦

昔衡門之高蹈悵明盛之不逢踰垣迫以終匿
閉戶聞其靡通髡首狂歌於衰鳳羸程混跡乎
夷戎箕山潁水藉枕嗽以恬漠采薇茹秀並偃
蹇以恢閔摠遺世以耽寂匪道大而莫容若迺
鬲俎干商熊羆釣渭牛角商聲羊皮眇說湖城
之三鱸不登臨邛之駟馬未遂雖小畜而大亨
終乘機以遘會方豹隱龍屈乍失勢而憂違已
颺舉雲蒸率羽翔與鱗沛曾憤懣之幾何紛崢
嶸以滲漉豈若洙泗之徒游夏之侶耻自比兮

仲嬰竊夢寐兮臯禹既際世兮虞唐亦致身兮
青紫秣怵惕兮凌兢每紛輪兮鉏鋸塊扈蕙以
紉蘭兮等芬芳於猶薰更駕騏以驟驥兮厭鴛
鈇之伶仃豨膏棘軸兮運方穿以砰磕紈素鮮
潔兮值秋風之淒清挾墳典之策兮躑躅羸秦
之肆工雲和之瑟兮於邑齊王之庭方茂齡志
濶達兮薄驕揚不可任逮垂晚習愿謹兮憎媠
謾無脩能淬太阿以操百練兮使割雞於武城
飾俎豆以脩五禮兮庸克詰乎戎兵廣出塞胡

弗獲兮唐易邁而無成均內美招叢嫉兮詎達
體而見傾前曳後掣進尺退咫方藉譽聞忽罹
訕訾窮智殫力比於嵒窳瑰瑋卓犖命之譎異
馬牛任其呼嘲涇渭無分渾泚何周流以盤桓
恒敞罔以謬戾傷鳥驚棲莫知所止神龍泥塗
畏彼穴螿已焉哉不見知以無悶君子之貞也
不肯世以滅勲人臣之經也砥節礪行匪獵榮
也據德游藝耻自鳴也疾尼如虎無加于聖妒
夷爲跡不減于清也敦素履兮自適樂天命兮

奚疑眇富貴兮非願俟功烈兮何期寧循繩兮
守墨堅夙志兮桑榆豈蒼蒼兮昭明竟遺鑒兮
惘愚

四言古詩

自慙詩有序

余生眇小性復迂踈非高爵重錄之器
命既蹇薄又嗜恬淡無輕裘肥馬之需
四任散郎服役已越九年兩典鉅郡薦
章奚啻十上始叨司憲遞轉叅藩何意

招釁秦關竟以左官蜀國非辜莫省欲
信翻疑寧敢他尤聊因自慙云爾

眇余謏劣夙慙偉奇中無多畜外鮮師資寧堪
振奮而耻詭隨譬彼兒稚佩鞮與騰亦若駑駘
踵武駟驪能不我甲奔益見疲天罔遺物登我
亨遶一試水僚三歷雲司淮淝閔旱澶淵戒師
抱關嶠函東粵保釐方冰若履比盈在持有碑
載口式祝用尸余曰奚勞民謂去思豈其隱隙
當彼路岐萋斐貝錦憐憐詬訾辱身褫級遠役

西隴岷峨合杳山何險巖旋渦迅驚川何渺瀰
長安天際故國海涯纖纖夜月九見成規熠熠
春葩夏葉垂枝嗟嗟勞人憂心如馳翳翳浮雲
蒼蒼靡虧尺蠖龍蛇屈信有時庶乎知命勉旃
勿疑

西曹舊游別來歲久不徒契濶興思間有
隔世之感矣作懷舊各一章

沈憲伯子由

往偕文始適子之館蓬海越臺冲虚消散祿石

二千布衣三澣黃金然諾白頭悃款既遂歸心
空山習懶丹經几清金膏竈煖衆妙克臻萬慮
咸坦猶懷友生塵緣未斷

陳少參羽伯

唐文始變伯玉爲宗綿延我友克紹芳風鍾靈
於越振譽江東宛地遺編盡省詞雄負俗寡耦
道大莫容坎廩二紀藩屏西戎垂晚嘿嘿殷憂
冲冲北函蹟仆長恨何窮

朱省郎汝一

雲閣委蛇法比參伍文既相觀仁亦資輔洵美
君子不茹不吐謹行脩詞薄視錦鉏信而見疑
逢彼恚怒方福歸吳爲原沉楚淒其以風濛濛
宵雨魂兮不來使我心苦
孫憲伯文揆
蕩漾方舟駕言適越極目蓬萊窮探禹穴石梁
虹飛瀑布龍窟赤城飡霞剡溪弄月嘯振青林
歌饒白雪雙劍入秦遵彼皜皜明哲知幾榮名
徒脫山僧不來嗣音遼絕

吳中丞峻伯

中丞魁瑰淵源家學柄詞麗翰川雲磅礴蚤契
聖腴雅擅述作
數試盤錯授節貴陽退荒經略屈指升沉同歎
萃拔遠慰渴饑斫斫勲伐

奚囊蠹餘卷之一

奚囊蠹餘卷之二

五言古詩

雜詩

王胥習格能黃公善厭虎血氣一時衰終爲黠
獸苦安身貴明折鷲猛奚足數魯縞本非堅猶
能勝強弩金刀聊割鮮髓髀不如斧知雄守其
雌深藏是良賈

鴈以善鳴生樹由擁腫全才與不才異何能兩
相牽志道守不易尚通情屢遷時命苟有合蟠

曲爲柘捲無因遇明盛鸞鳳避鷹鷂行藏信非
我冥默持玄玄

燕人有流言季子飽馱馱中山亦積毀夜光投
白圭和德氣融結上焉薄雲霓下以固金石多
口何能睽周行本恢廓谿徑空見擠寄謝讒諛
人循環理亦齊

湛湛方塘水洶洶接溪流榆柳交層陰鳥雀鳴
相求徒倚曲欄上爽氣生清秋俯視形將影邈
焉懷好仇晨風正南翔尺素不得脩馳神附雲

翼及爾鳳池遊

草枯山坂平秋登雉兔肥馳馬攬繁弱無俟遠
合圍一發殪霜毫再發墜雙飛舉火聊多鮮村
酤力不微但令快意氣奚惜兩忘歸凌厲諸豪
俠顧盼增光輝

大塊勞我生眇焉一暫寓朝華夕零落日出晞
夜露和轡馳不返百歲僅旦暮胡然大夢中知
寐乃致寤爆爆困形役升沉易喜怒操舟泛洪
濤身險情逾怖何如遵坦途悠悠縱高步

休沐委簿領消散恣神娛游睇夏木陰悠然自
成趣下枝虬龍盤上枝丹榮吐嚶嚶鳴文禽參
差復迴屢獨鶴唳庭除徘徊不忍顧豈無霄漢
心于焉振其羽

丹山下威鳳鳴臬或見嗤蠹蛭遇神龍矍矍恣
毀夷驅騏入牛阜芻秣氣詎移阿衡蒙流言處
聖不免疑超然覽玄始矢心三無私

腹育生枯株脫殼為玄蟬本與稿壤俱一朝憑
化遷吐納月露中擲沐風雨前微形竊伏匿何
意聲日宣螳螂在且見撲稟質非其鮮
青銅百煉餘範出菱花鏡燦燦金薄光盈盈水
心淨不獨辨妍媸亦照心邪正塵埃一蔽虧玉
臺無掩映何當拂羅袖常明本來性

渡江望金蕉山

解纜發江南掛帆遵遠道微風沂層波凝矚見
三島潮從海口來驚濤簸天藻晴雨撼蛟螭流
沙沃樹草飛閣罩雙峰金刹麗三寶神鰲秉坤
軸浮玉架蒼昊回巖本西亘狂瀾障東倒延佇

欲凌空飄飄爽余抱

初夏入濟

我昔駕征航芳華媚初景淺綠曳垂楊輕紅發
朱杏忽焉幾千里始涉齊魯境春風度去陌夏
雲薄前嶺花落樹陰繁鶯鳴晝逾永戀土厭薄
遊懷人復心耿天闕五雲中蓬窻日延頸

七月十五夜泛湖楊丹泉同賦

西風逐炎埃零雨生新秋煩襟久沉鬱良朋結
清遊薄暮枉輶車花港遵蘭舟涼月忽澄景波

落珠光流幽林有驚鵲平沙亦翔鷗金荷漾遠
浦明滅互沉浮飛觴無留飲雅歌旋相酬物外
信昭曠明發成淹留

贈別

駕檝將何適把袂立斯湏銷魂惟惜別况乃別
心知夙有冰雪操久瞻金玉儀陟遠自雍秦使
節照江湄舳艫通萬里惠澤浩無涯不逐時人
好雅與褊性宜西湖山水間登覽頻招攜春風
桃柳穠秋水芙蓉姿從茲渺焉隔良晤不可期

長安見花發千里勞相思

與張子談玄

夙尚規中理晚晤守玄人
玉簡非真訣金符亦漫陳
弱水看逾渺三山空嶙峋
入海勞方士嗟漢與秦
留侯從赤松聊以托隱淪
一聞上乘言萬化通元神
弱水自可筏殮桃信有因
重離逢習坎虛實隨屈伸
九還成一粒形外無足珍
三五陶鎔物逍遙宇宙身
俛仰寥廓間翱翔極無垠

賦雲樹圖

山陰雪夜舟中散駕千里昔賢信高曠遺形若
敝篴同心眇不作三疊風日靡曾是合歡者等
瑟調宮徵相逢故復新誰云遠猶邇浙水通閩
江多情念之子夙以金蘭姿共結雲霞軌躡阜
春樹繁瀕流暮雲起因之寄所思瑤函以雙鯉

酬鄧元學

嗟余夙謗戾迪德慙前脩經籍寡論討金蘭失
其儔徒然鷓鴣質邈企鴻鵠遊伊人振清藻含

芳誕徽猷冰玉君子儀忼慨廊廟憂晤言已神
契重茲瑤華投伯琴愧知音郢曲難爲酬中情
一以洽願言永綢繆申章在敦義道遠相爲謀
泛湖風雨
東風蕩湖水白浪湧金沙巖巒互隱見林樹忽
傾斜寶塔倚天末虹橋雲半遮頓失艤舟處回
望城郭遐舟師力不任隨流泛無涯平生萍梗
跡只尺千里賒經綸在四方嗤彼繫匏瓜但令
遠塵俗何地非吾家

次韻答陳玉泉

夙齡愛丘壑雅志深巖棲偶逐青雲出遂與故
山違富貴非我有衣馬慙輕肥十年守郎署三
尺欽皇威堯天溢惠露草莽霑春暉省躬靡一
善荷子忘百非眷彼萬里翼終奮鷗鵬飛伊余
江海心時懷鷗鷺磯長鳴顧儔侶翱翔力益微
枳棘旣已安卑棲其世譏側聞昭曠音清風振
塵衣連章不可繼調絕和人稀

夏日雨霽過帝氏山庄得雨字

朝曦盪餘靄原隰滋臙臙結客竦輕轡駢筵駐
深塢白楊敷層陰綠葢被長浦遠影出岫雲新
香濯枝雨靈石交名花的皜媚簷宇游鱗與飛
翰參差相狎侮人同集金谷地擬臨玄圃清醞
湛飛觴懸河落談塵林風披素襟紅塵避錦組
日晚忘歸途適性即吾土

將往廬陽別省中諸同志

朝辭丹鳳闕夕駕青雀航我往豈不遄躊躕曷
所望眷彼二三子燦燦珪與璋休德溢膏潤興

言吐蘭芳芳潤藉自飾永懷不可忘

忘形恣歡洽所貴心相知不聞昔人言對面生
九疑白首猶按劍結綬終睽攜永言鑿前轍同
德爲師資瞻彼清秋月千里見情私

私心戀京洛君亦念遠征我守一郡牧君刑天
下平林莽棲鸚鵡上苑集鳴鶯嬰組恪脩程聯
琚翊盛明踈戚任所處去任非殊情

情深願易違會促離苦多秋風折高柳霖潦彌
江河行矣各自勵乘時莫蹉跎漢世重循良

明廷殿催科何當報知已民物阜且和

夏日鎮淮樓登眺和劉侍御作

仲夏景氣佳憑虛一延睇飛閣亘中天幽遐紛
無際蜀山鎮坤隅南巢旋溶濟崇岡出斗躔淮
淝淼東逝川原界吳楚聲教雜荆衛峻堞何透
迤井邑煙火翳駢闐集四方帆轂互飄擊沃土
夙宜稼雲疇靡留藝崔巍較弩臺遺墟敞初地
散兵亦有灣喟焉感興替解愠招遠風怡顏值
新霽心慙竹使符適因眇塵世

沈生桂林生瓊楊生郇王生教以應試行
各贈四韻壯其志云

南州有桂樹托根在巖壑陰陽儲其精日月相
迴薄天邊挺雲幹燦爛敷丹萼採之及清烁竒
芬月中落

林生真瓊瑤瑤殊卓犖燦彼珪璋姿明瑩不
加琢太潔易成汚至道闇以邈行矣薦清廟慎
哉守其璞

談經楊子雲秉心淵以粹說詩解人頤摛文同

舍避久戢霄漢羽雅有鴻鵠志無嗟日月逝歲
晚成大器

我愛文中子沈默本天賦尚書探聖猷不襲漢
儒誤冥心在羲皇希聲等韶護登崇及昌期餞
予青雲路

宵征

蕭蕭戒宵征駕言返我疆遵彼淮與泗河山阻
且長盱嶺盤巖嶇沿流以徜徉虛邑指招信帝
里踰明光盈盈照寒月皚皚飛清霜攬衣落木

下膏車古道傍孤鷓摩蒼天野田鳧鴈翔俯仰
何遼邈所志各一方夜央不遑息我馬玄以黃
慚彼秣中廐何如御驕驕駑力豈不騁聊以及
周行

靈雪篇

大化度群生陰陽禪相司闔闢調四氣品物蕃
昌熙旃蒙大荒落仍饑下民咨玄冬屆臙月恒
暘失常期三農望欲絕百卉不得滋眇余廩恫
鰥惻惻省所私矢我髦若案索彼神與祇鬱結

上冲霄散為雲彌彌俄而微霰零隨風舞離披
白渠啓瑤甸玉宇標瓊枝萬有一何夥混然皓
無涯消螻逐沴癘豐亨兆於斯因之悟往訓居
高而聽卑頰仰喜懼并永言慎所綏

淮揚道中

我行無幾何炎景忽載涼一驅環滁間再涉泗
水湯憇彼淮之陰輕風泛孤航帆檣帶暮雨雲
飄度維揚去留不自意心跡成兩忘居人悠悠
爾祗役奚遑遑昔云丈夫志桑蓬在四方墨突

不待黔周流聖所減勞生誠順適勉旃娛景光

歸鶴篇

皎皎雲間鶴不受氛塵侵幽人一以贈馴為階
下禽春風舞翩翩秋月唳清音瘦影愧爾似野
性借余忱經年托儔侶欲別意難任念非夙所
隨還歸嘉樹陰客旣眷故鄉鳥亦適故林去矣
物無累懷哉誼已深願比雲霄翼常同萬里心

舟中紀夢

丙午秋正中癸卯日之暮舟橫江浦橋沿邇以

東鷺澄心靡所思清夢恍神遇遂有三達人邀
我青雲路華裾珮鏗鏘承明趣共赴金殿九重
開天香散紫霧瑶階降至尊怡顏親寵顧忽若
宣余言直指披衷素情通願不違魚水欣相附
大賚隕自天王爵金莖露至寶出上方靈液瀉
玄圃河飲較量狹持盈將自喻再拜捧歸廬相
看驕且懼數聲江鶴鳴子夜蓬窓寤起視月當
空銀河一槎渡

懷高光州

憶昔送高適沽酒長安市相思何處邊燕山與
湘水萍蓬互飄忽三秋阻雙鯉猶聞多苦辛兵
戈日填委角聲淒斷雲蠻煙蔽殘壘余亦淹簿
領萬里同延企頃傳天上音知是賢聲起五載
花封郎超遷漢刺史中州本名都習俗信淳美
江漢及汝濱均爲聖化被地異民不殊心平政
自理願言崇令圖仁明表終始努力夙所期休
戚互相倚

貞女篇

南國有貞女粲粲冰雪姿展如邦之媛膏沐不
屑施幽蘭擷文佩蓮葉紉素衣耻言求庶士深
閨潛自疑媿彼桃李顏嗟此日月馳春風上柳
色水荇亦參差轉盼忽異態標梅辭故枝頃筐
暨其實能不生酸悲誰無室家願我命合歸遲

入天台境

仙邑閔精爽巖整信幽嶸一望赤城霞遂與人
境絕靈石羅萬象礪底流泉咽猿樹靄蒼蒼鳥
道經百折仰瞻星漢垂側駭蛟龍穴是時春欲

徂景物正齊潔木秀芝亦肥雨餘芬可啜身躡
劉阮途心叅茅氏訣登頓豈不險玄襟自娛悅

尋源覽勝贈錢尹

王孫三山來云出勲貴里高標信自別柔翰亦
何綺雙躋天日峯直遡茗溪水討跡桑梓間遊
心烟霞裏醉着漉酒巾咲振飛雲履尚想方外
仙風塵久脫屣

濟川贈吳子

川源浩無極茫茫接滄瀛日月互吞吐出沒鯢

將鯨天吳吹浪花秋濤撼雷鳴長年避不發漁
策亦屏營何人理方舟揚帆迅孤征衣袂夙有
戒濟險良匪輕中流一鼓柁萬里期澄清

題月桂美人圖

朱顏何燁燁腕弱倚芳樹華裾飄彩雲玄鬢凝
香霧虛疑洛川神謾想巫山遇應竊長生丹飛
伴輪中兔

宿天姥山房

朝躋千仞峯暮向峯頭宿仰睇猶萬重翻疑在

山麓夜靜聞猿猱庭空走麋鹿纖月掛孤松飛
瀑下深竹中天一燈明鍾梵出層谷飄飄凌雲
霞頓覺清心目明發攀崎嶇九仙相追逐隨地
飯黃精遠辟人間穀

送陳倅巡山順德

歲晚北風寒陵原饒積雪砂白路漫漫于焉送
君別平生報國心文雄武尤烈每憤犬羊群奔
騰未卽滅胸藏數萬兵手提三尺鐵慨慷登邢
臺西望何峇嶮重鎮接三關十隘紛九折雲屯

六郡材人和地險設旅振宣皇威天驕避漢節
折衝尊俎間萬里烽煙絕

贈李會泉封君還蜀

西蜀猶龍翁入關輕萬里經秦復踰魏戾止漳
之渙吊古迥銷憂觀風色靡喜官舍澹無營怡
怡適倫理天雄股肱郡仙郎司法比甘棠陰正
繁芳風颺然起組綬舞衣鮮鼎俎榮祿侈兩載
樂委蛇一朝憶桑梓相送臨河梁離端自茲始

其二

始離一水間遙望萬里橋悠悠蜀道難旦晚馳
星輶新霜落木初南征鴈嘹嘹豈不厭行役到
處成遊遨清齋會泉上山靈時見招猿鶴苟無
怨松菊亦未凋峽雲涼可攬江月紛相邀但飲
郢筒酒而斲黃精苗鳳誥一何煇遮莫來丹青

其三

丹青接畿甸榮祿何煇煌甲第擁輪蹄信美非
我鄉懷哉天彭居峽險江流長危棧飛鳥道曲
坂盤羊腸微茫在天際寤寐勞相望親戚悅情

話畎畝便稻梁賣卜身可資守玄道所臧浣花
丹景下濯錦青城傍逍遙快意志遊子任翱翔

其四

翱翔遊子心豈不眷恃怙經營在四方王事正
靡盬盟鷗一以狎菜雛不得舞行矣戀滄洲懸
思陟屺岵烟霜薄遠林涼風淨秋宇日晚急驪
歌把袂清漳滸故鄉亦云邁自昔稱天府岷峨
有遺傳仙人號彭祖咲傲洞天幽遐齡不可數

古曠別業

在昔遼金時芳林駐飛輦繁華一朝歇郊圻自
平町高士梁園歸名勝此中選朝市夢已非菜
蕪手親剪黃花近籬栽綠疇當戶衍丹竈藥丸
還東華經一卷翻嫌長者車驚起村庄犬

奚囊遺集卷之二

奚囊遺集卷之三

五言古詩
西嶽宋侍御同遊

偶從乘驄使登攀陟千仞秦城越斷隄漢時歷
平隣翠柏儼分行緝宇紛前引行披谷口雲坐
沾巖頂潤群山漸覺低百道飛泉噴信是巨靈
擘中流亦何迅石鼓靜來聞天池湛清醞棋坪
若有人青鳥傳芳訊恍惚毛女迎因偕叔卿進
一餐千葉英頓失三峯峻世網未可辭塵衣聊

此振

自華山趨蒲城值雨停車待霽乃發
華嶺雨欲來群峯忽變色突兀平復低蒼翠黯
然黑近樹影猶歛遠澗鳴漸亟雷駭蛟龍飛風
驅燕雀匿停車未能發煩囂暫屏息少焉見新
霽晴光在楹側萬象眼中明爽氣散幽臆回瞻
仙掌遙前旌颺渭北

浴溫泉

白靄薄青林遙望驪山趾沿洄紫邏深勝際一
何侈紺殿挂懸崖繡嶺侵雲起池亭接上流湯
湯漾溫水蓮臺噴雪花瑩然絕塵滓坐石膩於
膏嗽泉耳若醴洗心滌骸垢澄映徹表裏我行
愜幽賞誰謂宦遊鄙勿問舊離宮華清久傾圮

關中十首

古渡餘荒塚何年風雨崩曾將天補缺不禁地
移陵神聖猶如此而人安所能
夫子關西傑脫迹湖城隈四知心不負三疏禍
成胎謚言君未悟大鳥空遺哀

魏武爭關日西兵先據秦中流幾沒矢一蹶在
蒲津當時不自奮鼎足是何人

崔魏重關下猶說姚鸞屯全軍併心力勝筭得
聲援悲號風雨夜惟有陣亡冤

左丞能料敵趨利不攻堅魏將馳錐壁蕭軍走
華川祇今馮翊路烽火夜猶然

逶迤涇渭水引入廣通渠疏鑿驅民力舟航利
國儲河流自清淺無地覓隋墟

黎陽本孤旅鼓譟薄弘農將軍行奮迅郡守計

從容誰信登陴豈真能折虜衝

萬騎出關東稠桑一戰空失律哥舒翰遺謀楊
國忠此時唐天子行幸華清宮

元和多寇盜飛書動京師關津有內應主將詎
能知始信金帛貴頓使人心移

黃巢陷河洛全師屬令孜壯心猶感奮枵腹不
勝疲禁阬一失守國破徒傷悲

八公署對雪

高齋盡日雪稍稍蔽青山遂令蒼莽色眇在混

淪間同雲垂滿地微月忽臨關庭柯墜不折棲
鳥驚復還撫景豁幽矚杜門謝塵輟悠然坐清
曠寒夜開愁顏

秋日常關城登眺客有談王官龍門之勝者
漫賦見意

秦關霽秋霽潼津正奔流北指中條麓想見王
官丘背郭渺烟渡雲樹蒼蒼浮爲問首陽塚嶠
嶇猶阻脩斷壁挂猿狄激浪騰龍蚪空懷鑿山
蹟未遂禹門遊邈矣非吾土凄其生遠愁翻然

眷東鷺湖上棹漁舟

酬王廷尉元案

往昔都門別惆悵平生親宰邑臨淮水分符出
衛濱爲狗五斗祿同是折腰人雲樹眇相失嗟
陀經幾春葉令子齊名異績騰 楓宸君游豈
予似亦復免沉淪徵書赴南省授節入西秦彙
進胡不懌遼邈增苦辛客從東方來貽之雙錦
鱗烹魚讀尺素眷言何諄諄紅顏俱白髮久要
寧足論憂心正荼毒秋思到鱸蓴雅志在丘園

荷衣垂角巾申章青雲侶功成歸比鄰
寄和野翁睢州阻雨
東歸匡亳間登涉念脩途周秦猶在望漸近楚
與吳一夕飄風發陰雲滿四隅驟雨竟三日橫
潦漲通衢將留廩不繼欲去愁僕夫郵亭坐嘆
息巡簷鳥雀呼湏臾覩新霽鬱結成歡娛輕車
已夙駕駑馬爭前驅世事亦如此顯晦同榮枯
達人自有悟幻迹安得拘

悼亡四首

蒼蒼蔽重陰雷霆何太烈階前瓊樹枝芬芳一
朝折福鍾信非邇禍倚孰爲孽余愆省莫追爾
善朗焉滅皇鑒猶遺形悲來五情熱
十載攻詩書文思飛縱橫先達皆歛衽同輩一
時傾希聖迥不惑芥視世上榮朝聞徒爲耳夕
死空令名誰云天帝側無人賦樓成

楚璧瑩無瑕隋珠夜光炫墮地寧復完沉淵不
可見嗟余老無聞屬爾揚聖彥爾猶厭勞生余
留復何羨終恐歸化時無復生眷戀

回也天喪予伯魚亦先逝自古皆如然才賢不
永世造化彼何心脩短同歸斃暫拭涕流離聊
且從禮制不及東門吳怡然無累繫

冬日西行偶述

海珠初騁望茫茫路已迷三水適西邁雲靄蔽
端谿入峽忽欲暝旣出聞村雞炎荒無嚴霜芳
林草萋萋秋虫振羽鳴春禽呼雌啼寒暑有代
謝此地良不齊戒心南山猿亦警滄溟鯢俯慙
經世謨祗役空栖栖

贈傅右使近山

八閩信嘉麗到海勢偏雄五華盤蜿蜒三秀迥
浮空云是飛僊人結室當其中芙蓉散青靄座
上搖葱籠時沾躡屐露或御振衣風名籍注寶
錄雅與金閨通俛仰廊廟心寤寐巖壑同餘潤
宇宙間膏澤垂無窮

贈督府公

澤國東連海逋逃結島夷腥風吹急浪出沒恣
剽推承平厭戈鋌束手徒傷悲皇心眷南顧

爰命丈人師上公自神授謨烈夙兼資登壇揮
五兵威聲凜四馳乘秋橫殺氣甲士騰熊羆一
鼓誅鯨鯢再鼓淨妖魑雲開海門近白日照江
湄捷書聞鳳闕上賞沐鴻私許國身猶壯
報恩心靡移勲名載青史俎豆繫民思

初冬江閣觀潮以到江吳地盡隔岸越山

多分韻余得地山二字

冬入北風生驚濤一河駛危樓倚江干潮信正
堪伺海門初轟雷白練中天墜恍惚陰山移還

聞奔萬騎云是忠義竟憑茲雪遺憶旦夕再來
還傷心故吳地

我有同心人日夕相娛閒江閣渺竒觀因之一
登攀雄風壯怒潮隱隱江上山層雲排雪浪噴
薄穹窿間帆樯互出沒魚鳥驚復還消長不可
窮聊爾舒心顏

題秋江獨釣圖

幽人遠塵囂浪跡俯寥廓茫茫烟水間虛舟任
飄泊投餌本無心得魚非所樂長咲秋風生木

葉紛紛落

荆門道中避雨觀音巖下

恒暘正炎鬱一雨忽滂沱征徒促徂兩避止山之阿青林結野館懸崖立嵯峨幽洞趺大士五色土森羅百尺掛螭首噴沫成龍渦更攀雲中臺神怖不得過圻地迸雷電傾天注銀河流沙灑霖霖恠石隨其波我生嗜採討歷覽豈不多偶憇邁竒絕欲去仍留歌

與奚憲使學山話舊

在昔附驥日相將皆茂年君直西掖垣我備將作員屈指青雲上致身良易然蹉跎能幾何素標忽乘顛蠶叢萬里國一官同迤邐豈不厭苦辛有懷不得宣正御無十獲力耕逢石田扶搖渺鵬程倦翮慙飛騫飛騫信無期悠哉歸來篇三吳不殊俗五湖雲水連訪我猿鶴廬遲君書畫船初服信自媚寧獨文繡妍尊羨與鱸膾願及秋風前

自江津放船渝州投治平寺

鳴撓下棘溪水駛舟如箭銅鑪乍經過漁洞忽
不見道上有逢迎遽走渝州椽傾灘但轟雷激
石陡飄霰丹壁罔疑睇青林祇心戀乘傳入城
邑小憇空王院悠哉一無營向來何萬變

五丁峽

飛瀑下澄潭磷磷嗽白石清風灑層巖泠泠生
兩腋靈鳥及幽花附耳忽沾幘蘿篠迷前途雲
靄蔽後陌流覽乍躊躕凌空陟峯脊曠然小人
寰恍如生羽翮云是五丁峽信有神工闢樂土

易銷沉巖壑饒仙籍嚴程不可留虛擬脫塵迹

寓兵康國詩

海郡逢多難鯨鯢颺烈風逋逝成部落島嶼出
艫艫千里桑麻地頻年荆棘中給兵徒自贖命
將乏全功誰遣閭閻秀來膺虎豹雄魚龍纔置
陣尊俎卽臨戎勝筭惟居重先聲足遠攻庶幾
康泰日歌咏四民同

再入潼關

十載抱關吏塵鞅復峻函浮湛處其賤籠執亦

身耽朝躋畏嶇嶇夕涉戒濡淹盤桓貴行正往
訓夙所諳覩懷拂衣思弃繻彌可慙枯萎而雨
露忍忘天澤覃候鴈隨北風河溜下江南無由
寄心曲使我兩情含

三月二日東園讌集

青門三月初春光燦如綺楚楚耀路衢聯裾復
方軌言訪仲長園爰出冠蓋里會心信非遠翳
然得林水珍禽迭成響竒葩雜紅紫擷芳入尊
俎茹鮮酒逾旨耽樂共忘疲坐隱忽移晷灑澹
指顧間夜除先上巳

上巳景隆池讌集

上巳信佳辰光風媚林薄纖柳颺絲絲衆芳紛
灼灼曲水引龍渠舊苑分花萼蘭朋欣盍簪選
勝諧宿約忘形雜嘲戲有酒任斟酌得句或微
吟探鈎忽大噓矯志在青雲何心眷丘壑爲言
厭其肥無如快藜藿

省中會餞雷叅伯以別後相思復何益分
韻余得相字

長安麗春日
薇省盛芬芳
光風暢和氣
燕好同樂康
臨觴曷不御
離思結中腸
我友慎明德
洵美金玉相
綢繆曾未幾
緬隔參與商
眷彼垂白人
倚閭遙相望
歸與釋百憂
萊舞娛高堂
翳萱適所好
叢桂儼成行
處豹澤深霧
爲鵠摩窮蒼
揮手謝塵垢
勞者何遑遑

折楊柳

垂楊怯風吹
飄搖不自持
攀贈遠遊人
寧誇物態竒
柔腸同縷縷
聊以繫相思
倘念凋零易
適

歸藉一枝

日晚署中言懷

春風蕩晴靄
遠見南山碧
庭樹攬餘暉
烟霏日將夕
散吏步虛曠
委蛇暫時適
歸鳥駭林端
乍止復揚翻
所志在飛騫
卑枝苦逼窄
而我執系樊
籠何能忘跼蹐

送子與省長入賀 萬壽

西曹文會罷
緬隔幾春秋
世路悲青眼
年光咲白頭
重來陪省署
一見解離憂
永夜蘭言洽
娛

情芳醕酬忘形成莫逆同道得相謀頃奉金閨
使遙添海屋籌徂東聊書錦直北近宸旒晉
接鷓鴣並恩私雨露優躋華君已後處賤我何
尤比德懷貽玖臨風脫佩鈎悠悠歲寒意終以
結綢繆

飲何中丞荷亭分得夏荷二字

玉井十丈蓮托根從太華歸與謝麒麟執此娛
耕稼池閣隱城隅南薰扇長夏參差綠蓮敷的
歷紅芳亞著雨薄脂鮮披雲輕縠藉良辰侈嘉
會招遊適休暇蔭樹晚涼生舉醖寒漿瀉豈有
物外心暫稅塵中駕延想西湖曲能忘三畝舍
映日復接天不聞昔人詫

雨後芳園潤庭陰上綠莎槿籬低粉堞竹逕罨
清波碧散牽風荇紅凝挹露荷林喧未友鳥池
狎換書鵞佳麗西都舊人文甲第多遠山分太
乙曲水入天河詎意談經地能容問字過折花
慙髮素照酒覺顏醜簿領淹簪紱幽期洽薜蘿
同遊總陶謝共和采蓮歌

同潘臬諸公登終南普明寺

聞道終南勝時時望碧岑同聲欣我友于野共
相尋控馬樂遊原樞衣曲江濤渴想天池液乘
風珠樹林初旭表金輪兩塔銷層陰下方旣空
曠上界尤崎嶇龍宮信云險虎逕何其深松檜
偃雲蓋交飛喚珍禽紅蕖出綠波竒芬襲塵襟
俯見城市眇霏煙但浮沉四荒紆壯思清梵豁
幽忱從茲依福地常持不二心

送孫學使轉官入蜀

渭水東悠悠逝者無時息歡會何可長一別不
再得君昔下鳳池西京典文墨門墻桃李花芳
菲徧春色人娛倚玉心自耽稽古力貽我雲錦
章天葩爛如織雲錦豈不貴永懷在明德懷德
不忍分離緒填胸臆夙秉文翁化仍被蚕叢國
岷峨杳難攀巴渝深不測猿嘯饒悲風鴈問鮮
迴翼歷歷想舊遊經過莫相憶

公署登樓述懷

高樓坐長夏四望盡蒼山窮荒復愁緒溽暑增

鬱煩紛余白雲省秉鉞瘴海間徒然抱忠義何
以格冥頑鄉心驚逝日壯志損頽頽眷彼林中
鳥向晚倦飛還

食秀亭

孤亭矗巖際下見雙江流南山擁青翠雨霽煙
嵐收蘿蔦盤磴曲枕柳藹雲浮旌幢搖渡口絃
管喧枝頭釀泉供獨酌採秀芬可羞無端鬱余
思北望天悠悠

奚囊蠹餘卷之三

奚囊蠹餘卷之四

七言古詩

結交行

在昔侈彈冠亦聞誇結綬同升雅見推竊位終
貽詬雖雖韶濩八音諧大厦經營集衆材不然
阿衡才美亦足矣吐哺握髮何爲哉君不見三
亭謁者載范叔蔡澤翻能代張祿狗監微言奏
予虛常何有客誰推轂連衡合從秦將儀片言
出口成雄雌入關舌在不得逞邂逅舍人傾高

賞古來名行施後世青雲之士遙相麗當途不
鮮引同心運命難逢偏易替君不見漢相封侯
得意時奉給盡充開閣資故人布被飯脫粟安
用平津富貴爲

石梁篇

我昔耽浪遊竭來興何劇咲振千仞衣醉著登
山屐春日幽心成饑渴大江東畔尋仙迹剡溪
經幾曲輕輶轉層谷躡水穿雲億萬重此地洞
天標蓋竹蒼壁斜懸百尺梁中天龍舞神龜伏
銀河迸出石罅泉噴雪飛瓊成霖霖曇花金碧
俯潺湲方廣瓊臺縹渺間寒巖桐栢竦雙闕赤
城霞起相迴還青蛇蜿蜒護聖瓜澗邊香飯漂
胡麻已聞天帝開爲府復道空王闕作家蓬壺
方丈眇難遇此去桃源應有路莓苔翠鎖石橋
危神怡不覺超然度凌虛頓使萬緣輕潭底空
明心共清啼猿唳鶴遠相應瑞草奇花亦有情
情縈景會去逡巡人間甲子應千春歸途遍識
經行處莫遣他時雲樹湮

送白德純之廣平

憶昔與君游結綬承明裏意氣凌雲霄功名薄
朱紫一麾我領荒城符君持三尺越江溪南國
方遺召伯棠監鹺更試帑文使蕭蕭風木正愁
予頻勞車馬駐山廬十載飄蓬一回首青山白
水聊相於春來湖上饒花鳥六橋煙舂蘭舟小
千重蒼翠隱樓臺十里芳菲城郭遶逋仙不負
北山靈長公公事湖中了驀道徵書天上來
三輔還資作傳才臘月柳枝渾可折離心且盡
掌中杯君不見匣中雙劍會有時翩翩黃鵠亦
分飛願言別後各努力心期夙昔無相違又不
見塞上有鴻河有魚相思惟有尺素書

馬右使索題紅梅圖

君不見不見大庾之巔萬樹梅南枝北枝參差開又
不見上苑同心將紫蒂紛紛競逐上春來淡粧
披拂羅浮肆踈影橫斜孤山隈爲憐素質皎如
雪却月凌風迥高潔誰遣夭桃文杏顏氤氳薰
染貞心徹換骨非關紫府丹應將酒暈敵春寒

紅霞影轉香偏遠玉笛聲殘色未乾我聞處世
忌太潔獨醒何似知幾哲莫緣索咲浪相疑由
來不改冰霜節薇垣上公調鼎臣鐵石肝膽南
金身開芳懋實歲寒操飄飄逸思超風塵樹下
看花未足娛駐却花神入畫圖物理天機常在
眼有脚陽春到處敷

送晏東之還廬陽

燕山歲晚北風烈四牡駢駢犯冰雪年來猶自
夢淮淝因君倍憶河橋別清直堂前民事餘城

南小艇蜀山車市有弦歌供讌賞心將憂樂寄
閭閻別來君幾朝京國中廐駟駟雲錦色伯樂
能空冀北群衛公秉德何淵塞爲想同遊今漸
踈分符鳴珮振芳譽風塵荏苒憐雙鬢舊秩相
逢君與余春近柳絲黃滿陌殷勤折贈休輕擲
君還江北望江西我亦江南未歸客莫向清時
問屈伸九天雨露萬方均賢勞不獨淹畿輔蚤
晚丹書下紫宸

夢椿贈王尹汝和

寶婺靈椿幾百尺，盡溪之水沿東白。川岳祥鍾
梁棟材，真心不讓南山栢。蒼枝翠葉何陰陰，翔
鳥綴兔雲霞深。廊廟斧柯迥難及，時時林下聞
芳馨。奄忽飄風侵密雨，東南半壁摧天柱。頻年
鳳羽拂丹青，一夕龍鱗委黃土。風木由來屢孝
思，瞻雲陟岵總堪悲。豈無花滿河陽縣，清夢偏
歸隴上枝。

柳亭歌贈葉中翰

我聞柳亭之山崔巍不可攀，乃在新都之域牛

斗間。烏聊直上松蘿杪，婺水遠近相迴還。坤德
潛滋五沃土，帶雨和煙千萬樹。柔條密葉自依
依，鳳伯檉河安足數。秘書舊業當林深，爲憐世
德寄遐心。聽鶯御苑勞鄉夢，繫艇蘇堤思不禁。
御苑蘇堤兩牽束，故山楊柳年年綠。大隱何妨
金馬門，却咲先生歸去速。君不見渤海公亭亭，
車蓋兆里中。又不見柳下惠門巷，清陰滿人世。
鳳池綸綍振前脩，不負當年培植計。山青青柳
翳翳，亭中之澤引無替。

題畫壽沈光祿

星精何處降云自蓬萊宮瑤池竊桃實跨鹿出
雲中一從遊戲謫人世霞裾曾向金門曳不因
柱下薄周官爲憶三山辭漢帝 帝里優游洛
社英王學麟盤樂太平菁華燦爛胸中趣錦鉏
婆娑膝下榮紅顏無待還丹駐筭滿三千上海
瀛

天雄陳倅話別

憶昨送君吹雪花今君送我花如霰風光回首

易寒暄世事浮雲成萬變漳河東下一帆飛戀
闕懷鄉願不違別後相思幾千里看花對雪兩
沾衣

仙姝行壽唐母

仙姝吹簫玉臺上翩翩彩鳳紛來往聲散氤氳
五色霞神遊閭闔三千丈塵世浮沉總幻姿當
年解佩向江湄司徒羽人舊真侶綺琴寶瑟鳴
相宜階下亭亭丹桂樹揚芬吐華在雲路有隕
恩波自九天紫誥龍章標異數鶴鬢朱顏耄耄

餘星冠霧縠瓊瑤裾麻姑座上麟為脯西母筵
前桃可茹茹桃擗脯金漿薦錦組爛熳舞衣絢
穠花猶媚未闌春好鳥初調夏聲轉北堂萱草
正鮮妍歲晚侵凌霜雪便中宵寶婺遙相映月
裏嫦娥齊壽年

中秋李節推官舍對月時唐丞防秋易州
李倅捧表入 賀朱倅擁兵邯鄲余子櫟
還浙大比慨然有懷各賦月字

陰森栢影上踈簾起向中庭對玉蟾謫仙光照
金尊裏杜老杯乾自可添良宵莫遣坐超忽醉
彈長鈇清歌發靜夜千家砧杵秋冰心一片天

雄月

燕支木落風蕭蕭黃沙捲雲嘶馬驕胡兒驅逐
古徽狃漢將武捷今嫖姚塞下專征親受鉞千
里餼糧隨將卒東平國士信獨賢佳節淹留易
水月

天王燕喜千秋節萬國衣冠八月來紫禁鐘聲
三殿曉玉堦香焰九重開仙郎此際趨丹闕劍

佩鏘鏘候明發聞道清光萬里同何人共步金
臺月

六郡良家武且賢霜戈雪鎧旌旗鮮一旅當關
九邊震胡天萬里銷烽烟吳中范老富兵甲憂
心點點侵華髮懷友應憐漳水雲娛情賸有邯

鄆月

澤國秋深風露清天香桂子飄山城爭訝嫦娥
宮裏見翻疑玉兔輪中生洛陽年少人中傑傳
得西河謫仙訣百丈高枝信手拈此時千里同

明月

雪夜柬王葛整

同雲油油海天低踈櫺皎潔晁輕闌平臨虛宇
曠入極坐對冥茫混二儀撒鹽飛絮擬不定珠
臺璐榭相參差山頭莫辨玲瓏石林落墜折瓊
瑤枝寒郊苦憶賞心侶有美子猷江之涯郢中
白雪待誰就何當爲我傾玉卮夜扉不掩正相
迓試聽高人命棹師

贈別陳友琴

山人浪迹天之涯皮冠芒履冰雪姿青囊騰貯
長生藥綠綺時調白雪詞仙蹤杳眇不可托膝
上枯桐俯寥廓坐臨流水躍潛鱗復見高山下
玄鶴玄鶴神魚亦有知防心誰解追皇羲生平
雅致足相契逢人莫道知音稀知音稀古來惜
無那清徽湖海隔新聲番出遠別離悵望孤帆
遠江碧

鬪草圖

長安三月百花开公子王孫結隊來青驄宛轉

珊瑚鞵交螭雜組雲霞回尋常坐厭黃金席咲
倩城南芳草陌陌上群芳麗且鮮嫩色柔香摠
堪摘盈盈羅袖含春姿爭誇葉葉復枝枝遠攀
有餘近不足彼也云多此稱奇金壘玉俎行相
從瓊蘇琬液傾千鍾花枝爲籌鳥歌艷極歡恣
謔情何濃情轉濃樂無極可那前山日西昇年
華不駐春欲歸忍令花草虛顏色君不見邊城
白草高連天冑鏃從軍夜不眠黑雲烽火朝朝
警年去年來春自妍吁嗟乎長安塞北正相倚

勞逸榮枯誰可憐

江淮道中

昨日淮陰城今日下邳道千里麥無秋三農去
爲盜道傍老嫗髮如雪啼饑向人聲欲絕往歲
征徭失所天今春濬河子歸穴東家持刃西入
秦南憐放火村無人長安日遠不可訴官司何
暇憐孤貧孤貧不見憐無復希生全腸斷不忍
聽仰視蒼蒼天君不見天山草衰北風烈崑崙
月午胡兒獵樓蘭征戍怯腥羶多少蒸黎死講

謀聞道邊陲今古愁寧知征役同戈矛江淮南
北稱喉舌肉食應慚爲國謀

漕河水

漕河水何湯湯浮汶踰濟通淮揚漕河水何屈
曲奔洪瀉輝旋山谷東南財賦壯西北一歲千
艘糧萬億疏鑿神功仰昔賢惠濟元元裕邦國
炎劉轉餉稱鄴侯唐興劉晏何多謀國脉河源
與民力羸縮由來視通塞古云患寡患不均富
國先須民不貧君不見道傍高柳皆龍鱗行人

尚說平江陳

與月七月既望省長朱鳴霄讌集王氏第即席

賦此

新涼洒輕颺零雨滌煩燠曠軌眷休暇良宴敞
華屋華屋縈紆貝闕邊雕甍珠箔相新鮮玉俎
鱗鱗錯水陸長安美酒傾十千清言纏纏渾忘
倦吳兒艷歌尤婉變傾耳皆能快賞心急管清
絲未湏展共言此日不常得人東西兮路南北
披襟把袂誠湏臾玄鬢俄驚霜雪色酒易醒歡

欲歇短歌微吟當筵發五陵衣馬何繽紛趙孟
金張緬淪沒且湏游衍憑化遷到處春風與秋
月

乙巳夏六月苦旱禱祠良久一夕獲大雨
喜而有述

帝炎秉節鶉火棲彤彤徂暑臨赫曦山雲不蒸
礎欲烈陽星載月畢不離源泉涸盡井斷汲平
疇生烟禾日萎老農荷畚悲正切萬戶各嗟氣
欲結何人作牧獨酸辛兩岐合穎慙先哲縣子

徒屋不足論中山積薪還自燔怒號把劍指赤
魃含水擬效樊英噴忽聽一聲轟霹靂陽烏寢
光流電拆油雲四起攪陰風龍翻山谷爲川澤
雲低却訝天乍頽雨急如聞廊屋摧階下汎瀾
沒瑤砌田間豐浸枯芟回雨歇聲不止歡呼動
閭里萬彙若更生何言田峻喜憶昔分符廬子
國千里荒蕪無稼穡賜租仰荷漢皇仁發粟柰
非長孺職僅延殘息逮茲辰憔悴未蘇饑殍臻
安得陰陽順調燮國用克盈民不貧熙熙六合

歌同春

蒲石

青青者蒲傍白石心賞偏宜隱君宅中岳仙人
不秘靈織女機頭誤相擲暗香和月倒金觥只
尺烟霞座上生咲啜新英枕欹久世間何物能
櫻情

明言

華燈萬點炎輝徹照乘隋珠夜光洩初霽陽烏
秋半月百頃澄潭千里雪未若心瑩潔遍燭群

情明不滅

暗言

橫潦衝泥谷無隙古鑿蒙塵深院夕重巖沉山
月不出黑霧崇朝蔽東白未若心暗塞幽隱無
形莫探索

登金山

長江自昔雄百川萬里縱橫競東走噴薄日月
馳風雷妖霧變幻蛟龍吼茫茫元氣相迴合中
流一柱標坤厚斜衝直搗迥不移部領群峯鎮

京口乍登恍入蓬萊宮紛紛人境亦何有石壇
寶殿盤七層飛旌挂席臨四牖松間午梵落中
天絕頂孤亭摘星斗生平幽意既自愜塵心翻
覺歸依後坐看寒暄墜晚霞扣舷欲去仍延首

瓜洲行

瓜洲古鎮大江首一道通津接京口千門萬戶
迎送人綠樹青旗喚酤酒府縣遙臨勢難及巡
司坐鎮專捕緝何處衰年刀筆餘擅威專利空
閭閻平明縱金復擊鼓階下弓兵盡狼虎須臾

訟牒滿庭除鞭朴喧囂恣喜怒公子攔街慣橫
索齒革盈筐錢滿橐獲賊無賊底足憂喪羊翻
得奪之牛屠狗被逮漫稱枉共入囹圄聽查訪
囹圄男婦何其多無錢不釋可柰何亭午何緣
吏事清笙歌傀儡呈前楹昨宵置酒餞鄉使今
日當筵試新戲妻孥背擁孫滿前醉後那知天
與地嗟嗟瓜洲之民萬姓終年事辛苦贏得巡
檢揮金如糞土此徒當事每如然糞土脂膏真
可憐已知黜陟在今歲安得新官不似前

春鶯歌戲東清七弟

翩翩好鳥出幽谷音吐簫韶衣金縠江南三月
正繁華恰恰飛鳴向喬木枝頭一轉銷人魂絲
竹喧喧祇足論百舌無聲鸚鵡死鸚鵡含羞不
敢言多情少年禁不得張羅挾彈欣相值花塢
時拋織錦梭草堂新展窺簾翼小山低戶水明
樓顧影聞歌勸復酬人生幾何行樂耳眼前富
貴雲同浮緘書撩我中心好自憐浪跡牽高抱
春風苦憶石湖西歸來莫遣鶯啼老

春歸詞

憶昨驅車入函谷東風乍轉寒塵燠桃林隱隱
未舒紅鬲湖渺渺初浮綠二月長安不見花九
衢煙樹飛塵砂長樂門前見青草却訝今年春
信早灞橋驛路出新豐驪山渭水秦關通太華
只尺不可上三鋒仙掌紛從龍日日東郊復西
陌臺臣亦有逢迎責嘗聞此地可長生媿殺道
傍名利客關河回首綠陰稠欲覓殘紅逐水流
啼鶯老去不堪聽出簾小燕聲啁啁懷春擬向

春留戀到得春來忙裏見荏苒春光應笑人莫
怨春歸疾於箭

驪山溫泉

驪山高出雲溫泉煖欲沸草樹蒙茸藹不分似
烟非霧浮陰氣老君祠古寶臺空惟道周褒與
唐貴漁陽鞞鼓犬戎兵山鳴泉咽同歔歔

種竹

川上青青竹移來植山麓陡覺風敲鐘磬音何
必鍾龍生嶰谷踈秀媿娟盡可人傾蓋相從意

態真風霜閱歷歲復歲玉質冰姿曼出塵

關中送孔左使之河南

憶昔星臨浙水湄開閣殷勤坐翠虛撲人桃李
盈欄檻四壁輝光圖與書相逢詎意投心賞馨
歎紛紛振清響猶聞於越注行思瓊瑤貽我桐
江上新豐斗酒青門樓十年笑共三秦遊傳經
未遂關尹願驪歌已促離人憂悵離憂兮駐仙
幃悠悠我思隨君遠潼津河畔柳新青太華峰
西日云晚黃河東去出三門縈迴伊洛到梁園
水底鯉魚應唯唯尺素傳來是晤言

聞文甫轉官馳報

秦中歲晚饒冰雪峽裏凝寒行旅絕何方飛騎
突重關云是金門傳玉節移鎮東南願不違兩
都文物覩光輝到處齊聲相慶慰有人私恨失
歸依

江南行

江南東接滄溟杳海上逋逃恣椎剽鯨鯢鼓浪
吹醒風巨艦輕舸疾於鳥雲間姑孰鞠作窩茗

溪震澤連嘉禾窮搜席捲不盡意厭弃絲泉輕
綺羅黃金映日珠照夜青蚨白粲何其多老稚
紛紛轉溝壑壯者髡跣稱真倭南粵從征誇毒
弩長竿短劔來齊魯烏合魚麗如雲屯吳咋越
隸同編伍陸斷浮梁水繫舟里社分營接江滸
幃幄將軍計萬全通夕烽煙盡殍虜吁嗟乎占
來樂地翻成苦城郭春生鼓角哀鄉村夜泣精
魂雨紅塵一騎捷書飛歸來三錫頒天府

出京贈陶使君

使君家世稽山下余亦悠然湖上社不肯狂吟
山水間同爲遷客淹邛雅錦江春色亦紛紛塵
囂雜遝無朝昏鳥蹄猿嘯兩愁絕相逢祇憶林
中園高山無雲水無滓與君懷抱元如此年來
未敢向人開結綬長安見天子西經蜀道古
云難萬戶千門迴復寒何意入門仍萬里宣室
不詔空長嘆清秋白日懸高曠共荷照臨恩浩
蕩君之百粵我七閩蹉跎莫減初心壯秉憲叅
藩總重臣且須努力答君親商山渭水亦皓首

寧獨風塵老得人

送靳左使奏績

青門垂柳迺地陰上有伯勞遺之音思歸已落
芳春後况乃離緒牽人心薇垣鉅儒東魯客茂
績滂洋聲藉藉著書何意擅文林踔行翻憎邁
今昔聊將螟螺等功名懷恬茹素含真精不緣
歔歛探幽寂神爽飄飄薄太清行看奏敢承明
裏雉膏終自充黃耳和調元化飫八埏故人在
遠猶在邇

贈田憲使夢鶴

有鳥翩翩奮長翮玄裳縞衣雙頰赤上薄氤氳
碧漢雲行棲蓬海飛仙宅乘軒祇覺厭人寰入
帳虛疑丹九還聖皇御曆宣和氣瑞世聊同鸞
鳳班使君玉立何雄傑容與天衢等高潔神交
忘爾復忘余警枕嘹嘹清唳徹

奚囊遺餘卷之四

意爾對志余逢君海峽想直與瀟
風班對君生立而掛爾各與天樹
神氣賦供其數聖皇由習定研
魯英雲行對卷五張山字來神
亦自論論會身歸又榮海峽
...

奚囊蠹餘卷之五

五言律詩

入京早朝

八極開昌運三辰曜太空
鶯花上苑苑鍾鼓建章宮
禮樂百年盛衣冠萬國通
何當紆夙抱彩

筆頌神功

早春慈恩寺同年會宴座主伯雪

聯轡指禪林凌寒踏玉塵
重借獻賦客共醉曲江春
殿閣香烟繞溪橋物候新
葱葱瞻瑞氣一



水隔楓宸

十里長安道珠林接禁城遠香聞馬首深樹隔
鍾聲誼托龍門重班聯鷺序榮歸來迷紫陌雪
霰晚盈盈

早春東白石
締搆十年心鄉評藉藉聞彩毫飛妙墨金釵綺
高文信遠江南鴈思深塞北雲春花未堪折那
得致殷勤

聖駕謁陵還宮

清蹕迴仙道宸儀引日畿龍旌揚帝喜虎衛肅
天威麗日來丹馭光風旋紫微恩覃百獸舞孝
達萬靈依

萬乘回鸞馭千官迓鳳樓綵雲團御蓋金水挹
仙舟畦時耕人省橋陵祀事脩行聞敦曠典休
擬恣宸遊

南樓

幽人棲木末南望盡江天飛棟雲霞合層簷日
月懸簾垂千嶂色座擁五湖烟何獨蓬壺上樓

居有列仙

和王舍人初寒秉燭集

鳳城清漏永霜落夜寒初
讌集如蘭舊人同結綬
餘詩成摩詰句草作右軍書
游藝非君事聊因一起予

送高穎湖還武林

薊北三年別金陵幾日遊
心懸徐孺榻目送李膺舟
林際野雲斷天空江水流
且淹經國志暫慰倚門愁

送王廷尉元家

蚤有花封譽龙宜棘署清
同心方合劍岐路倦聽鶯
天闕風雲思江淮烟霧旌
山川極萬里徙倚不勝情

東風喧別館春色遍天涯
一見王孫草翻思上苑花
斜暉移祖席新月在仙槎
驚問如能托無令怨路賒

送友北上

挾策上燕臺明經得茂才
江梅聊自折苑杏遲

君開澤國驚鷗運關河憶鴈來臨岐頻極目雲
彩護蓬萊

登雨花臺

憑崖攀法座躋磴出雲林往事成銷歇高臺無
古今放歌啼鳥喚舉醞落花侵隔樹來清梵何
言絲竹音

中秋前夕泛月次省長周陽山韻

山郭烟初歛江邨秋正中一分光未滿子夜影
當空冷滴梧桐露香飄丹桂風曠懷并藻思延

賞故人同

弄月石城西輕風故故遲偏憐向盈際不似易
虧時一鶴橫空下千山倒影移清輝隨地滿翹
首隔心期

龍江泛舟投弘濟寺

名都尋勝槩仙侶眷同情北去青山遠東來白
浪平花光搖桂檝王氣遶金城杳靄空香裏微
聞鍾磬聲

宿曹濮陽官舍

竹欄迴砌曲花塢襲衣香向晚移文几臨溪卧
石床金波連太液玉漏轉明光始信秋宵短無
如笑語長

秋野

曲水遠江分清飈揚細文石橋虹作架蘭舫鷁
聯群淮湧羸秦月城流吳冶雲寧知紆組客兼
得遠塵紛

清秋澄碧宇徙倚向江涯杳眇環山色徘徊蕩
月華空林歸鳥雀野水淨蒹葭何處勞相憶迢

迢博望槎

送艾居麓北上

徘徊躡高阜徙倚望星軺北極雲霞迴南天冰
雪饒開芳期紫閣振玉想丹青不那清江上離
懷有舊僚

聞歌

嬌歌試一聽能令四座驚松間初唳鶴柳外即
鳴鶯不畏周郎顧應傳韓女聲曲終餘響在花
落晚風清

有所思

綠酒空金卮因君不自持瓊瑤傳麗藻冰雪想
清姿明月同千里鳴鶯各一枝江村正無賴延
佇欲移時

龍江發舟將入楚

豐鼓促行船斜陽攪暮煙柳低風宛轉洲曲水
縈旋雲起含吳樹江平接楚天星河搖動處疑
在斗牛邊

卧病

愁結似張衡形消類馬卿不因岐路險未信俗
緣輕長日鄉關淚平生湖海情定須從此去莫
訝擅逃名

遊靈隱山次近山韻

芳徑接金沙耽遊路不賒緣溪饒鹿草入谷遍
鶯花古洞歸雲滿高山落照斜空香何處發渺
渺白牛車

出郭見雲霞依依望轉賒蘭舟十里棹柳陌夢
叢花石裏泉逾冷山中日易斜何由恣歡賞暫

得駐天車

九月梅花次東川韻

常開萬彙先何當秋復研花神如作意青帝借
微權浸月芳風遠凌霜雅操堅東籬金玉質形
影共相憐

日暮山行

矯首白雲中蒼茫處處同乍驚千障阻忽向一
蹊通古洞明殘雪踈林激暮風窮探猶未返孤
月已臃朧

題綠崖贈沈生

蒼崖盤九仞危磴轉叢林一室當峰小千花繞
徑深雲霞飛麗藻風月靜塵襟寶匣看龍劍青
霄萬里心

和康礪峰泛西湖晚登萬松山

冠蓋洽清遊澄湖靜不流涵虛雙鏡合搖落萬
山秋磬發雲中寺鴻翔林外洲幸逢瀛島客共
上木蘭舟

聯轡轉龍從幽懷晚更濃頓超青巘上回望白

雲重友是今二益山猶古萬松興亡昔年事此
地惜遺蹤

碧溪

青山高萬壘百道瀉潺湲震澤爲歸壑若溪是
本源煙波依桂檝魚鳥娛芳尊試聽滄浪曲無
忘尼父言

宿湖上

卜築枕溪流空山夜更幽涼雲侵短榻明月照
高樓長嘯驚靈鶴忘機狎野鷗何方尋九鼎此

地即三丘

荆扉當麓厰迤邐接孤城門屏青山暮窓虛綠
水平長尊月下泛小艇鏡中行萬籟此俱寂南
天參已橫

保所山登眺得峯字

危磴凌千仞高臺俯萬峰晚霞籠寶所新月照
孤蹤葛嶺丹泉古蘇堤芳樹重還期乘白舫蕩
漾碧溶溶

杳靄人天境崔巍巾子峰下臨雙鏡合西望六

橋重幽尚聊時適仙蹤恨莫從南屏十里隔遮
莫度踈鍾

晚登松臺

青松挺雲幹蔭滿赤甃仰見月出海翻疑龍
吐珠城隅千樹暝水上一山孤欲去不盡意湖
邊問酒壚

落星石

隕石散星光纍纍巾子岡化遷天有意容納地
無疆射處渾疑虎鞭來定作羊欲因新雨後試

向覓金章

京師送呂梅東之金陵

一罷龍江宴頻瞻鍾阜雲握蘭憐夙契折柳念
離群澤國春帆遠燕臺落日分翻思舊遊處清
夢遠從君

春日南郊分得郊字

春水溢河橋春風拂柳稍一尊偕上客聯騎出
南郊寶樂丹青墜穹臺碧樹交歸心厭城市忽
憶舊衡茅

春日過姚令園

夙整東山屐因過陶令園
平臺孤嶼湧空谷五
雲屯嘉樹香浮醕春鶯靜對言
自憐簪組客暫得避塵喧

晚春直覺寺集

郭外春猶在花邊坐落暉
柳深鶯細細桑密鶯
飛飛映水搖金剝穿林挹翠微
徘徊香徑裏信馬得遲歸

送友歸杭

命服初承寵銓衡早辨才行辭
漢帝闕言返越王臺野竹開新徑
春山剪舊萊南中信多美歸思渺難裁

題竹山

吳山陰鬱處脩竹復蕤蕤
小築開三徑清陰滿四圍
有時聞鳳吹隨意坐魚磯
會得林中意生平願不違

挽錢母

素娥歸故魄靈婺返星精
桂閣空烟結萱堂夜

雨傾壺儀袞寵誥子教藉賢聲寂寞潛臺香萋
萋春草生

從軍曲

鐵騎遠從戎雲中望烈烽胡笳偏警夜漢馬不
能冬白草平堪藉黃沙壘作墉委身殉國難不
爲覓侯封

太白正高矚揮戈出酒泉霜天柰鞞豕枵腹厭
腥羶有幸從蒲類無謀獲左賢何人信神武勒
石在燕然

月湖

滿月淨娟娟平湖一鏡懸晚風清蕩影秋水碧
連天却理任公釣而浮范蠡船願言從所好塵
累莫相牽

省中白雲樓晚眺次陳玉泉韻

淒淒黃菊秋徙倚白雲樓山遠月乍吐天低星
共流鳳城通禁漏鴈陣入鄉愁爲軫同心念彌
令戀帝州

甲辰除夜

歲晚逼窮陰俄驚瑞節臨驅寒聞社鼓望曙列
朝簪經術慚民牧年華壯客心陶然耽栢酒不
爲滌塵襟

公庭對雪

同雲連廣野盡日舞崇花瑤砌迷靈鶴瓊枝點
暮鴉露條占 聖世盈尺慰農家自是回春意
沾濡未有涯

谷較弩臺次郭郡丞韻

今日招提境仍傳閱武臺炎劉應薄祚魏操亦

多才寶殿香煙合寒城鼓角哀追遊倦歸路霜
月逐人來

迎春次桐岡韻

和氣繞城闔芳辰物候新衣冠紛行溢歌舞雜
前陳勇力非吳俗嵒竄尚楚人有懷無與慰一
曲是陽春

送晏五秀才澄之

地以人文勝儒家世業優傳經窺聖奧挾策壯
皇猷別思天邊鴈鄉心江上舟相逢定何處花

發鳳池頭

半陽池

暘谷潛通氣寒山瀉沸泉石中聲似咽水上煖
浮烟澡德殷湯訓濯纓孺子篇靈源不可遡聊
復弄潺湲

過萬家山訪王喬洞

紛軋復龍從躋攀不可窮當蹊仙洞杳入谷幻
緣空玉種畬田碧丹遺石鼎紅冥探向深寂清
吹落雲中

巢縣道中

深秋行不縣省歛歷村村政簡逢迎少年登雞
犬繁霜黃踈柘影雲白遠山痕且共謀耕鑿征
徯不忍言

鳳陽恭謁

皇陵

山靈飛彩鳳地軸鎖盤龍寢殿雲霞滿周墉苔
蘚封千年餘王氣百世衍神宗來往瞻依處
衣冠儼肅雍

皇堂鐘磬裏薦享即生平少典開軒后居幽拓

鎬京禮崇天下養功等四時行讀罷穹碑製貽
謀仰 聖明

途逢立秋

煩劇薄專城驚鳥時不自寧江聲向晚急木葉見
秋零林有迴翔鳥池多點綴螢懷人不成寐坐
看啓明星

小憇香積寺

冶浦通香阜陰陰瑞霧間鐘鳴僧出寺苔破客
臨關坐久天人失緣空去住閒征夫莫相促門

外郎塵寰

舒城遇雨

行縣入舒城經秋暑未清谿雲林際合山雨隴
頭平鷗鷺飛相狎魚龍逝不驚村農莫愁思
蝮已東橫

石梁渡泛舟

輕舟隨逝水揚帆信北風山雄三輔會地扼九
州通秋半月逾白霜清林乍紅誰言倦行役翻
與賞心同

暮宿都管塘

駐馬村中館門臨百頃塘幾家烟火集一片水
雲鄉樹點班班色禾吹細細香夜涼渾不寐虛
牖月流光

壽春謝公祠

未識淮南勝今來登八八猶傳神禹蹟不見漢
王宮談咲胡沙淨勳晉室功薦蘋遺廟下千
古意相通

珍珠泉

有時幽興發盡日白雲阿仄徑捫蘿上名泉載
酒過蚌胎星彩散驪頷夜光多時出應無息投
人柰暗何

何處覓淵源幽亭石鑄邊山空泉響細珠散水
紋圓照月光逾迥含星影共聯從知久沈醺一
酌已醒然

題扇

逕轉山村曲江涵草樹低殘霞孤艇上落日小
橋西傲世看漁釣驚時有鳥啼悠然天宇外莫

是武陵溪

挽葉南湖

不見湖南隱誰開湖上尊雲霄餘劍氣門逕有
苔痕化鶴何年返明星此夜昏深秋風雨急落
木蔽高原

張會稽邀飲星宿閣

潘令盛賓筵幽人引興偏涼雲輕迤地空谷細
通泉樓閣層霄起星辰四壁懸心知在城市翻
憶到諸天

玉泉亭上次壁間韻

路轉雲爲蓋亭開石作門青天白鳥下碧水錦
鱗翻湖上芙蓉遶山中芳桂繁幽襟隨處洽况
有酒盈尊

明妃詞

一被椒庭選流光祗自憐素心明月鮮春恨落
花傳薄命悲顏色長門惜盡錢君王幸相顧不
復怨胡天

題畫

流雲紅葉岸零雨白蘋洲水淨魚龍見天空鴻
鴈秋微茫三島路飄泊五湖舟頓有乘桴意相
將學浪遊

吳門周臣作溪亭春曉圖景致幽曠筆法
妍潤展玩殊愛之漫賦一律書盛子扇頭
春水沒芳堤林端百嶂齊松筠渾遶舍桃李自
成蹊雲起知龍卧門閉無馬蹄非關厭軒冕心
遠得幽棲

野閒隱居

出郭尋高隱澄湖曲抱關廬邊和靖竹窓底富
春山採藥凌風去乘槎釣月還從知龍卧處亦
復傍人寰

湛泉贈詹廣文

別業烟霞裏流泉曲檻通雨餘珠散影月滿鏡
浮空映竹參差碧飛花澹蕩紅沾濡本無意草
木自爲功

借孫文揆訪沈紹興

悵別驚時變相將費遠尋行間詢舊跡見日慰

同心郡裏稽山迥城隅剡水深到來春事盡處
處挹清陰

訪沈紹興不遇

懷君一水隔來泛若耶楫不見會稽守空過安
道家五馬行邊遠雙魚到海賒越臺烟樹裏悵
望眇雲涯

過萬年寺值雨

爲訪飛仙跡來投竹院閒萬年經幾劫寶剎尚
青山喬樹深開徑鳴泉曲到關石梁風雨暗只

尺滯登攀

水簾洞

青山不可極來往翠薇中古洞時聞雨飛泉自
作風石林孤磬香烟寺小堂空此路多靈異仙
人何處逢

過德純官舍

公府非無事幽心欲避喧竹深開小徑花密隱
層軒江月邀朋好山鶯娛酒尊知君羈思少到
處即家園

都運新官舍淹留司馬郎著書搥彩筆抗疏薄
銅章吏散鳥鳴樹簾疎月到牀憐余久耽寂相
對兩形忘

贈石梁瓊上人

吾師飛錫杖遠自終南巔欲覓寒山穴來聽瀑
布泉焚香翻貝葉呪鉢吐青蓮靈境已忘世還
因叅上禪

新昌道中

登頓未云疲舟車總自宜尋泉時見鹿坐石忽

聞芝漁父能殮栗樵人解奕棋吾生奚後汝空
此憶幽期

荷香容閒閣爲楊道甫作
暫遣樊籠累聊娛林壑心素諳經世畧未是薄
朝簪山色臨書几泉聲入綺琴太玄何日就壯
志莫銷沉

錦組非身計滄洲蚤自還鳧鷖通郭外雲樹隔
橋山對酒客常滿忘機夢亦閑關心獨無柰詩
句未全慳

靈萱晚秀圖

東風發桃杏紅紫競先春獨有忘憂草翻宜大
火辰曲堂花散彩瑤砌葉垂茵霜雪侵凌盡芳
華歲歲新

方塘圖贈虞士賢

一徑樹千章孤亭十畝塘捲簾魚鳥影隱几芟
荷香取醉邀山簡怡情效辟疆非關避塵市桑
梓本吾鄉

奚囊蠹餘卷之五

奚囊蠹餘卷之六

五言律詩

送高光州南歸

日落燕山北帆飛潞水東一尊離思滿萬里客
心同豹隱氤氳裏龍蟠鬣隼中應憐倚閭望湖
海謝飄蓬

蓬飛春水邊垂楊帶野烟人歸結駟後思發拂

衣前馴鶴依君復燒丹學稚川此中多舊隱遲

爾賁林泉

行縣十首用楊侍御韻

大名

近郊初攬轡長堰轉迂迴
衛水浮梁渡沙丘背
郭臺炊烟連郡起
山色隔林來
聲教應先及
絃歌莫浪猜

內黃

古邑黃河內沙平
樹亦稠燒醮資白壤封
堰障洪流柳色依
輕蓋谿雲護曲輶
江湖猶滿地不忍
縱雙眸

濬縣

大伾神禹蹟今日水猶紅
沃土渾宜黍高城半倚
隴女崑青壁斷賢塚
綠蘿叢忽有林泉興
因之夢欲東

東明

式暮損城垣懷人姜照村
流風魯衛境巨浸水雲
門白叟呼童飲青垞
抱特蹲入疆逢候吏爲
報古東昏

清豐

東來瞻泰嶽南臨江瀆泉頓丘仍王氣繁水幾
千年羽檄愁何劇風波滂欲漣望中皆夏潦何
處有秋田

魏縣

官道騁飛輶障陰今再經霜林初綴紫秋草尚
餘青落鴈沙痕亂遊魚水氣腥爲憐逢歉歲不
憚歷荒垆

開州

澶水清堪濯洪洋高可梯當年交誓約此地擁

輪蹄漢將鳴刁斗胡兵避疾藜由來征戰地殘
壘暮雲低

滑縣

黎津通白馬村落隱茅柝城市烟雲際菑畬隴
樹巔漢堤龍作道唐井聖名泉莫遣驚烽燧衣
冠此地偏

南樂

樹轉馳沙徑孤城隔隴雲龍窠今不見昌樂古
來闡地潦無耕穫林踈渙鳥群憂心厭行役馬

首尚餘曛

長垣

畿南古蒲邑沃壤不愁貧難治今何易風醇俗
自親城闈森雉堞比屋耀魚鱗征調年來急恫
瘼柰切身

李于翔追送清源

漳水接清源寒林薄晚烟孤帆歸客意遠道故
人憐看劍風生匣持觴月在船飛鴻正南向尺
素數相傳

函谷道中

隄陘嶠函險盤旋更崛崎黃河行處遠紫氣望
中移獲牧投戈日鷄鳴出客時崩城與敗壁千
載使人悲

獲牧靈寶里名

路迷巖谷裏村舍傍山稀有日陰常合無風塵
自飛林踈周甸遠苔沒漢關非令尹今誰是青
牛望不歸

老子故宅

柱下辭朝隱西遊避世寰龍光初度洛瑞氣已

臨關大道元無我金丹豈駐顏玄玄一授簡直
訣在人間

過許尚書墓

高塚蒼厓半松篁夾道幽地靈開宅兆天寵賁
林丘密礪石中落條山河上浮勳名青史在簪
紱紹前脩

許中翰別業彭給舍同遊

性偏泉石好名勝得追攀花發桃林野雲低
號略山鏡中浮雀舫天上憶鸚班向晚同仙侶風

塵開笑顏

省郎新別業相國舊開基壘榭紛依岫孤亭迥
在池禽魚如有意花柳亦多私隔水聞吳詠停
盃繫遠思

自華山移蓮花小池中花開對酒漫賦

照日娟娟淨含風冉冉新葉輕搖翠羽花密映
頰鱗不見若耶女虛疑洛浦神分根自靈嶽標
格信無倫

官舍枕高岡南山對鬱蒼地偏人習靜政簡日

餘長泉引天池液花分玉井香醉來狂較甚烏
帽狎紅妝

織女詞

悵望頻經歲娛情屬此宵七襄雲作幔午夜鵲
填橋解珮歡逾舊支機恨未消殘星猶在戶天
路警言晨驪

琴鶴雙清

綺琴調白雪縞羽拂朱軒本自知非侶來娛梁
孝園秋林隨曳杖夜月共開尊悟得羲皇意悠

悠誰與論

雲樹懸思

靄靄孤雲黯亭亭萬木陰宮中窮睇望天際共
蕭森善積東平樂經傳河間心親恩與朋好同
是一沾襟

華陰行臺對月望西嶽作次宋侍御韻

踈樹暮烟輕岵堯山近城蓮花向晚碧桂魄麗
空明仙掌猶東握天河自北橫何當驟鹿去華
頂坐秋清

和孫侍御臺端晚步次韻

停驄耽眺聽飛藻
青巖阿月滿三秦
路水開九曲河出關
瞻闕近隔水望雲多
翻媿巴人和空聞白雪歌

風夕感懷

歲晚風聲烈霜林與雪濤
棲鳥隨木下叫鴈出雲高
世事看殘奕閒愁破濁醪
壯懷知漸減有夢到江臯

立春

時際貞元會陽回秦地寒
春風夜堂入臘雪曉山殘
折柏浮新醕栽花挿敝冠
鬢顏驚歲改引鏡避人看

智子學遠寄詩次韻奉答

大雅久離群交游罷論文
嵯峨瞻曉霽涇渭隔春雲
乍見驚衰鬢相將戀落暉
同心幾人在別後倍思君

地結重關險河迴九曲文
人烟低傍水雉堞上侵雲中
岳通佳氣西峯倒夕曛
登臨春正好着

履擬同君

來詩云欲縱登臨
日何人可共君

賀孔右使誕子

乍傳生玉樹喜劇漫題
慶世衍尼山澤人鍾華
岳祥鶴群開兆應鳳翻
看翱翔英物元非偶聞
啼信異常

清夜夢熊羆嘉辰弄掌珠
渥注龍是種丹穴鳳
爲雛在篋經堪授懸弧志
不孤遲余具湯餅莫
惜倒銀壺

登潼關山樓

欲覽三秦勝先登百尺樓
雲低依華頂水落見
河洲漢業衣冠盡唐墟
禾黍秋英雄不平氣風
吼象山頭

河出龍門駛山連華嶽雄
風塵關月暗搖落塞
雲空三省封疆會殊方
譯使通客心馳萬里渾
欲附鷓鴻

守歲

吳地家千里秦關歲再除
寒更催臘盡和氣襲
春初思逐梅花遠顏酡
柏葉餘年年慙建立默

默念居諸

元日

律轉三元日人逢道泰年辛盤皆客味椒醕是
春筵嘉樹含芳早鳴禽得氣先關中舊都會雨
露若爲偏

脩園會餞留別席上諸公得天字遊字

靈石嗽飛泉江雲澹遠天幽心一鳥喚春色萬
花然其適投閒趣翻驚餞別筵悠悠京洛路挾
策愧當年

宦拙厭遨遊時違國未酬樛材寧足任疲馬欲
何求脩竹山中社浮萍江上舟鄉心與朋好一
倍攬離憂

恩榮雙文壽詩

靈爽出衡湘氛氲集帝鄉累仁貽世遠娛壽及
時康萊絲仙郎戲褒章丹鳳將漢庭誇萬石今
昔共輝光

贈富陽桂令

於越論繁邑當津是富春榛蕪征戰地窶瘠

羅人城息河陰盜簾清顧令塵佇看登拜去烏
鵲擁車輪

孤山林處士

昔賢嘗避世棲遲湖水濱山孤雲共住市遠寺
為憐鶴報同心侶梅傳隔歲春祇今踈影下猶
憶看花人

途經謝憲使宅留欸尋別時謝方轉官二

子登科適還

論交餘十載萍水盡他鄉何意風塵路來登畫
錦堂霜臺新授鉞玉樹欵生光舉袂忽不見相
思仍渺茫

送王尉

客思秋來別那堪復送人青楓袍色潤黃菊綬
文新重器唐師德仙曹漢子真只今猶異績莫
謂等風塵

巴東道中

巴東百里道信馬踏江濱小隊投林麓孤亭宿
水雲市燈星共燦客帆語相聞後夜巫山月回

看楚屬分

夷陵渡江

一問夷陵渡渾忘鳥道中自疑生有翼忽漫上
凌空日日砢砢逕山山虎豹叢險難隨地有無
事畏川東

玉泉寺

路轉聞香霧遙知竹院深望山全隱樹入寺迥
依岑澗落飄晴雨鍾鳴散午陰頓令車馬客亦
有脫塵心

日下歲暮玉局觀隨諸寅長同遊

錦官城下路司馬舊題橋歲晏多休暇幽尋屏
市囂聽猿川月暗望鴈越江遙共是同袍友風
霜耻黑貂

叢霄新道館玉局古仙都出郭心先愜登臺景
復殊林端清磬落江上暮雲孤舉酒當歌吹狂
來識故吾

山勢西來遠溪流夾路迴霜空踈岸柳日煖靚
江梅綠蟻先春醖清歌向晚催去盡簪同萬里笑

口一時開

見梅

蜀國三冬暖江梅已著花溪橋停駟馬攀賞到
仙家白處飛爲雪紅邊聚作霞孤山凡幾樹吟
望隔天涯

覺林寺

日日紅塵裏迷途有覺林路幽蒼蘚合殿迥白
雲侵貪佛留僧飯思歸學鳥音艱危經欲徧祇
自不抽簪

送閩帥王君入賀萬壽

聖壽雍熙日嵩呼岳牧同孤帆巴子國萬舞大
明宮虜避燕支北鯨潛滄海東將軍信忠義莫
自念無功

捧表行經棧道

鷄關通鳳嶺峽裏澗尤深地僻稀人跡林空足
鳥音凝雲歆壁斷斜日半峰陰賴有平生興勞
勞無苦心

崖傾石欲摧樹蔭磴多苔風急虎聲厲月高猿

嘯哀井參天象別棧閣鬼工開自昔多羈旅無
端我亦來

盤空路已迷樹杪接天梯信步氣猶壯回看意
轉悽萬重穿紫柏百折繞青泥最是山深處陰
沉日易低

磋砢千仞外復上七盤關驟雨忽滿地霏烟初
下山啼猿愁莫度飛鳥倦知還飽歷危途客條
然意自閒

一步一瀕危危多心轉夷路從雲外落影任鳥
邊移王帛千秋使衣冠萬國時趨朝亦隨例
謂竊恩私

善繪事者作釣臺西湖海潮鴈蕩四圖皆
吾鄉佳景往時孫侍御斗城嘗招余入鴈
山未赴閱之感懷各系短章末致此意

爲憶投於越行瞻舊隱居臺空雲澹蕩秋晚木
蕭疎鼎繫綸竿上星占帝座餘掛帆潮正駛風
浪却慙予

十里重湖映千山曲抱城樓臺雲外影簫鼓月

中聲酒喚當壚婦朋呼出谷鶯分明圖畫裏自
棹小舟行

江盡遙連海東來白浪生雪移天際色雷撼地
中聲射弩功非偶浮鷗恨未平風波一過眼徒
有濟川情

時憶孫登語能傳鴈蕩竒峰連碧天淨泉與白
雲垂招隱勞朋舊追遊寄夢思浮生本無定莫
謂負心期

武關懷古

沛公初王漢此地失淮陰其是人中傑能勞月
下尋樊橋溪作限馬道石爲林不改當年舊懷
哉將相心

草涼樓

深峽開仍闢飛橋斷復連崔嵬千嶂下掩映一
樓懸長夏風生樹晴空雪噴泉客行方苦愠暫
解竹窻前

扶風吟

一入扶風境慙爲豪士吟擒王馳漠北射虎獵

山陰往歲平蠻績年來躍馬心明君終自念意
茲莫教侵

高陵公署次壁間韻

停驂清客心柏院暫登臨涇渭西來合嵯峨北
望陰壯懷餘短鬢感遇托微吟延佇青雲上應
慙萬里禽

題陳醫士長春圃

自昔仙人館今開大隱家碧生無意草香散有
名花奏曲馴魚躍飛觴狎鳥譁方春期數過幽

徑未云賒

寄槐亭

嘉樹本喬枝清姿照陸離襟期一以洽構結自
相宜適意林中鳥關心局上棋別來多鬱抱長
夏有餘思

呂克厚哀挽

信是康城夢仙遊歲在辰青山雙屐冷黃土一
坏新名秩身何有芳華世所珍日暉風雨暗延
佇欲沾巾

飲張中丞別業

本自耽幽興因君諧夙緣到門黃鳥喚印屐綠
苔穿坐語松陰轉開尊桂月圓無勞思別日霜
鬢兩堪憐

贈趙州許判官

我往投三晉君遊亦晉墟乍分雙闕袂同捧一
除書結駟王畿裏行春民事餘嗷嗷需牧養何
以慰閭閻

友泉

何物非吾與名泉自適情濟時分潤澤比德象
通明月映穿林色風傳激石聲塵途多溷溷莫
謂獨余清

芋原別游許二省長次韻

爲是同心好能憐去意遲壚頭沾臘味江上採
春枝物態已如此芳華湏及時蹉跎歲方晏延
望有餘思

津亭分袂促舟楫沂江遲柳引風生樹梅飄雪
滿枝素心徒徇祿華髮尚憂時寄謝平生友離

居幸見思

宿延祚寺

山迴初地湧遠梵落微微照月投林莽聞香款
竹扉無生真慧覺習定幻緣非明發披風露徒
嗟心願違

重經華陰

三峯俄在眼古邑暫經過猶說滄桑變相逢感
慨多潼津寒氣歛柳陌瑞烟和心賞不再得徒
令勞者歌

野寺贈王生

悠緬三秦路清和四月天駟車方息駕雙樹即
棲禪蚤擅金華譽時傳白雪篇風期知有托慕
府正籌邊

我本江東客欣逢江畔人投瓊非宿諾傾盖易
相親摘藻愁花鳥探竒薄漢秦咲彈長鋏去何
處有烟塵

偶過臬司學甫留酌

嘉樹翳華省中庭五月涼朋來乘暇豫興至引

壺觴厭俗玄襟洽論文藻思狂更聆吳苑曲不
道客咸陽

阜林別友

何處牽離緒飛帆風雨時踏歌慙李白杯酒謝
王維西望秦山杏東還湖水瀾有懷不得盡忽
忽意俱迷

竹溪

龍種分淇澳蕭蕭石谿輕陰含水淨細浪拂
枝低引興供深酌從人刻舊題秦川正羈思延

睇暮雲迷

金佛峽

金佛當年峽遙瞻山鬱森今經叢樹杪古道亂
流侵易識升沉理能忘險阻心勞勞倦遊地出
塞一長吟

問月亭

散步池亭上東來月一彎青天不可問綠酒自
怡顏影轉蕭疎樹光搖遠近山沙場有征戍莫
遣到榆關

贈唐司訓赴廬陽

蚤歲富珠璣青雲願屢違壯心餘劍佩薄祿眷
王畿鳴鐸春風滿談經甘雨霏不忘分虎地忽
復夢淮肥

以詩代書謝四兄寄鏡時爲周府教授

寶鏡金函護名香鏤作臺殷勤千里外塵埃一
時開絳帳橫經後梁園獻賦來相期同不淺莫
訝鬢毛衰

次韻荅沈鴻臚

詩篇推正始今復見雲卿錦字湖天遠塵心淮
海清尊鱸秋日思猿鶴故山情和靖廬邊社因
風憶友生

田節婦

昔我垂髫友猶懷田氏荆芳華悲蚤謝荼毒軫
幽情家有傳經子恩沾表里榮懸知歸化日不
負百年盟

贈馬隱君

晚歲樂玄脩名山每獨遊朝同雲出岫暮與月

登樓龍杖橫空去砂床取醉留悠悠塵壒外何
事亦何求

公署新荷

二月見新荷田田出水多久知成老態強起試
輕羅已射林箐隼還清海滢波感時憂思劇莫
遣易蹉跎

奚囊蠹餘卷之六

奚囊蠹餘卷之七

五言排律

蟠龍洞

何代生神物存身信許深繡崖懸洞口練瀑掛
峰陰繚以剗剗石封將松竹林飛騰餘化跡行
旅得幽尋列炬叅差見摳衣窈窕臨蓋浮香霧
綴榻響暗泉侵驚繞千年蝠迴翔五色禽筍根
穿突兀乳竇下浸淫漸覺諸天近渾疑萬象森
暫從消暑鬱輒有契冲襟媿以塵中駕而櫻世

外心終思蟠屈意亦是起爲霖

弘濟寺

危巖懸寶閣烟樹隔孤村只尺凌霄漢千尋瞰
水源海雲流淡影山雨散微痕谷靜春啼鳥潮
平畫鼓龜估帆來遠浦漁榜送歸輪戀賞欲忘
世棲遲投法門

鷺子磯

山上霏霏雨磯頭冉冉雲萬帆天際出雙島浪
中分寶閣神工建仙壇異代聞迴洲繁樹色激
石亂湍文屹立魚龍避差池燕燕群東南王業
在宜鎮此江濱

有懷王徵君元宗

洞房何窈窕深逕復逶迤直取書克棟偏將竹
作籬高談揮玉塵清賞對金卮幾下陳蕃榻時
臨逸少池如何千里隔尚負十年期遲子五雲
表連鑣騁九達

遊東山

江上問幽蹤東山一逕通烟濤孤島外樓閣翠

微中古洞薇香發清池屐齒空雲飛賢相塚月
落梵王宮勲業蒼生望文章奕世雄千年遺像
在彷彿見高風

登定州開元寺寶塔

十層天半塔卓錫自開元曲磴雲霞滿飛甍鳥
雀喧中山低接市盧水澹縈村超忽皆空境飯
依不二門風塵雙闕近漢達五兵屯徙倚成孤
嘯幽懷誰與論

張母挽詞

霜委北堂萱堂空殊可憐褒書猶未逮鼎養竟
難延就月雲霞窟駭鸞瀛海天途喧唯薤露山
靜有啼鶻舊德庭前訓新封湖土阡遺將五丹
桂永以慰重泉

送張憲使之河南

使君憐意氣古道見于今結誼膠投漆同心利
斷金憂時頻看劍對月共披襟標格珠懸照詞
章玉振音甲兵雄范略匡弼蘊周忱召命移
梁苑交親祖華陰冰霜開憲節草木動春林汴

水一千里關門百二岑因風思晤語何地更招
尋鳴鳥牽情易踈麻別緒深青雲應自致白髮
柰予侵幾望當津要能忘慰陸沉

送石右使之江西

行省移江右東南扼上游寒雲開峽谷春草徧
汀洲疆域雄吳楚輝光燦斗牛陽和無遠近惠
澤有歌謠意氣投艱外功名交秦秋希文同後
樂萬石是前脩綠蟻淹朋好青驪攬別愁持衡
缺新命旦晚下龍樓

哭亡兒

一自摧蘭玉徒然悔昨非生前恩遽絕身後願
俱違名盛人應忌才高代所稀文章寧不朽孤
獨竟何依歸思鴻先度悽心猿復啼亦知聚散
理無柰淚沾衣

贈別舅氏野翁

平生冰玉誼臨別自酸辛共是天涯客翻爲岐
路人經年思一見兩月到三秦蹊徑憂榛莽關
河惜滯淫日斜分袂處霜落授衣辰回首忽相

失微官恨此身

送使臣出海封琉球國王

夏至乘風候龍旂下海濱
片帆纔出澳積水已無垠
開國三山舊恩封詔使
新中郎初建節南粵故稱
臣去憶人瞻斗行逢日在
鶉禮先夷族順厚往睿情
仁異域儀刑重遙天雨露
均歸期小春月復此候通
津

題畫梅贈友

南國多芳樹梅花冠四時
靈山稱特秀庾嶺復爭竒
偃蹇虬龍幹參差冰玉姿
豈無桃李艷故與竹松期
比物懷良友留情是畫師
一從圖裏見何異月中窺
湖上林逋興江南陸凱思
春來遺尺素絕勝隴頭枝

梧鎮閱武

蒼梧秋獵處細柳漢家營
四望千峯障迴瞻百雉城
潦收江岸澗木落曙煙清
雲擁旌旗色風喧鼓角聲
虎罷皆振武猛獍亦輸情
無術慙三畧膚功藉五丘
投醪非責報授鉞柰專征
試把

剗犀刃聊殲鼓浪鯨

七言律詩

廷試即事

金鑰傳呼出禁城
銅龍乍啓五雲明
香飄合殿趨鵷列
樂奏鈞天協鳳鳴
溫詔正需匡世策
腐儒亦飫大官烹
漢庭敷對今誰似
擬效天人媿未成

讀五倫書有述應制

聖主乘乾惜寸陰
石渠經籍娛宸襟
五倫時閱唐虞典
一敬同符堯舜心
已沛江河通要道
更輝星斗寄高吟
賡歌黍竊夔龍後
愧乏雄詞動士林

日暮

旅館無聊自掩扉
踈櫺新月坐依依
誰家鼓吹隨風入
小徑車塵向晚稀
作字無竒慙敝篋
病心方渴憶初衣
萬年枝上珍禽滿
獨鶴西飛何處歸

新江閱戰艦次松谿韻

颯颯西風薄霧收晴光遙映五城樓隄喧鼓吹
黃龍舳舻樹隱旌旗白鷺洲六代繁華遺事杳兩
朝勲業故宮秋貽謀尚習昆明戰萬里無波江
自流

送蔣石庵司空

東吳自昔擅鄉評誰復維揚循吏名白簡星臨
南國頌黑貂風振北臺聲素絲到處傳清節盡
省由來仗老成江上飛蓬瞻不極三台高擁五
雲明

王廷尉擢少司徒贈別

心頭城下晚風清潮落秦淮盡舫行悵別無由
紆繾綣懷人空復念瑤瓊釋之德已孚廷尉平
叔才堪貳地卿此日度支方告置誕章何以荅
承明

省居

清脩曾是淪幽寂人境由來可避喧山擁蟠龍
依秀色水通朱雀是靈源守玄自擬楊雄閣抱
甕誰同漢叟園九鼎三元應頓悟草堂白晝坐

忘言

至日齋居次葛墩韻

水部清齋三宿同，八能調律代天工。
段灰已見陽爻復，荔挺先將春信通。
地近紫庭宮漏永，月涵畫省篆煙籠。
遙瞻北極依南斗，搔首風前雙鬢蓬。

登報恩寺塔借梅東居麓午山

南陵何處堪乘興，絳宇琳臺愜浪遊。
危磴九層臨絕巘，飛甍千仞出長楸。
洞門高度秋聲壯，天

未遙看江水流，便覺六塵消釋盡。
爲借三盃故淹留。

送周雙林

江城木落風露清，秦淮倒激海濤驚。
試陵高阜望丹闕，愁見方舟曳彩旌。
水寒澤國歲將晏，花發上林春正晴。
覽勝懸知有新句，遙遙天際歸鴻聲。

湖上偶成

明湖一別遠江天，望入雙峯興已偏。
病足未妨

攀鬱嶮幽懷自合傍雲烟松陰滿地懸斜日雪
霽空山響細泉安得水邊三畝宅門前垂柳繫
漁船

登飛來峯

長松十里晝陰重引入飛來第一峯洞裏紫霞
明日月天邊青靄插芙蓉小橋不斷橫溪路古
寺猶聞隔樹鐘戀賞頓忘城市遠歸途幾處暮
雲封

泛湖次韻

重湖曉日淡春烟萬頃平連浩蕩天擬放蘭舟
沿曲港行投竹院俯危巔綠陰密隱新鶯嫩紅
雨飛沾細草妍處處青帘村釀熟已拚沉醉藉
花眠

丹陽道中

西湖漫擬恣春遊南國仍浮萍水舟千里煙雲
延迥眺孤村風雨攬離憂香隨去馬花全落浪
閃前旌麥向秋何處妻清三弄笛殘霞樹杪映
山樓

句容道中

日落丹崖倚桂橈，星軺忽是轉蘭皋。空山縱馬
無荆棘，岐路聞鶯有鬱陶。紫闕聯雲搖鳳影，清
溪流水和松濤。芳菲欲盡春多少，驅逐年年感
二毛。

西行次潘生

雲開遙望石頭城，虎踞龍蟠擁舊京。落日千山
新雨霽，春帆一片晚潮生。才非何遜淹將作，功
之平當愧水衡。十載爲郎虛舊社，相逢空自說

勲名

玄真觀葛墩見過

中和橋下水濺濺，玄真觀裏春可憐。斷腸柳色
青始足，照眼花枝紅欲然。羽客殷勤識玄度，仙
槎飄忽訝張騫。忘年更遇王摩詰，衆妙門中有
宿緣。

送魏郡守致仕還山西

茗溪新綠泛歸舟，故國迢迢汾水流。榮祿不堪
淹五馬，丰神自昔卜三丘。一隨玄豹冥濛隱，萬

里飛鴻汗漫遊風雨滿帆君莫訝山川猶爾解
相留

紫雲洞

梯雲躡水費攀躋萬仞斜懸石壁危貝闕銀宮
飛掩映紫芝玉髓照參差中天鶴唳開丹室子
夜龍光發劔池此地分明隔塵世何人方外覓
希夷

送張順之司訓全椒

吳地新涼生七月江天落照引雙旌如何白首

淹經畧猶自青氈吟宦情滁水香芹賒月色瑯
山仙桂散秋榮風雲夙抱今何似試聽錚錚寶
劔鳴

贈王少府守泗州

白蘋紅樹慘霜辰離思經秋倍損神泗水兒童
迎使節吳山風雨泥征輪懸知去後思何武爲
惜無緣借寇恂莫遣私懷重鄉邑江南江北總
斯民

冬日玉泉席上鏤銀杏作蠟梅花分韻得

安字

華堂良宴恣情歡素果雕花取醉看浪喜寄春
逢驛使虛疑先煖是長安氤氳蠟色和尊泛宛
轉丹心入夜寒試把一枝登上苑紛紛剪綵不
堪觀

一隅爲張文憲作楚人也

蜀國長辭供奉班城隅深掩薜蘿關林中曲引
沅湘水窓裏平臨岫嶺山白雪吟成江鶴唳滄
州情狎野鷗閒猶聞此地連星漢看爾乘槎牛

斗還

壽顧母

秘書甲第五雲邊長夏氤氳生瑞烟青鳥早傳
西姥信班鱗重薦北堂鮮恩逢錫類天題濕
善積傳家惠澤偏賸有芝蘭堪種德又移松檜
擬齊年

天長道中次壁間韻

氤氳宿霧引星旄烈烈雄風攬客袍何處烏鳶
勞隼擊專城操宰媿牛刀林中望氣知豐鎬水

上聞聲見桔槔總是 高皇根本地雍熙民物
荷鈞陶

烏江謁霸王祠

野雲飛盡楚江頭萬木森森蔽古丘廟貌于今
猶叱咤英雄自昔恨鴻溝陰銷霸氣非亡范天
啓弘圖故屬劉興廢本來成幻迹青山黃土摠
悠悠

贈吳蘇原

百萬澄湖芳草墩扁舟久矣薄朱軒大玄草就

書連屋彭澤歸來柳在門賸有尊鱸供玉俎無
勞絲竹倚金尊也知夙繫蒼生望不道成功勝
立言

早春郊行東晏石橋僚友

郊原暫試行春騎野色平分出郭橋南陌柳條
黃露杪東風麥壠綠舒苗蜀山隱隱朋心切泗
水悠悠客路遙寄語高情晏平仲一尊遲爾醉
花朝

暮春高井晚行

春來常日惜花飛馬上驚看綠已齊草裏鳴泉
新雨後林中歸鳥夕陽西柘皋月出鐘初靜濡
塢雲深路不迷自喜民淳安拙政何妨輪蓋數
沾泥

壘前韻答吳蘇原兼乞題卷

森森平湖綠遶墩陰陰花柳蔽高軒幽心自愛
濡湏塢壯歲歸從金馬門夜月玄真棠木檝秋
風元亮菊花尊定知有出流金石塵吏猶能乞

贈言

遊蜀山次聯泉韻

宵雨能將溽暑收暫祛簿領試清遊孤峯插漢
青如削一徑穿林曲更幽行處千家田漠漠坐
忘雙樹思悠悠却慚身世猶機事纓冕那堪狎
野鷗

郡城西接蜀山頭夏木千章蒼翠浮蜃起南巢
疑貝闕水環神姥即青丘勝遊不負三年約塵
事聊從一醉休旋闢荆榛攀絕頂望中雲日迥
關愁

舟中感懷

幾從期會戀重遊
淮甸孤帆及早秋
積雨平湖侵遠岸
暮蟬衰柳滿滄洲
廣陵城下隋宮杳
漂母祠前楚水流
風景依依思無限
夜深涼月送歸舟

晚投龍城寺

晚煙低護林中寺
微月初臨陌上旌
千頃平田圍法界
一灣流水入龍城
疎鐘聲裏僧相逐
小隊行邊犬不驚
咲倩山家問生計
漫誇耕耨得

秋成

中秋值雨

領郡何方散積憂
擬邀白月注黃流
霏微轉覺增蕭颯
河漢無緣望斗牛
雲裏蟾蜍應不滅
天邊蠓蝨竟誰收
從知顯晦非人意
空憶當年庾亮樓

高郵道中感懷

遠天秋水共蒼茫
地憶頻遊侶故鄉
近海人煙隨草沒
信風帆影帶雲揚
農家網罟鮮爲食
女

伴提攜芟作裳旱澇年年唯感慨一聲新鴈落
寒塘

自盱眙山晚投火橋鎮

山程盡日遶嶙峋山下孤村半水湮投止乍驚
籬犬吠如歸莫得野人嗔潮侵古道迷行騎禾
沒平畦隱釣綸滄海桑田等閒事憐予亦自久
沈淪

秋行懷郭桐岡

隔歲不逢梁苑客時驚蕭颯倍離思廬江水冷
楓全落衡岳雲深鴈較遲摩詰遺情唯妙墨休
文多病廢新詩應同禹服趨周典攜手龍墀定
有期

寄王上舍方泉時聞新誕子兼以爲賀

崔巍泰岳接崑崙東出安陵佳氣屯人習詩書
爲世業家貽忠孝答君恩神駒渥水靈先毓
雛鳳丹山羽乍騫里閭由來誇閭閻不須更爲
作高門

奚囊蠹餘卷之七

奚囊蠹餘卷之八

七言律詩

客瓜州江樓

高閣瀕流四望開
魚龍噴雪自東來
風帆欲送千山雨
鼉鼓驚聞十月雷
歲晚江鄉人事絕
天空雲樹客心摧
還將愁眼窺三尺
猶有晶晶燭上台

十日江干遇亦奇
萍踪飄泊本難期
海門潮落龍游淺
鄉國雲遮鴈度遲
多病著書成底事
登

樓作賦更堪悲三峰只尺風濤外擬上輕舸縱
所之

登金山

長江浩浩接滄溟砥柱中流擁地靈風捲夜潮
千丈白曉涵晴曙一峯青中泠汲水僧遺鉢古
洞尋仙雲滿巖塵世浮沉何足問纔登彼岸已
遺形

頻過江上望龍游忽漫乘風散暮愁金鰲倒吸
水不斷銀漢斜傾石欲流雲樹高低天上下帆
檣隱見地沉浮三吳只隔煙濤外徙倚重登絕
巘樓

次韻答王箕泉

芝房荷沼重登臨入座如聞太古音蔭滿綠槐
迂反徑聲傳黃鳥恰芳林三秋雲樹他鄉夢廿
載金蘭此日心投贈未將桃李意瓊瑤翻愧郢
中吟

移山潭次壁間韻

逶迤石徑遶林垆迴合峯巒面面青地劈半山

當四塞天開一鏡引孤亭長安日遠紅塵靜少
華風微翠靄停獨往自憐幽興劇何人先此載
春醺

送程于民南還次來韻

十載還家未是遲鏡中霜鬢欲絲絲青山舊社
林逋宅白馬新鑄杜預碑野水帆檣風自穩故
園松菊晚偏宜秋來亦有萸鱸思三徑憑君蚤
見期

白水公署次壁間韻

泠泠白水舊彭衙粉堞山樓仄徑賒蒼頡塚荒
惟鳥跡雷公丹化憶仙家西來羽檄驚霜月南
望鄉心逐晚霞涼夜有懷渾不寐柏臺曙色喚
棲鴉

青柯坪

華山谷口晝陰陰危磴盤空草樹深倚杖何緣
攀鶴馭尋泉時忽聽龍吟炊煙縹緲雲連郭仙
路高寒風滿林緩步三台依石室翛然悟得子
微心

雲臺觀

雲臺直上接三峯古柏森森夾路濃碧殿晴分
華頂色飛泉曲度水簾淙鳳蕭遠引清虛裏鹿
駕渾疑幻眇逢日落輕陰生洞口青山回首失
歸蹤

次韻答彭孔加

驅馳魏博復秦疆百二山河控晉陽猶憶澶淵
虛鎖鑰頻過馮翊媿循良百年道誼心期舊千
里蘭言尺素香便欲歸來尋舊侶五湖鷗鷺共

飛翔

萍跡浮沉三十秋衰遲却憶少年游空山夜雨
同僧室野水烟雲放釣舟皎皎白駒終自音嚶
嚶黃鳥故相求海波未息鯨鯢在避地今棲何
處洲

九日河中書院讌集次宋侍御韻

西風搖落已堪哀更上天涯百尺臺歲序自驚
黃菊候淹留不厭白衣來三河遠接秦關險二
華平分晉甸開盡日登臨未能賦叨陪直忝大

夫才

萬固寺

首陽西下見河流萬固禪林山際幽飛澗遠從
秋殿落野雲低接暮煙浮塵中幻跡渾無定方
外心期且自留徙倚遙空聞過鴈蛾眉新月照
人愁

華州值雪

山城飛雪凜生寒客思悠悠怯歲殘花滿踈林
凝瑞色漸流巨壑壅驚湍敝裘不厭尊中酒短

髮猶彈陌上冠却憶故園梅正發何因寄向隴
頭看

冬日登華山

三峯壁立與天齊雪滿空山信步躋玉井吐花
明碧漢石門飛瀑洒丹梯近人猿鶴調絲竹出
岫烟霞擁杖藜擬向仙靈問真訣珠幢絳節望
中迷

路入青柯挹紫氛西玄深處覓裴君從知軒冕
非身計已覺仙凡此地分峪裏寒光生積雪林

端清吹住流雲持觴正對龍潭月山郭踈鐘不
柰聞

莎蘿坪

蘿繞巉岫莎映川寒山蒼翠晚猶鮮黃雲影落
三河水青靄光搖十丈蓮御道草荒餘漢跡宮
娥仙化憶秦年紅顏羽翰尋常有醉把金盃漫
自憐

潼關閱武

較武來登大將壇請纓已覺媿衰顏貔貅隊擁

風塵裏鷹隼心飛霄漢間鼓角喧嘶秦士馬旌
旗披拂晉河山九邊烽火三秋急細柳何時金
甲閑

歲暮述懷

閒庭退食獨躡蹻雨雪霏霏逼歲除江海烽煙
遮故國關河魚鴈滯鄉書病餘引鏡顏非舊愁
裏開尊意未舒自是無心戀榮祿不因官拙憶
吾廬

玉陽山房

虬鼉峽裏望逾深一徑平分萬竹林雲護丹爐
春自煖山圍草閣晝常陰池邊淬劍沾龍沫洞
裏吹簫協鳳音信有仙靈會人意故開巖壑寄
幽心

玉女潭次劉參伯韻

選勝言尋方外蹤迢遙石逕隱杉松清秋峽裏
仙槎渡夜月樓中帝女逢風動水紋通絕壑雲
連樹色擁危峰飛騰應藉神靈境面壁他年倘
見容

眉山贈孫醫士

蛾眉影轉鬱蒼蒼見說仙人構草堂夜雨青苔
生石磴秋風黃葉到山床薜衣常帶煙雲氣蔬
食能兼藥餌香鴻術本來堪濟世非關思邈舊
遺方

壽慎軒叔

吳峯北轉漸夷延湖水平臨嘉樹軒盛世衣冠
閒歲月四時花鳥媚林園西池早薦千年實北
海長傾眉壽尊五色雲中望南極祥光高映少

微垣

孫文揆同登越王臺

越臺脩從費躋攀隱隱峰巒臺下環烟火萬家
城郭繞畚田千頃水雲間林端佳氣東連海郡
裏高齋半在山爲憶霸圖勞夢寐壯心聊與共
怡顏

宜松

徂徠分植地偏宜高蓋亭亭貫四時春入詎同
桃李色歲寒無柰雪霜姿採苓磻底開靈窟放

鶴山中識舊枝何用還丹尋秘術伏脂侏實並
仙資

南明寺宋尹同遊

南明仙梵隔山聞石棧逶迤雙澗分巖洞何年
開色相花宮鎮日坐烟雲松篁古峽啣新月燈
火孤城帶夕曛莫恠淹留勞地主下方塵幻正
紛紛

沈明府邀飲戒珠寺

爲政心閑興亦賒招尋遙指石林斜涅槃空訝

牟尼像題扇猶傳逸少家
貝闕未忘同劍佩
山城共是惜年華
深杯莫厭留殘月
明發離懷江上沙

秋夜子 賜宅讌集得秋字

江城新月照清秋
結客聊爲長夜遊
玉漏聲中聞鴈過
丹楓影裏見螢流
彈棋奏曲涼飈入
清酒沾衣湛露留
萍跡自慚猶宦海
鷗盟何日共滄洲

夜渡揚子江次汪生韻

寒江渺渺暮烟橫
簫鼓喧喧戒遠征
出浦帆飛風亦起
中流潮湧月初明
漁燈遠引鼃鼃見
梵宇遙連島嶼平
自媿機心尚塵網
強將身比海鷗輕

蕙坡贈馬封君

九畹幽香聞楚澤
尤憐芳蕙在山阿
參差翠葉牽風細
灼爍丹心向日多
杖屨常迷花密處
琴尊不厭客頻過
野梅籬菊猶搖落
得似青青百畝坡

九日邀仲良童侍御登演武臺次韻

佳節重逢菊正開朋來邂逅一登臺孤城水引
漳淇遶千騎雲屯燕趙材南國尊鱸秋入思西
山鼓角晚生哀明年此日知何處待月非緣戀
酒杯

兩峯高映水中洲昔我相尋洲上樓黃菊紫萸
堪採摘沙鷗野鶴共悠悠虎符畿甸耽幽思驄
馬長安憶舊遊同在異鄉君又別廟堂遲爾壯
皇猷

九日偕僚友登上達樓作

郡庭無地遠紛譁一上高樓四望賒檻外丹楓
凡幾樹籬邊黃菊已三花著書衡岳非江總落
帽龍山想孟嘉暫遣殷憂忘局束莫將尊酒問
天涯

子孟憲使讌集紫陽山晚眺次韻

朱欄絳閣白雲邊蘿磴盤紆接洞天山外江明
涵夜月城隅樹暝薄炊烟曠懷夙有探竒癖勝
賞慙同命世賢擬請塵緣希靜悟石壇遺蛻訪

飛仙

巨石園亭讌集次孟君韻

寶石西來秀色繁到門烟水是湖源倚山亭樹
圖書滿入座芳菲風日暄張具每勞騎從過彈
絃時雜鳥聲喧投瓊忽枉陽春曲爲憶霜臺王
樹温

贈馮憲使晉叔入楚得餘字

登高凝望共躊躇尊酒仍留把袂餘踈樹影搖
楓落後遠天聲送鴈來初胥江月白浮蘭舸楚

澤秋清照鷺車定有鴻勳副 當宁不勞魚素
慰離居

贈殷醫士冠帶

名山採藥市闌居却訝城中兒女知豈有聲華
聞魏闕謾勞冠冕賁江涯禁方早出長桑授秦
俗時從稚子醫更習玄文探衆妙擬排塵累托
師資

赴丁徵君招次青門韻

操舟北郭見朝暾倚棹西林暮色昏家起垣薇

傳舊閨庭開叢桂識芳村何因誤下陳蕃榻乘
興來過安道門咲語不知寒漏永管絃燈火夜
堂温

丁孝芳宅讌集次沈隱君韻

畫棟朱簾瞰綠波故家喬木上籐羅乍驚越客
懸河論暫醉吳兒子夜歌世路浮沉何足問舊
游零落已無多良宵樂事應同惜斜月西軒容
易過

送許叅伯赴京得遊字時予將入蜀

使旌二月覲龍樓余向三巴鳥道愆岸草津花
迷遠望巫山巫峽記曾遊中朝耆舊多同學藝
苑芳華信莫儔此去盛明良得遇題書先慰錦
江頭

巴東見王叅伯題壁詩次韻寄懷

仄徑盤迴崖半開行邊燈火見樓臺緣江雲樹
楚天盡下峽風濤巴水來已歷危途猶信步欲
忘時事但持盃故人應是傷遲暮我亦霜華入
鬢催

昔蘇子由再寫真記容貌之變題詩見意
予三十出守時京師李生爲寫一幅今年
以按察副使入賀復遇李生因命再寫相
隔十餘年容貌之變可知矣偶同蘇事用

韻漫題

再度生綃點畫新妍媸何似昔年身易凋容鬢
星霜改不涅風塵意氣真曠目定憎櫻俗累冥
心聊自葆元神咲看信是無魁岸那得聲華動
世人

表賀得與宴賞恭述

瑤函親捧建章宮拜舞繽紛望六龍曙色漸移
三殿上爐煙不散五雲中大官錫宴賓儀肅內
鏗傳頌帝澤濃自幸衰遲猶在列君門今有
姓名通

重經咸陽述懷

西來萬里見南山東望三三峯縹緲間往事祇今
同水逝舊遊別後幾人還機心遠憶沙邊侶倦
翼仍趨天上班猶自節旄稱漢使不因零落媿

秦關

元日蜀府慶賀

重城曙色靄陽和，身曳長裾習委蛇。
碧殿王孫天保頌，素絲藩采萬年歌。
春先蜀國梅風煖，禮洽梁園柏酒醅。
遷客獨慚頭漸白，九霄雙闕想鳴珂。

訪張中丞里第賦贈

梁園一別願多違，節鉞何年塞上歸。
楚壁隋珠空按劍，青山白社自扃扉。
曾驅貔虎摧堅陣，暫解韜鈴狎舞衣。
聞道天驕問司馬，丹青遮莫到漁磯。

秋夕獲鹿公署書懷

麗譙鍾鼓送黃昏，市罷山城夜不喧。
鴻鴈西風鳴客枕，芙蓉秋水憶家園。
喜逢皇極標金殿，更息邊烽敞玉門。
起視星河搔短鬢，紫微光映五雲繁。

聞義四兄分教松滋寄贈

荆南博士領新除，白首青氈計未踈。
匡鼎說詩

猶拓落張顛妙墨近何如蜚聲共惜行分鴈彈
鋏今知食有魚擬效場師養梧櫛莫因松菊戀
鄉廬

何中丞荷亭次韻

炎涼何地迥難同暫避喧囂草樹叢檻外池光
侵簾綠掌中花氣溢杯紅林扉影落西山月絃
管聲傳別院風莫訝荒蕪稀結構不將人巧奪
天工

固原道中

仗節橫戈值素秋縱金伐鼓震邊州烽煙慘淡
通沙漠山郭威夷見戍樓榆塞雄風嘶漢馬蕭
關新月照吳鈎書生夙抱平胡志帟幄今慙運
一籌

大佛寺

涇河曲裏轉崔嵬巖洞陰陰水上開地湧十尋
雲外影身遺三世石爲胎然燈自照禪心寂聞
梵翻驚妄念回爲祝西方皆樂國清秋風淨息
氛埃

和許使相祈穀陪祀值雪

禁城飛雪媚春光應瑞先占百穀穰玉槭叅差
迷輦道璧門照耀引宮廊輕沾委珮暉暉潤暗
逐爐烟點點香始覺高寒依北極鳳池鷓鴣忝
班行

次韻答鄧元學

白鹿幽棲夙有聞玉堂賡和更超群結廬擬效
孤山隱理釣還期渭水勳吳苑天高江漠漠淮
壘秋晚月紛紛懸知不減冲霄氣肯向雙峯老

一雲

大梁別張憲使次韻

炎日炎方萬里行祗將萍梗嘆浮生華烽燈火
成前事梁苑殷勤是舊盟局趣塵途慚老馬翺
翔雲路聽遷鶯清尊不惜臨岐醉回首茫茫空
復情

姑孰舟中

蘆荻風生五月秋解鞍暫試水鄉遊珠簾畫舫
蛟龍窟逐客歸心杜若洲多難擬將身避世老

懷猶有劔冲牛年求悟得浮漚意一任江湖深
淺流

次韻寄謝周諫議

淮甸兵戈暫解符銅魚再綰鎮蒼梧王師未報
滄溟捷郡國空聞憔悴蘇老去青雲驚入夢憂
添白髮信無謨久拚初服調猿鶴猶自戎衣聽
鷓鴣

奚囊蠹餘卷之八

奚囊蠹餘卷之九

五言絕句

剡溪曲

方舟廻曲渚樹草蔽前津忽漫聞鷄犬何年避
世人

百折桃花水水湧沙亦流猿啼千樹暝清冷四
月秋

長年習水程遙指遠林際到來烟霧迷不是人
間世

題畫

杖履芳菲逕琴書薜荔關空聞能避世此地亦
人間

黃鳥綠陰中鳧鷖點碧空正歡新釀熟窓底落
飛蓬

倚石復瀕流村深事事幽開門驚客至掃盡一

庭秋

雪色瓊林映梅風素幔開詩成有餘興春自隔
溪來

挽江處士

市闌今寂寞松檜掩泉臺萬事隨花落千年化

鶴來

題畫

紅樹散秋陰空山野水深焚香消白晝飛鳥寄

遐心

周墓六景爲用之作

越臺春色

千仞越王臺蒼蒼露林杪春風杜鵑花鶯聲出

華表

葉塢秋聲

爽籟振丹楓空谷散清響
昔賢有遺芳茲山高可仰

高峯拱秀

天目走神龍危峯矗湖涘
蒼葭映潛臺陰陰瑞烟裏

雙石呈清

群山開翠障雙石峙青螺
一自開靈窟千秋迥

不磨

石膏斲雪

鬼工剗石竇和氣結瓊脂
何異陰山雪凝寒無四時

陳洞脩真

斷崖蒼鮮合古洞白雲封
希夷有真訣此地憶仙踪

日暮

九陌靜飛塵上林群動息
鷓鴣何啾啾一枝棲

未得

題畫

朱實薦瓊枝文禽表佳瑞寧知造化心丹青得
先寄

見歸鴈

塞北家仍在江南路幾千羈人曾似爾花草見

新年

植花

白日東方來隆景觸花杪陡然搖清風柔含舞

晴曉

綠葉日萋萋蒼枝風嫋嫋香散競遊蜂林踈不
棲鳥

題畫

叢林春色滿列岫曉烟浮路入雲中斷山居雲
外頭

隱鬱藏踈雨清泠漾淺波度橋城市隔入谷水
雲多

澄江幾萬里清秋素練開一靚飛帆落渾疑天

上來

北風摧萬木窮陰雪霰濃亭亭色不變惟有大

夫松

宮詞

明鏡照芳顏纖腰怯華飾不洽魚水歡自憐嬌
艷色

當年傾上國六宮多見妬長門恩幸踈無人惜

衰暮

朝從五柞遊暮入長楊宿柞枝心未舒柳葉眉

先覺

題畫

終南列翠屏招提族雲樹溪橋引杖藜莫是來

玄度

日麗五雲表下照信無垠高岡一鳴羽聲亦徹

蒼旻

田家嘆

禾實苦秋霖浪喧隄不葺雲沉水底黃腰鑣隴

頭立

雨侵禾不登水深魚自長
耰鋤妨我生賣絲還結網

題石橋石田

溪上談經閣閣下臨石梁
虹飛貫牛斗燦燦騰輝光

磷磷水邊石青青畦中秧
觀生有深悟秋成未可量

題畫

踈樹攬秋風浮舟漾碧空
本無垂釣意長嘯送

飛鴻

萬木散秋陰一江分曉色
有琴不忍彈同心苦相憶

盛瑩八景爲盛司徒作

鳳石朝陽

炎精孕丹穴翩翩披五采
化石鎮東方正當日出海

獅崖慕雪

懸崖俯群峯雪華蔽蒼翠
何異神虬蹲百邪不

得肆

古井甘泉

石欄迴古甃瓦甕汲寒漿莫以其先竭人間惠
澤長

仙橋活水

潺湲山下水水上架飛虹寄語山翁道仙源此
處通

虎跑靈跡
雷獸留竒跡玄泉迸石罅往昔飛僊人于焉托

蟬化

兔河風帆

森沉迷草徑肅穆闕苔宮別有青冥路帆檣烟
霧中

萬家煙樹

高丘接層巘日落風淒淒回看春樹裏萬井暮
烟低

九華雲峰

合沓九華峰蒼蒼插天表倒影落潛臺青霞結

林杪

題畫

梅護逋仙館
桃開蘇子隄
芳菲行處是何必
小橋西
湖上夏涼多
微風揚素波
流連煙樹裏
何處採蓮歌

木葉下紛紛
蒼山冑白雲
坐深風景換
流水蕩斜曛

密雪颺寒輝
孤村白板扉
詩腸正枯結
抱甕小

童歸

奚囊蠹餘卷之九

奚囊蠹餘卷之十
七言絕句

出塞十首

涇原北望塞門秋
漠漠沙塵暗
戍樓羽檄不來
羶帳遠前軍
夜獵海西頭

套裏強酋誰著稱
秋高月滿盡驕騰
天弧正射貪狼首
已報中霄走吉能

邊城夜月聽胡笳
戍卒寒眠萬里沙
征馬驕嘶飛將出
晶晶劍甲凜霜花

被甲鞬鞞控驍驍霓旌羽毒奮干將分麾白道
蕭關下何處飛來赤白囊知萬里少孤馬
賀蘭山下騎如雲接地風塵慘不分戢策聲隨
征鴈過烏氏獨夜夢中聞蕭關下何處飛來
已散胡群赤木灣秦雲漢月滿關山翩翩羽騎
歡聲近帳下偏裨校獵還
胡兒控馬復鞭駝虎視應耽禾黍多霹靂聲隨
天將下盡驅渾脫渡西河

車騎將軍出朔方合圍正值右賢王犬羊夜潰

驚烏盤鹵獲朝來獻白狼

樓蘭邀濮未成擒已見渾邪拜潔陰 聖主威

加漢元狩無勞衛霍快雄心

時有降胡授官

黃鬚燕頰並超群試拂昆吾動斗文自媿書生
非一范聊將肝膽誓三軍

題畫

為憶西湖深復深蒼山迴合樹陰陰落花點地
穠於錦坐對飛泉抱膝吟

蒼松碧梧高十尋千岩萬壑澹晴陰偶來避暑

長林下賸有清風披素襟
日日風塵攬敝裘蕭蕭霜鬢縮閑愁忘機羨爾
山中老倦倚耰鋤看水流
朔風烈烈雲隨馬瑞雪紛紛花撲衣已壓游塵
清玉宇更交新月映寒輝

華山逢道者

尋仙時上望仙臺十載玄關扣不開今日初成
親授訣靜看離坎結嬰孩

何須辟穀飯胡麻笑向天池弄藕花旋製錦囊
盛栢露更鞭白鹿駕雲車

和茗山途中歌江南柳詞戲成口號

絲絲新綠褪輕黃披拂春陰官道長馬上同聲
歌折柳好隨風絮到江鄉

紅杏花殘柳欲飛天涯無日不思歸道傍亦有
芳菲處何似蘇堤襯馬蹄

題畫

野鼠參差競拾芳也知金粟自天香從教飫却
飛仙餌不向空山三吐腸

雨夜

江南二月花如雨
薊北三春雨作花
深夜一聲思渚鴈
隔林無數競棲鴉

積雨凝陰二月寒
長宵寂寂坐來殘
獨醒應有張平子
賦得閒愁祇自看

四時宮詞

淺紅深紫鬪芳辰
隊隊歡呼放賞春
誰向後庭辭帝輦
可憐含涕貯清塵

積草池中競採蓮
夜深烽火照甘泉
鸞輿只隔池亭外
何處歌聲落九天

貪看牛女坐開襟
斜月猶穿七孔鍼
紫殿玉牀雲帳合
昭陽惟有漏沉沉

玉樓飛霰不禁風
繡幙低垂鴛被重
共說昭儀渾耐得
綠熊深擁煖香籠

九月梅花

常年雪裏尋芳樹
不信梅開九月中
爲避當春先百卉
故將玉色向秋風

秋風搖落不勝哀
絕訝梅花向晚開
商氣應隨

萬木盡陽和見爾一枝回
珠離玉綴狎霜辰月下風前更可人
折寄隴頭君莫訝江南秋盡暖于春

朱家巷

黃龍崗下望炊烟爭說開基此地先
聖王自憐營作費不須文獻證當年

漫興

子夜涼生魂夢清天風吹送繞蓬瀛
忽驚落月催寒漏錯認長安鐘鼓聲

桂院蘭房綺席開金尊玉俎艷歌催
花陰弄月窺簾下香燭和雲入座來

兗州述懷

楊花零落嘆春歸輕逐殘紅小燕飛
西發三吳東到魯朋心物色總成非

冬日東園讌集

蓮花峰下石嶙峋一派寒泉遶綠筠
猶有紅香凌白雪山中疑是四時春
盡日寒郊遠市塵醉來吾自愛吾直
機心唯有

禽先會到處飛鳴不避人
雲中翠巘插丹霄竹裏朱攔鎖畫橋
桑落酒傾青玉琰霓裳曲度紫鸞簫
曲徑飛泉百道冷層林掩映萬峰青
分明認得西湖路第六橋邊指北屏

宮詞

自分才非班婕妤好知文寧讓六尚書
君王偏惜司花女憨態由來太不如

曾將玉臂繫紅紗跳脫輕羅映彩霞
一段恩私常着體笑他插竹引羊車

紀夢

夢裏傳宣入建章敢將前席對君王
分明記得承恩宴玉俎金觴次第嘗

讀史雜詠十四首

竇灌田

繩引根批念薄情藍田潁水共縱橫
寧知酒禍深相螫巫視徒傳厲鬼名

韓長孺

雪泣數言王國固然灰一笑忿心銷如何忽忽
慙疏斥悔却貽金入市朝

李廣

夜呵醉尉死何知八百羗人忍盡詒降胡赤族
猶遺禍莫道無功緣數竒

楚靈王

章華臺上厭其肥九鼎分周願遽違石尹有謀
君不用傍徨釐澤獨號饑

楚射者

隼擊鷹搏勢未降楚雄戢翼在枝江小臣弋理
通王霸落繳彫弓射六雙

伍子胥

忘却稽山啓霸圖石田無用苦馳驅屬鏤不死
將軍恨的的雙睛看滅吳

匡衡

九上明經未是遲說詩贏得解人頤書生封拜
尋常事十載功名一遇時

田文

風塵客邸會三君齊魯諸生總未聞丙魏只今
誇相業何如善相一田文

劉敬

羊裘脫輅說都秦片語相投號奉春不信黠胡
能設伏却從齊虜議和親

叔孫通

狗盜聊將秦亥詒漢庭制度亦委蛇紛紛希世
逢君術安得儒宗習詭隨

江充

紗縠禪纚雙羽垂誰言燕趙固多竒游魂幾萬
啣鉗灼盡逐悲風入望思

張湯

蔽芾其棠南國思孫僑遺愛泣閭閻寧侶三公
自爲計輜輶不載載牛車

趙充國

陷陣翁孫始計非金城方略亦何遲分明支解
羗胡策還似逡巡老漢師

朱博

博育相將入漢關殷勤結綬動長安當權容易
開新釁垂老參差失故歡

待玉泉不至辭以中酒次韻戲答即支論
朔雲飛雪冷胡沙臘盡長安不見花何處折梅
堪對酒春風不到野人家

渡濠梁有感

黃河渡頭爭渡喧盡逐南人上北船為是淮徐
堪就食可憐故里空人烟

平野蕭條蔓草黃逢人不忍問饑荒無端夢遶

廬江畔一夜愁添兩鬢霜

題扇贈王生

上林三月鬪芳芬舞燕遷鶯浪逐群靈鳥自憐
毛羽異琅玕獨立志凌雲

題清河傅氏民居

茅屋踈林晝掩扉相看魚鳥共忘機無端擊隼
蜚鴻起恠底村翁樂事稀

過歌風臺

四海威行故里遊臺空沛國已千秋驕歌亦是

東歸志莫漫逢人咲沐猴

望盱眙縣

千山萬山何鬱盤遠水近水相縈旋翠微一簇
炊烟起花縣門臨星漢邊

楊子臨溪爲廬郡丞官舍舊有植栢政暇
嘯傲其下爰作閒庭四友之記詞旨超曠
真若與物爲伍者余聞之古人云鄉無君
子則與雲山爲友里無君子則與竹木爲
友座無君子則與琴尊爲友蓋亦矯志輕

世云爾此地真無可友耶詩以嘲之
蒼雲深鎖栢森森半畝公庭一畝陰我欲就君
歌伐木莫從物外覓知心

盱眙道中

萬頃平田水淼茫蓼花如火稗鬢黃行人莫訝
荒穢甚贏得豐年不納糧
平鋪茅草路漫漫草易成新稻種難爲報
皇勤稼穡中都新設勸農官
聖

望真州

白蘋紅蓼點秋辰零雨飛帆淮水濱一日西風
三百里晚烟青處是儀真

採蓮曲

碧水連天菡萏秋美人自槳木蘭舟不緣伊軋
驚鷗起未信人從花裏遊
偷持花艷比新粧欲採未採情內傷日晚歸來
不盈把儘將心目繫鴛鴦

途中苦雨憶弟

雲暗前村水拍隄小車衝雨復沾泥寄言吾黨

青霄客爭似長安躍馬蹄
行人不辟雜塵喧朱阜誰言刺史尊恠底壯懷
銷不盡劬勞曾是報君恩

才庸寧復厭奔馳天近應沾雨露私翹首南廬
瞻北極雲中棗萼正連枝

午日餽諸生食

離離朱杏出星精
久忘食聊將時序報諸生

渡錢塘江

風恬氣清江水平揚帆鼓柁一葦輕青螺點點
海門起扶桑日上紅雲生

春潮落處靜煙波十里平沙映綠莎背指吳山
蕩輕楫渡頭忽聽採蓮歌

王母蔣氏哀詞

共憐羅綺罷魚軒松檜蕭蕭湖上原當年忍死
存孤意歸報夫君地下魂

挽莫處士

百年塵世竟何如不將名姓著鄉間少微夜隕

秋光暗寥落寒原泣素車

民言十首次巡臺楊君韻

雲擁山城風滿樓冥冥積雨使人愁盡將畎畝
爲陂澤望絕三農九穀秋

版築潮河避寇兵流離道路不勝情安邊豈爲
無長策夷夏藩籬萬里城

少婦新裁錦戰裙猶將針線對斜曛男兒不是
輕離別羽檄明朝合到軍

青苗出土正堪憐未秀先徵兵馬錢荷戈早晚

從軍去不戀供官二頃田
二麥黃丹強半無催科猶自苦追呼強兵奮臂
呵循吏鬻婦含啼別故夫
百金裝送去從戎兵未臨邊戶已窮枯骨不須
經戰陣剝膚剜肉摠哀恫
求醫莫待病沉疴氣散空勞藥石多安得倉公
宣帝德只將梁肉布恩波
濁漳清衛遶孤村一望流波一斷魂濬得河身
方築岸夜深風雨水投門

部使紛紛察隱田頓將舊陌置新阡誰言國事
非民事願得連年大有年
閩外將軍汗馬勞天王珍重武功高五兵到
塞承三錫一戰歸來宴九牢

徐邳道中

連天陂澤浪漫漫江郭江村澹澹間日落扁舟
泊何處雲邊半點蝕殘山
黃河故道沙爲阜青草新陂水拍天社燕城烏
渾不解飛鳴猶自夕陽邊

途中值雪

萬里同雲捲六花
瑤川玉宇望中賒
孤帆飄泊正愁思
嗷嗷宿鴻傍水涯
千里波濤迷道路
一宵雪霰失山城
思家憂國渾無計
華髮朝來又幾莖

題林廣文卷

鴻鴈秋風離思長
天涯夜雨憶聯床
年年春滿池塘草
夢遶司空綠野堂

送萬碧峰還江右

蕭散由來無定蹤
江頭一歲一相逢
到處山川評品盡
西歸猶戀碧雲峰

行經萬縣

娟娟翠篠結重陰
細細垂楊風滿林
雲磴虹橋泉噴雪
江南景物劔南心

昭君村

孤村寂寞草蒙茸
猶說明妃入漢宮
爲問區區薄命妾
何如衛霍定邊功

屈原祠

群峰合沓接梁岷萬壑西來滙巨津忠諫無裨
宗國喪山川何意育靈均

野馬荒

荒原十里怯前呵猛虎長蛇荆棘多却憶六橋
烟月下夜深歸路擁笙歌

題松竹梅

淇籜徠根庾嶺枝移栽到處摠相宜莫言生有
和同性看取凌霜傲雪姿

獲嘉贈潘令

百里河陽接獲嘉芄芄黍稷間桑麻爭傳新令
今潘岳不說前身一縣花

歸思

三月鳴橈泛月波薰風暑雨下漳河秋空水淨
輕帆急久客歸心奈遠何

贈紀生

玉樓仙子上清遊空使人間老淚流信有佳城
巖化蛻憑君指點到松楸

遙連天目俯諸峰近對三台紫翠重打破圓球

尋活脉就中壬亥是真龍

題畫

雨過郊園綠正肥東風吹處盡芳菲
狂蜂浪蝶紛來往靜裏閒尋得化機

赤日當空暑氣蒸狂來無計躡層冰
爭如藉草臨流水趺坐悠然學定僧
霜黃木落鴈南飛野水蒹葭映夕暉
拉得同心共舒嘯峰嵐雲影坐依依

青牛緩控歷逶迤塵世滔滔總不知
授簡祗須

關令尹東來紫氣特相貽

奚囊遺錄卷之十終

奚囊蠹餘卷之十一



序

贈竹川張先生序



余始受易父師聞蔡先生介甫傳易于閩于先生孔安傳易于越並著書膾炙人口嘗卒業焉既爲諸生好涉獵漢儒同異程傳易通諸家言漸與千蔡之旨相遠校文者輒見黜謂非穀率幾欲弃去當是時學士弟子推深於易者咸謂有竹川張先生云歲庚寅先生來自江南遂挾

所爲文拜帳下一見卽辱心賞至論易奧衍宏
深囊括經史折衷漢宋諸家主於朱氏而可否
于蔡令人易聽洗心疊疊忘疲蓋超軼舊聞悟
群言實一貫爾其論文曰華而不實末榮而本
瘁也實而不華積薄而未光也成章而達華實
斯乎乃諸從遊摘藻敷言紬繹疏博會約精腴
率遵軌轍光藝苑耀制科彬彬宣布郡國雲蒸
颺起不足爲喻肆小子較劣亦得從諸君之後
所由來宏遠矣先生方應貢上春官當道憐其

不令比於京闈復不偶乃赴銓曹俾司訓仁化
秋仲屈行諸從遊餞諸郊或曰吾儕從先生游
允以道藝勲名爲期方今開芳振譽行道施德
以翊明盛豈非出緒餘以階進取于福澤乎先
生顧不能蚤自奮庸竟垂老出諸生之後將治
已治人輕重不倫抑大朴難斲大器晚成猶幾
望於桑榆之獲也先生矍然起曰謂才必用則
長沙有遺賢謂文必顯則治安有遺策主父偃
曾不能竊賈生十一取功名立談間遇不遇爾

子不云乎良農能稼不能爲穡良工能巧不能
爲順故顯晦者文章之否泰遲速者命途之通
塞不爲得喜不爲失悲行與世通道與變俱無
終始無物我者君子所以自全某聞之曰敦良
以大畜虛受以包蒙人已之心同知遠知邇知
微知彰終始之教同藏器有獲屯膏澤遠體用
之道同茲其爲善用易也先生笑曰有是哉乃
次第其言書以贈別

贈沈少吳擢四川按察副使序

嘗讀循吏傳諸所稱列大率砥節守義無有詭
隨甚者以身徇法迹其臨事若輪轅必遵軌轍
方圓必以規矩不失尺寸乃至法立民安國
家賴其便而其身亦永終脩正之譽意其緼藉
持循良有素云我國家博選賢雋分曹任使
諸凡訟獄隸諸刑部持三尺以權衡天下蓋揔
諸曹所治一切齊之使理鈎撫微隱擬議上下
日惟精習法比由是郎署秩滿轉遷彬彬多稱
何則法非武健嚴刻專以繩責齊民防心窒欲

約諸繩墨之中迺其自律滋多已余同年沈君
以秋官大夫奉 召讞獄全楚行郡國得寃民
輒咨嗟不已必庶得其情列其狀上之 詔可
悉如狀釋諸囚惟時全楚稱無寃 天子嘉其
績乃晉秩按察副使提刑三川余竊謂沈君秉
德誠厚然亦其素所諳習寔資之深君少以胡
氏春秋爲諸生卽有聞于鄉暨先後爲兩都郎
皆刑曹治獄明允再考書最荐歷今秩夫春秋
法律之原也兩都天下之本也法司刑名之總

也君之蘊畜宜其深已昔爲明部使今當爲明
監司異時爲名公卿決大疑定大計標能擅美
爲 國枉石亦率其素習推行稽諸往哲奚足
過是然余又嘗考諸法吏張湯少習于法任法
不回竟及其身杜顏年飾以儒術克終顯聞夫
儒術君所階進又博雅沉密是深於儒者也法
之精微是謂道道之顯著是謂法徇法以拂經
張湯輩之不爲儒也其及宜矣以儒用法則操
德固而防身嚴法非出於儒術之外也余獨異

夫世之玩法而不知廢法不足爲儒故於沈君之行序其事而以臆說終焉

贈桐岡郭先生序

曰歲闕逢執徐四方大侵淮西爲劇始夏逮秋恒暘爲咎原隰陂陵千里濯濯盡廢其菑畝畚耜獲之常而民不堪命於時梁苑桐岡郭大夫爲廬郡丞會守缺大夫行守事首䟽蠲常賦十七平刑禁暴損上益下給種麥勸樹藝悉發貯積審計戶口劑量盈縮官無遺畜而野有遺民營

營莫知所出余繼至適邁其會僅守畫一復相與謀貸它郡議聞撫巡請于上詔可誕敷郡邑若家賜而人益之庶幾憔悴之民歡然更生矣踰歲聖皇詔諭中外謂政在愛民愛民必擇守令今官匪其人肆爲暴虐以干天和求庶民安其田里而無愁歎之聲不可得已于時太宰奉揚休命凡郡邑員缺必慎擇以充黃郡當全楚之交爲廬江上游迺移郭大夫于黃爲真守蓋緩征卹困仁愛當上心云大夫捧檄行廬

之士民不忍舍依依若赤子去慈母余曰任人以圖治 聖王之仁也擇賢以弘化大臣之智也乎心以懷惠良民之義也有三善焉皆本仁厚孝協非可聲音笑貌爲也夫潁川渤海仁明之偉績也循良課最古今之美談也夷考其人則內寬外明忠厚有大節云爾夫寬厚以出治明節以持身是以教順而必政成而安所緼藉深故治行稱最郭大夫寔克兼之媲美前哲恢弘仁恩報稱知遇永懷於民無俟異政于易地而允足以底其績詩曰愷悌君子民之父母書曰民罔常懷懷于有仁大夫之謂也大夫以明經甲科爲郎理刑寧國晉湖郡丞所居見稱述其治謹身帥先廉平敦慤而經術藻思尤潤飾于吏事多可紀云

當陽簿謝君五十序

嘗謂君子懷德抱藝著令聞垂史冊無間窮達必皆卓行竒節磊落雋偉自足表見要非雷同世局踵故習非巧媚富貴者也史稱考城枳棘

鸞鳳非蜚聲華陰抗志風塵徒脫彼其自負雅致
視世所謂浮湛毀譽誠無關於欣戚寧屑屑依
違其間哉吉水達溪謝君非斯人之儔與君朴
直能文章素慷慨有大志由縣博士弟子升太
學數竒不獲薦乃上銓曹竟從常調爲湖廣當
陽縣簿比入境值久旱君未蒞縣治輒築壇於
郊齋戒禱祠天果大雨邑賴有秋顧以不先謁
令令啣之君又峭直不肯卑節下人務廉刻自
檢而惠先困窮民賴以生乃至知有簿而少其

令令又啣之惡之上官卒傾君君嘆曰君子之
仕行其義也義不可行則已矣竟拂衣還君有
弟曰潮溪君素以文藝行能相砥礪時爲吾浙
監司念君有用世才坐抑鬱無聊慮無以自遣
寓書於君君曰見定者不惑理得則心裕脫跡
塵囂之中耕釣達溪之上優游天年奚不可者
有味乎其言蓋曉然於義命之際方諸仇張高
軌何從軒輊假令稍徇世態循襲故常詎不能
糜爵祿固顯榮哉然特行亦何由見之卒去彼

取此君所懷抱深矣今年君五秩初度潮溪君
爲余道如是且屬詞爲祝余聞養生者云毋挫
爾精毋勞爾形乃可長生夫窮達不亂其真則
精定奔走不役其氣則形安卽君所處已爲壽
徵矧壽人者本諸其德行誼如君有不駢集五
福逍遙長生者耶名德歲年皆足褒顯於無疆
矣是爲序云

贈芹山陳先生序

大方伯芹山陳公始以明經射策甲科爲地官

卽舉最出守東昌治行爲隴國第一於時縉紳
間知不知言吏事稱芹山公藉甚尋擢按察副
使奉 璽書督學吾浙時浙之文靡靡漸失其

實公聚而較之亟賞質雅善要束者其縱橫馳
騫衆所推服一二輩故黜之間進諸生面命以
身帥先士迺彬彬向風知就中焉于時公之政
事文章並美當世洵歷叅伯總憲進左方伯提
調東藩試事坐錄文不稱 旨與與事諸臣咸
逮繫長安 上方震怒莫不恐怖銷志公獨安

義受命痛自引慝畧無怨尤 上徐察其隱竟
釋之敦道義明憂患大節凜凜不可奪於時宿
望彌重云已而下司邑幕移佐畿鄙余守廬之
明年公適戾止勵政勤民迨不減其筮仕而休
休虛受歆然有吐握之風蓋師資於昕夕甫十
旬而經畧宏規華國藻思與其名世之績忠毅
之素開示滋倍適有真定郡丞之命屈行其竊
有請公曰古有之孟子不見諸侯而宣聖趨召
不俟駕展禽不易介于三公其究也不卑小官

夫官之不卑也所以明分介之不易也所以立
節後之稱聖人者歸焉宜已是故有不見之義
者有趨召之敬安卑小而後大節不撓夫固道
之相通而事人之理君子之所以藏身者非邪
余聞之曰政治無良儒行之蔽也文采不飾吏
習之陋也節義無聞持身之辱也其本在德德
盛者心下尊而光卑不可踰君子之終操德固
而順應裕奚其顯晦之有哉或謂世方睥睨華
要視所過為傳舍其在阻抑偃蹇尤甚公獨不

然噫淺乎窺有道矣公咲而別

壽外舅野亭翁六秩

嘗聞鷗夷子皮解體世紛游神區外扁舟徜徉
塵土軒冕豈不卓然昭曠超絕人群哉然猶屑
屑於計然積著之理以富好行其德三致千金
再給所親豈其祛鄙吝之私而馳競之情猶未
遣耶至觀陶靖節安道苦節貞志晦迹不以無
財爲病不以乞食爲耻韜光遁世氣干青雲纖
塵點垢誠不足以涅其潔世方並舉而兩高之

以爲用世尚功避時尚志隨變易爲隆汗垂芳
蹟而延令聞其揆一也吾外舅野亭翁夙擅文
名蚤登鄉薦暫隱師儒小試畿邑花滿河陽而
情櫻松菊澤被黎庶而心賁丘園遂厭折腰果
成今是棲迹數椽躬耕十畝庶乎屢空而怡真
適性陳書摘藻欣欣然忘蓋神孚於靖節而志
薄乎鴟夷者也是歲丙午首夏旣望爲翁六秩
懸弧之辰余羈僻壩不及捧觴登堂緘辭爲祝
不欲蹈世俗常情迺爲之言曰古云太上立德

其次立言立功鳴夷子皮平吳霸越不自居其
功而乃以其居積施與爲功不免猶牽於俗比
諸靖節不啻涇渭顏子簞瓢陋巷泰無不足子
顛皆殖聖人以為不受命焉以顏子之聖靖節
之賢不能謀食吾不信也所見之大蓋超然萬
物之上非夫塵心世慮所能測識也故余嘉翁
之德以為壽而其及民澤潤著作深富皆屬之
菁華敷布而非祺壽無疆之本也乃爲之歌曰
南山有松北山有栢不若五柳之宅兮
露清陰
兮垂芳蹟泰山之岡高岳之陵不如東臬之登
兮長舒嘯兮永不崩又歌日月之恒兮日之升
兮萬壽無疆樂繩繩兮頌人之寬多福載凝兮
是歌也樂翁之樂契翁之神可以益翁之壽遂
書之

同選錄後序 代作

聖皇御極廿有二年爲嘉靖癸卯銓曹集天下
科貢士凡八十有六人論定敘官自州大夫郡
佐至邑長貳司幕考德掄才因人量地各得分

願制下胥慶彙征迺次第名秩與其年齒鄉貫
列爲私錄永終敦好以相觀善裴大夫已悉諸
右僉謂余亦宜有言辭不可得輒綴諸末簡曰
粵稽我明聿興雋乂布列贊揚弘休爰設賢良
方正聰明正直孝弟力田通經孝廉等科雜進
僉用時維窮荒僻壤齊氓下役悉得以技能表
見嘉猷偉績載在史傳班班可考既迺文教日
盛士爭嚮風由舉子業進于是諸科皆報罷科
貢之外無他途可致通顯夫科貢誠足以盡人

然而功不度越往哲才或局於隨時何則習不
振志不立也夫脩德抱藝蘊藉經畧所自治也
而唯恐其不售兼善不失時獨樂不失已志先
定也而或役于聲華懾于卑薄黷于貨賄若自
畫而不前無惑乎士殊世才殊途國殊用已
是科貢宜不若選舉得人猶兼名實何得更爲差
等使貢不得埒於科科不得埒於進士盡失
祖宗初意而士習益衰可慨也夫窮達者天定
崇卑者命遇得喪者時適行素其位疆立不返

司牧者飲芻粒解牛者利芒刃官不負國行不
負志樂天知命以趨時也奚所損益迺舍已徇
外爲哉致遠不偏主於登涉中的無擇勁於弓
弩所貴預定不惑卽榮辱顯晦利鈍處之一茲
敦樹聲實允迪先民克荷鈞陶而無忝此生者
也易曰惟君子能通天下之志夫官不同階游
不同方任不同事而有相通之志是謂大同願
與諸君商之將訂證于他時爾

祝壽圖

皇上御極三十有五年秋八月恭逢 聖壽五

秩之期萬國歡呼北嚮稽首遙祝杭郡諸大夫
舉行唯謹已而潛江郭大夫卽郡齋又西嚮稽
首遙祝以有太孺人在堂壽筭永矣吳楚阻脩
不獲捧觴膝下迺陟屺瞻雲之思感發於望日
傾葵之候也吳中鄉大夫士聞之知公孝達思
深欲爲宣其無已之情爲繪圖曰日之升日月
之恒曰松柏之茂曰南山之壽或爲之歌曰煦
煦朝陽拂於扶桑曉煙飛瑞晨曦吐祥隆景煜

燭曜色蒼涼緊耀靈之未午况母壽之未央皎
皎桂魄金水之精蟾從陰伏兔倚陽生四時照
耀萬古晶瑩信常明之不匱同母壽之有恒又
歌曰何茲山之崔巍兮鎮南國曰衡岳上巖石
之難攀兮下流泉之堪濯時宣氣以誕秀兮紛
藜芝而緼璞永不騫以不崩兮信母壽之可較
伊大谷與天陵兮挺千禩之喬株盤虬龍之偃
仰兮鬱龍蓂之陸離陋芬芳之易落兮傲霜雪
而不移斯本實而未茂兮唯母壽之可齊余聞

之竊謂日月唯明故離天而久照松柏唯實故
安土而葆貞南山唯厚故鎮靜而發育嘗觀郭
大夫理吾郡徧燭群情不爲過察砥節礪行不
爲矯情深涵並載容保無疆而不震不擾日方
躋華陟要永有榮祿楨幹 國家爲民具瞻允
有協於圖祝之意子德母儀槩可想見太孺人
之賢詩云魯侯燕喜令妻壽母宜大夫庶士又
曰旣受多祉黃髮兒齒夫庶政得宜見祝於人
人上逮於親獻無疆之壽若是推賢母之心豈

卷十一
徒祿養是孰宜有樂於嗣君庶政得民而油然
燕喜不自知祺壽之彌增矣有以夫圖咏交作
祝願無已猶魯人所爲頌僖公也大夫曰允若
是吾將緘寄吾廬俾吾昆弟歌以侑觴於是大
夫士益爭獻篇什具列如左方云

贈陳醫士序

吾杭東南一大都會山川所鍾不特士大夫敦
樹聲實標能擅美爲今昔推重卽百家技藝亦
種種精巧甲天下記曰天有時地有氣人有巧

要得於生稟誠異亦人爲所造非偶也女醫之
良盛稱木扇陳氏云自宋迄今世有秘傳陳氏
繁衍比肩連肆不啻數十餘中間靈悟超越爲
衆推服者代不一二自余所及見有若蓋齋翁
余家凡內人疾輒延致之切脈而道其原論定
而投之藥十不一失今觀所著醫要蓋讀書明
理深於岐農越意之旨非特專恃其聰明而已
再傳而其孫引泉君實克紹之今年春余姪婦
得竒疾始若笑若泣旣多話言已迺寂不語瞋

日闔口絕不飲食或曰風邪亂之或曰食結鬱
滿相顧駭愕計莫知所出君曰此痰證也孤鳳
散主之痰隨氣升降氣逆故痰壅亟墜痰卽諸
病自己衆又相顧駭愕莫敢是非君遽起調藥
強病者飲一飲氣下再飲能言三飲能食自是
日順其氣氣順理脾脾健益血但服湯三旬而
復故余兄雙洲喜其子婦疾已屬余贈言余竊
謂凡醫治病猶將用兵今古方書猶兵法也誦
習醫方泥古以合今何異徒讀父書心無運用
之妙祇取敗亡者乎引泉君得前世秘傳又精
研經籍擴其性靈信非時輩口耳淺小之術宜
攻治有定見效驗竒絕如是不然君家世傳非
人人殊醫要亦往往傳習君何獨擅其美哉蓋
齋之業必引泉斯繼之矣余悲士大夫以儒術
顯或不務裨益於世名亦泯滅無傳終負山川
之靈不當以方伎少醫術也是爲序云

刻野亭集序

余舅氏野亭先生仁和人本姓馬氏先世由海

昌出贅於陸人稱陸野亭先生先生受易父履
齋先生夙承家學名籍籍諸生間既領鄉薦就
教初門補來安令多茂績稍遷南昌府倅輒弃
官歸時方強仕郡大夫捧檄詣先生先生辭以
疾深避謝之自是閉門靜居不荅問遺不理冠
裳不事家人生產作業遭荒罹變蕭然屢空坦
如也獨耽嗜經籍得古書往往手抄間以已意
刪訂積盈几榻興至登山臨水藉草拈花觴咏
自適所爲詩文率意成章無館制無蹈襲亦鮮

存稿如是二十
若干首將入梓
之聲也感於物

年垂老矣嗣孫亦能私錄得
藏余三復掩卷嘆曰言誠心
於言宣洩才情各因其質故

正士和平而在

達人閒逸而疏鬯先生端凝

長厚安道苦節死生忘得喪超然塵壒之表
猶之鳳翔千仞揚聲吐氣自中律呂奚必調弄
樊籠效人掉舌爲哉今觀衍正學傳清風自敘
諸篇莊嚴疏鬯不可想見其人余竊惧後世不
知其人槩與談天雕龍爭妍鬪巧者較工拙則

何異寸木岑樓失本末之辨甚已爲著於篇

贈閩帥東潁王君序

余以己未歲入蜀不踰月有川北之役時東潁王君與余俱始出新都經牟瀾停車延睇纍纍砂磧杳不可計君謂此八陣也近躡四正則天地定位風雲流形遠指四竒則龍飛虎踞鳥翔蛇結千變萬化運用無窮非夫震龍言吳魏鼎峙天府卧龍遺踪乎余曰詭哉已迺歷蟠龍涉嘉陵攀錦屏蜿蜒磽确點點蒼翠莫辨君謂此北

門也包錯萬壑喉吭三川背指棧道分漢楚之疆面衍江漢思成周之化蠻蠻在御戎羗通譯非夫坤維都會陸海巨鎮乎余曰壯哉已迺回車華陽登威遠堂更詳其說君謂牟瀾之觀兵法也史傳猶存錦屏之眺地險也陵谷不改法具而心非趙括父書之智也險設而人非文侯魏國之寶也是故得其心則六花異制勝筭同功不得其人卽三分弘業僅貽一夫納款之地爾余曰辯哉夫旌車招搖塵空迷眩探竒討古

舒昭曠之襟非士林賢豪不暇及矧雍容指顧
窮極本末使全蜀數千里形勝上下數千年興
替若指掌上君之將略何如哉往年 國家承
平將帥之臣徒飾文墨近以南北多事乃更專
務弓馬夫研文騁墨誠無補於運籌至舍我智
謀矜彼勇力亦何賴焉東濟君才兼文武又善
察地勢審要害覽古今成敗取證得夫即如上
所陳說豈深文無當用壯無惧者可同日語哉
君又魁梧竒偉望見知非一人敵郭侍御聚菴

素慎許可頃按蜀丞表君才茲當入賀 萬壽
廟堂之上宜有知君如聚菴者相與推轂登大
將之壇立殊絕之勲永竹帛之譽竊有望焉君
既與余善雅愛余言重以古崖河山強屬余言
不得以俚拙辭聊述同遊與期待之意如此云

奚囊蠹餘卷之十一

奚囊蠹餘卷之十一
序

贈金雙虹二守序

夏書稱禹抑洪水通九道陂九澤度九山蓋八
年于外而後諸夏乂安功施乎三代甚言治水
之難也至漢河決瓠子武帝親臨河上湛白馬
玉壁群臣從官負薪寘水然且久勞無成至爲
歌悼之今觀其詞亦云悲矣宣防旣塞二渠北
道始復禹跡以寧梁楚之地自是之後决館陶

決平原決入渦河漸徙東南我明以來決原
武決滎澤決張秋金龍諸處河愈南徙議者謂
河源既遠奔流迅急數千里平行之地浮沙䟽
土任其遷徙固難以人力勝也將諉利害於河
余竊謂未盡然夫就下水性也淤澱則勢逆䟽
濬所以淪之也下壅則旁行隄防所以排之也
然後東注順而患害消否則平成之功神禹何
所用其智耶大名古衛魏地瓠子黎陽白馬金
堤咸屬境內黃河故道至於大伾蓋禹跡猶存

焉郡故置判府東昏職專防水河既漸遠防亦
稍踈歲率督土人繕完故堤增卑倍薄捕狼鼠
實其穴植榆柳堅其址若無事事然者然而數
百里大堤數重中間田廬冢墓得無決溢以有
安定之利此亦人功所造國之利害豈其微乎
余僚友建業雙虹金君始判臨江再補茲郡專
領河堤是年以秩滿奏最得超遷奉議大夫
同知寶慶府以君功懋資亦深也且命銓部
以後無復專設蓋知河流底定保障足恃云余

聞昔平當領河堤奏言按經義無隄防壅塞之
文欲移民避河遵古聖以定山川之位無與水
爭咫尺之地此泥古之論非隨時之法也夫禹
之治水行所無事耳維時生齒未繁地多遺利
中國汎濫民見其害不見其利又何惜焉後世
地闢民聚國私其民家私其業奪而為河將反
所好其孰從之必若當言水未必遵新徙之渠
民將先失舊有之業啓怨讟之囿滋庸人之擾
其于經義悖甚孰與夫導洩雍滯固守隄防

常循故道以消崩潰之患遠魚鱉之害而民無
失所之嘆哉今金君優游堤堰間與民同無事
之樂於國消隱微之患雖永賴未可期庶幾三
數十年之內以恬以熙安耕鑿而享庶富其功
有足多者且隨時制宜因民順治其諸不作好
惡予惠元元之意將易地皆然可以覘君寶慶
之政矣於其別也聊當贈言

刻引川心秘序

嘗聞大倉公受方公孫光謂是吾少年所受妙

方慎毋舉以教人爲甚哉公孫氏處心之隘也
已而意得師陽慶授黃帝扁鵲脉書五色診病
知人生死決嫌疑定可治及藥論甚精于是知
曩昔所受方書非是卒盡得慶術審診起度量
立規矩稱權衡合色脉表裏有餘不足順逆之
法參人動靜與息相應而藥石之無不立應已
又盡出其方徧授宋邑王鷓杜信等無慮數十
人何易易邪夫方不竒而自秘與竒而公諸人
人器量誠相懸矣太倉公豈不直聖儒哉近世

以醫行者往往不務讀書明理又耻相師習
買焉形窺意測妄投藥石雜集品類纖嗇片粒緩
微其性使無殺人已已謂能攻疾無有也已病
幸愈輒引以爲功自伐且禁其方不泄此以視
公孫何如邪余友引川陳君得乃祖蓋齋女科
心傳酌爲竒方又間以獨得之見著爲定論凡
若干卷題曰引川心秘將鋟梓以傳顧其說超
越流俗不悖經旨且爲方誠竒卽與昔賢授受
適相脗合不可知縱爲方不必脗合所貴利病

彼其公溥一念宜與聖儒同符君誠有足多者
聊爲序諸篇端

刻瞿存齋先生文集序

存齋瞿宗吉者吾杭郡知名鄉先生也生元至
正間脩行績文誦習詩書百家之言避世全身
晦迹海上入明應聘出兩爲邑學博士以功
能升太學終周王府相當是時天下初定中
國所喜好弓矢搏擊薄文墨不爲已而縱馬放
牛漸脩文教迺徵岩穴之士凡負一技能有裨

政治大者登三事其次備侍從領方岳皆表見
一時流聲著績固不朽盛事已先生抱輔世之
才挾華國之策獨不見用卽用又不盡其長竟
沉鬱下僚使天人治安經畧僅僅與膠西長沙
同途轍信文章顯晦有時命途通塞有定抑居
卑自歛別有意見不可測識也先生著作甚富
所著若綱目重編花影集剪燈集皆粹行流傳
膾炙人口曾孫廉輩復旁搜遺逸得文與詩合
若干篇將併刻之有曰晴者雅善余間示所輯

屬敘其事余讀之大抵根極理奧不忝醇儒篇
中言必稱孔孟詞必倣經傳意執德方操行固
其不希世就功明甚然以任閒局故得專意文
學若去彼取此所謂不朽盛事豈特功名者
擅其美哉歷世滋遠搜括靡遺則知儒術相仍
代有人已爲序而歸之

會泉雙壽序

往余登天台訪石梁經沃洲天姥環富壯麗一
大竒觀其下蓋多才賢多世家鉅姓多黃髮山

川所鍾有以哉世俗所稱西蜀玉壘青城天彭
丹景錦江巫峽自昔以爲天府之國坤維大都
會余未獲遊遨其間睹史傳興思焉司馬王揚
其彰明較著者也張南軒蘇長公虞道園豈非
今古所謂賢豪道德文章之師表與謂得於地
靈是邪非邪余同寅有池李君自少以文雄蜀
中有司選上春官尋射策甲科爲郎平刑魏郡
余旣見其著書觀其行事心輒異之明年迺父
會泉翁來就養龐眉瞭目翛然鶴立有隱君子

之風知有池君學有本矣時翁與其配鄧孺人
先後皆週一甲子有池君圖所以爲二人壽者
屬詞於余余曰地靈人傑蓋夙昔聞斯語矣今
觀九域八紘區以三壤五土而物生剛柔緩急
異齊燕角荆榦妘胡之筭吳粵之金錫非其地
則非其材非夫地氣然耶則夫名山大川發育
多才不宜有世儒興起其地如吾李翁父子哉
翁三世儒流種學績文以弗偶循資應貢爲非
其風雲夙志弃去築室會泉寄情山水脩身善

行優游天年蓋知命達化者矣鄧孺人柔嘉維
則寔克相之竟以其子顯揚四方榮壽未艾余
曩見所謂世家黃髮才賢卽翁一門蕪之梁益
山川不尤有大焉者乎然余聞之軾之才洵啓
之棧之學浚成之集之文汲授之儒林濟美類
皆淵源有本若有池君才賢得家學而蘊藉
益深會泉公累世脩積得山川而文譽益顯光
前烈永令聞有池君將克紹三君子以承貺於
山川之靈則所以壽其親者無疆彼耄耆期頤

委蛇雙壽本諸靈氣所自萃者又何足多耶其
不佞推原獲福之基取證先哲致祝望之意云

吉郡丞十第五秩序

余從父半山翁嘗倅吳郡不數月棄官歸後尚
御史仰山按吳中廉知去狀爲書高風峻節四
大字使吳人以禮致里第額於門孫太史文恪
公擬立隱君子傳風世何則世方嗜利干進若
飴適於口今將比諸荼毒遠避不暇豈人情哉
唐虞歲時厥有巢許炎漢中興雲臺雄傑奚啻

風雲龍虎亟相從也乃桐江釣絲終以烟水自
適士各有志信夫余弟麟洲子明先尹寧化有
治行進刺濮州治行彌謹再進吉郡丞輒嘆曰
盍歸從吾伯父嘯傲湖山間寧能折腰俛首逐
風塵利五斗邪列狀上官咸留之狀再上不待
報卽馳還旣還三歲當甲子初秋弟年五十矣
半山翁時將八十葛巾野服緩步林泉里人望
之以爲漢兩疏復出宜不爲過弟又喜談攝生
家言從江郎周先生游會心處信宿不厭間及

人應酬便瞋目塞兌譏然若罔聞也其要主
靜夫靜之爲言百靈之樞三全之府也惟動妄
故紛紜襍還擾其心心擾意馳意馳形勞形勞
氣逆氣逆精搖精搖神耗欲與天地長久非所
聞已吾弟祛除物累去徒羨絀聰明精神專一
用默持慧舉攻取百塗盡置不省又引避之亦
若榮祿荼毒吾口然所謂本虛無而用因循非
邪當有塊然定泰然安油然樂指約而易操事
半而功倍非夫煉服九還之丹呼吸二儀之氣

徒作勞而鮮實用者也采儒墨之善順天地之
經出處隨時動靜合一祺壽無疆有本矣聊爲
發其自得之趣余將歸老庶幾共事斯言

陳小石改官順德序

古今稱禦戎之策曰戰曰守曰和來則薄懲不
以自罷去則固守不爲釋備周人已爲得策下
此則設險者不爲戰黷武者不爲守和親者併
戰守失之班固所言禽獸畜之制馭常道後世
不可及已然能戰而後能守力不能支地險何

恃可守而後可和勢不能制大防易踰三者蓋
相須云我 國家德孚重譯威虜諸夷邊圉寧
謐爲歲寢久邇以犬羊犯順 聖皇赫怒命將
出師盡簡封疆之臣及內地兵戎諸司博選奇
偉特達才勇出衆者以充於是部使者出按郡
國亦簡所屬賢豪列其狀薦於朝分布要害吾
僚友小石陳君寔與茲選由大名判府調補順
德巡山詰戎兵守關隘鎖鑰之寄允稱 詔旨
矣比其別也余告之曰當事者揆其策圖功者

明其道在昔壽邊之臣若李牧趙充國豈非善
事明功者哉今觀所畫策曰匈奴卽入盜急入
收保毋捕虜曰攻不足者守有餘以逸擊勞行
將致虜無爲所致彼其所謂素定廟勝似皆庸
懦苟全之計然而襜褕滅林胡降單于奔潰罕
羌先零支解賓服此兩人者豈徒以守勝耶日
饗士卒習射藝設間謀使兵弩飭鬪具蓋未嘗
頃刻忘虜則亦未嘗頃刻忘戰故守固攻克操
縱在我計先定也今書生談事則曰戰可易言

惟守庶幾耳惑甚矣夫圖事揆策者視才握樞
審勢者視地事諳而心逸者視其所歷小石君
藝兼文武忠毅有謀往從其先中丞經畧西北
日擊戰陳口授區畫所謂禦戎之策亦既先定
茲往巡山將有戰守之責士馬皆燕趙之良戎
器得弓車之利形勝當阻隘之險芻糧無輸輓
之勞而又外有重鎮扼其衝旁有六郡翼其勢
閱習控御俾兵可戰而地可守固安攘之大計
大丈夫所以立功成名小石君所以克振先德
不負世恩在茲行已若夫謹外厩之調習供騎
乘於司馬砥節礪行集事宜民於士誠難然比
於前所稱列不啻十一君固不以事事自多又
嘗嚮慕古昔故余畧其前美而冀望於遠且大
者如此云

贈王省齋致仕歸松江序

省齋王先生雲間人也仕爲甌寧令有善政秩
滿奏最擢大名判府由閩經浙遇余舅氏陸野
翁於西湖之上指顧山川上下今古見長堤中

巨飛虹隱隱潞溪澗之流緩東注之性灌溉者
資焉魚藻者資焉則相與思樂天東坡利民育
物之仁已而北望棲霞南望三台英靈之氣冲
霄貫日雖隴樹明心龍章表枉而忠臣義士有
千載不平之憤則相與思武穆肅愷戡亂定國
之義已而問故宋之墟尋吳越之跡殘壘荒原
黍離茅塞杳不可辨則又相與動盛衰興替之
悲已而登放鶴亭吊處士墓誦所爲踈影暗香
之詩顧瞻山麓古梅脩竹猶偃蹇蕭疎而悵斯

人之不可作則又相與慷慨嘆息飄飄然有脫
塵之想時余舅氏久已弃官屏居省齋竊傾心
焉戀戀不忍捨意其所感深矣比之任輒欲弃
去會當防秋義不可辭勉強就列不數月竟投
牒東裝自撫按監司及僚屬士民皆留之不得
揖余而謝曰吾今乃得從野翁遊矣余竊嘆曰
士君子明理脩身將以行義達道故聖如孔孟
猶遑遑兼善何必棲遲衡門自賁丘園然後爲
儒者之高蹈哉蘇白之治行岳于之忠貞逋仙

之高潔其行不同其揆一也然世之人則每薄
進取而獎恬退何居夫亦榮祿易溺而隱約不
可貞也老氏云功成名遂身退天之道又云知
足不辱知止不殆止足之義殆天道四時之序
彼備績盛名隱顯興亡亦天道耳蚤知之士有
不遠覽並照其間哉省齋對景興思性直觸發
曩昔感嘆有以夫有以夫尚友先哲將與造物
遊遨奚必心跡偶同如余舅氏者耶省齋行矣
聊爲次第其事歌以贈之歌曰兩峯崢嶸兮玄

豹之關重湖森森兮神龍之潭彼幽人兮此中
閑棲衡茅兮考澗槃憶傾蓋兮衷曲宣願相將
兮樂晤言五湖三泖兮雲水連春風秋月兮相
周旋林之廬兮范之舡垂張釣兮涉陶園歸去
來兮挾飛仙與松喬兮齊壽年

刻吳清惠公詩文序

吾邑胡端敏公以風節勲猷爲國名臣居常
屈指同時賢豪若陽明先生孫忠烈李遜菴邵
端峯霍元崖魏莊渠吳東湖諸公時時稱說不

置蓋意氣乎合道有大同不以成敗利鈍爲軒
輊踪跡遠邇爲䟽戚也余私心嚮慕頗求其遺
編如前數公者嘗讀之大都殊塗同歸百慮一
致皆有道仁人非徒以其文也近始得見在渠
集尤純粹無疵深詣道奧旣入蒼梧又得東湖
詩文卒業焉氣翦然充思悠然遠其詞則渾渾
然不琢之璞不雕之榦望見知其疑瑩堅實非
夫飾章繪句爭鶩淫麗以炫觀聽者也至於憂
國勤民砥礪廉隅敦篤信義尤三致意焉因竊

嘆曰是不可以仰見先哲芳軌哉夫文以氣爲
主氣得其養至大且剛歛之不踰一身放之塞
乎天地以之策勲泛應不匱以之脩辭疊疊無
窮凡其感於物而形於言者要皆厚人倫美教
化達於事變關乎政治協匡正之義得風人之
旨其氣全其道備也因文以想見其人是所謂
全其剛大而不餒者耶端敏公嘗以微言諷主
曲突徙薪之喻犯重灼而不懼矢死不渝豈非
養盛所致彼其居常思慕殆同氣相求奚屑屑

以文藝追琢哉若曰詩緣情而綺靡奏平徹以
閑雅詞貴體要論主精微公作或不盡然斯詞
人墨士之科條不可例於有道之緒餘也公由
進士三試有司兩爲兵憲多軍功嘗忤中貴逮
繫窘辱謫戍於邊撫賊入巢拘留旬日皆瀕死
以忠信免累官工部尚書曰清惠者

今上登極采 廷議褒加謚也陽明先生稱公
才如利刃志若逝川節比松栢之堅學同林谷
之邃可謂豪傑無所待而興者也有味哉有味

哉爲序而刻之郡中

奚囊蠹餘卷之十二

奚囊蠹餘卷之十三

記

淝寧橋記

余始治廬值境內大侵發粟省耕禁糴販緩征
輸既竭心思而澤未究乃行阡陌間見平疇千
里遇雨即流散莫解緒畜余嘆曰此縱其流而
不知止者也如旱何檄州縣尉暨義民若而人
使監水教以䟽鑿三令五申長渠廣堰稍稍遍
村落是歲仍饑廬以小收環郡城故有濠源出

李陵鷄鳴諸山東下入巢當夏霖雨泛溢奔騰
漫瀚往往沒田廬民且病涉余周視之嘆曰此
障其流而不知行者也如滂何爲之建橋於水
西門外跨濠而東其勢啓水關故隄縱流入城
市以東注更建小橋濠西支流以殺其衝蓋自
大橋而北貫城而東各十四小橋而西北十三
逶迤滙于湖而水患息夫宜行而障也猶宜止
而縱弁其益者納其損導其利者逆其害漑溉
有資浸淫無慮治水有異術哉橋皆甃石大者

爲三空廣丈有八尺高三丈長十有五丈三尺
小者爲一空廣一丈有二尺高一丈有三尺長
三丈有五尺工料等費摠若干緡官給僅三一
官主之民自備三二民主之民穴地得石當其
二之半無科擾督責之繁而事集經始於丙午
春中成于冬孟鄉大夫蘇原吳公聞之曰茲水
爲民患久矣至今而始寧肥民亦庶幾永寧乎
題爲淝寧橋余竊謂民生未易以寧猶水故曰
防民者甚於水水壅而潰傷人必多甚言不可

障也夏后氏治水曰行所無事夫胼胝於外歷
八載而謂無事云何率其性各適其宜可淪可
排可䟽可鑿以水治水而已無與焉故謂無事
云爾於民亦然水之止也聚所欲其行也寔勿
施其所惡好惡因民而不與是寧民亦行所無
事而已余媿得其一端之似而多所未及也書
以告於後之君子當有諒余衷者同舉是事爲
同知楊賢通判王倣晏若川推官孫慎合肥知
縣歐思賢陳其樂丞聞嘉識簿李珮尉邢鸞監
工義民王朝舉孫鎧贊襄成功合併書之

石橋記

許水出石寨山迤東滙于江經新喻北鄉鄉人
沿流而居者壘石爲橋用以利涉吾僚友晏子
東之世家焉爰自號爲石橋子請圖於郭桐岡
氏而屬余繹其義余惟石橋僻在江鄉無城市
紛華可悅桑畦泉徑石門荆牖水居木侶群鹿
雜豕老稚歡呼鷄犬鳴吠皆村田之樂事橋居
之心賞也而子方經營四方巖廊黼黻壯其懷

冠蓋麗澤偕其好寧無需於鮮腴乃略彼而耽
此何居人傑與劉世表圯上之遇中郎建節不
忘題柱之言溯本源也宦迹在四方而情寄夫
鄉曲心安而慮達邇可遠在茲所謂處市朝有
山林之氣豈非士人之雅致哉若夫芳菲逐流
蒙茸侵砌繁陰高蔭橫潦下奔月映波光雲根
凝素霜寒人迹冰壑含姿隱而虹飛明而練曳
四時之遇不同隨感皆其自得所謂取之無窮
用之不竭又非達士之遠覽哉至於體靜而洞
達無陂應妙而順適有常則尤執德遵道比諸
迷於利達驚於玄虛而稽之無實者清濁不侔
矣其稱名也小而覈其取類也大而遠予於斯
橋當並傳不朽也然余聞之道也者路也曲而
蹊徑衍而康莊阻而崎嶇濟而河梁皆行遠以
適國會通其義勇於進趨不退然中道自畫子
知所以圖不朽矣作石橋記

重建白雲茅屋記

余嘗讀羔羊之詩蓋思節儉正直之風後世不

可及云載誦衡門考槃諸篇想見賢達高舉遠
引悠悠泌水陵阿瓦然自得視世所謂富貴利
達何啻敝屣乃知委蛇安適非由意襲頤人寬
廣之懷其施于在位猶昔也滑臺宋先生當元
季衰亂掛冠歸隱築室瓠子堤上脩明性命之
學根極天人之奧彼其瞻睇行雲綢繆簷宇胸
襟洒洒直若與造物者動遊而靜俱故自題其
軒曰白雲茅屋旨哉無心之高蹈達人招曠之
遐思也值皇明更化詔詣公車負囊簪筆出入

禁垣傳經下帙陶鎔胄子 高皇帝聖哲知人

嘗亟稱之至擬爲尚文興周今去先生之世百
有餘年茅屋已就傾圯而故址猶存余問俗至
滑屬任令重建焉因竊嘆曰先生避世嘉遁蓋
將終身畎畝無復志于四方考槃衡門何其適
也已而際風雲之會翊文明之運開布芳華敷
宣教化敦朴雅素真足以帥先士類立懦廉頑
羔羊素絲又何足多耶易曰樂則行之憂則違
之確乎其不可拔夫必有不可拔之德而後樂

行憂違裕如也彼伊尹太公望之在商周浣渭
築巖居然山澤之癯丘園之賁也出則皆爲帝
者師孔明全性命于亂世南陽躬耕亦若忘情
天下者而三顧之後昭烈獲嗣漢統大抵皆卧
龍之功先生退不失已進不失時雖功烈未竟
其確然龍德固可槩見庶幾哉伊呂孔明之流
亞與則其遺踪雖與莘野渭濱草廬並名垂世
奚不可哉余惧斯屋雖更新後之人或不察吾
儕景行興復之意以爲侈觀而無益將任其傾
圮猶昔也故爲表著其事勒諸石

四賢祠記

往年劉中丞夔倅大名建書院以正學倡率諸
生祠宋劉元城先生其間已而漸廢城東故有
三賢祠廢尤甚守者奉狄梁公寇萊公韓魏公
主併內元城像前若祔食然事頗不典嘉靖庚
戌某承乏是郡謁祠下爲撤其像正謚號以定
神位然猶祠當公署之後路從旁入堂廡不飾
不稱崇奉之意明年督學山峯阮公臨謁顧某

等曰祠以報功德風士民乃令不稱若是盍啻
之已而巡臺古泉盛公東江楊公相繼至皆申
命如初於是謀諸僚屬屬李倅某董其役集材
糾工相地崇址闢門南向另爲一區直北爲寢
四楹東西序皆六楹左右翼以亭用覆記石南
爲堂亦四楹堂前左右復繚以庖湍垣屋重門
邃宇鼎建如儀東通上達樓又東通諸生號房
皆增飾踰舊費凡若干緡取給公帑無所需於
民間工始辛亥十月迄壬子二月某承命紀成

事竊考邵乘載四公事甚略念昔僞周釀禍唐
祚中移明大義以正亂世梁公以之宋勢寢弱
徃胡內擾定廟勝以攘外夷萊公以之決策兩
朝撤簾復辟魏公以一身任天下之重正色立
朝間關遠置元城以心學衍河洛之宗褒然功
德豈不膾炙人口以不皆魏事故畧據所載卽
三公皆一節及民元城僅數語合道何以繫人
深思歷千載猶血食茲土邪書曰懋乃攸績康
濟小民又曰民心無常惟德之懷夫惟懋績及

民而後民懷其德然匪立德以淑身烏能有辭
永世哉竊謂四公皆立德之士要非徒以才智
殊絕邁會乘時標能擅美樹偉績而永令譽者
也夫制事以才制才以德才德備而成賢執德
既弘致用自裕以典郡國則勤恤民隱而除其
害有循良之績以臨大節則托孤捍患保世滋
大有安社稷之勲以處患難則死生利害無所
移易有知命達化之識雖時異勢殊其于尊主
庇民之心致身殉道之行蓋易地皆然異世同
神矣立可久之德建可大之業夫是以永懷于
民假令僥倖一時勉強一事名實雖加於上下
道德不協于民彝則四公生不同時行不同軌
僅以仕于斯生于斯乃享祀一堂之上卽人無
異議神其居然歆哉夫褒功德以風民監察之
職也脩廢墜以飭治有司之常也勒諸貞珉紀
分合之故表致一之義云

魚異記

數年來吾郡人多畜魚于盆中其種鯽也大抵多

赤俗呼爲火魚其間有若鶴頂破玉紅頰白喙
朱鬣素尾陽背陰腹稱名不一皆號爲奇品尤
加意焉水伺其清渾食喂以鮮好時時察其饑
飫審其涼燠盈寸以上便可盛以金玉登諸几
案客至出相夸視以爲娛甚者一頭千錢不獨
里閭少年好事爲之縉紳士亦往往而有吾宗
問渠兄母陳畜魚二十餘玩弄旣久母歿哀毀
不忍視三月皆變爲白聞者爭往觀之訝其異
也比及去喪又皆變爲赤異復異矣相訝滋甚

余謂魚固善變物若火魚之變尤多方其始生
鰈然不異諸魚畜者羅小頰重飼之於是漸紅
稍長變爲白爲淺紅或紅白相半或相勝無慮
數十百色始定有名稱然率變有常候旣定不
復變卽變率班駁不齊今一變皆白再變皆赤
素縞同於居喪鮮麗逮其終制無知若靈人動
物合豈所養之食故異抑所變之色偶齊卧水
冬躍聞樂出聽中孚能及豚魚理固有余兄
率祖宗義方孝友之言無間誠感於魚志一動

氣不可謂偶相值也余既以一時俗尚爲異重
以所聞吾宗事尤異也是爲記云

省吾記

余昔業舉子味曾氏省身語僅及三事似未悉
人理迨遊京師遇司馬郎白子純夫取省吾自
號余扣之曰子知省之義乎省之爲言察也心
之神明厥有存亡是曰操舍之機行之事業厥
有安頗是曰吉凶之介人之聲實厥有聖愚是
曰嚮往之岐是故君子貴於省也三之爲言數

也日數省焉示不妄也謀道謀也謀國謀也安
而危險而易同而異是而非也勢交情交孚交
神交上下之交交也言傳心傳見而知以見傳
聞而知以聞傳誦其詩讀其書以文傳傳也忠
言盡已信言盡人習言人已之盡也盡天下之
人窮古今之變通物我之故約而博簡而該故
曰曾子之守約也則甚矣子之泥於章句而無
悟於理也然猶有說焉省之爲言損也察其傷
物而不詳則智可損文勝繁苦而見離則禮可

損志欲其堅損于銳量欲其弘損于隘躬不逮者損于言氣得養者損于暴以一損當百慮老氏之語玄也釋氏之語空也吾儒之言定靜而無爲也皆究極其損各得其益者也故曰爲道日損又曰天道猶張弓損有餘補不足省之爲義天道也奚其章句云云也余聞之渙然若釋知損之愈於察也因書以自省云

出師禦敵圖記

國家承平日久兵防寢弛一夫奮臂萬衆辟易

於是海寇縱橫焚劫無所忌憚而江南諸郡慘裂之禍無已矣當事者不得已招致客兵東齊之長竿百粵之毒弩非不足衝鋒禦敵迺犒饗不足飫其欲威令不能制其命烏合鼠竄曾無固志何則彼以秦人視越肥瘠不關於身也於是憲使李君始建團練之議編比閭族黨之氓寓伍兩軍師之法散則相維聚則相救利害切於同舟力并而勢合李君又身拊循之寬其約束不以無事見罷遇警一呼而集引以擊賊爭

奮出赴戰賊聞爲罷去闔郡恃以無恐人謂無
調遣之擾省資糧之供而坐收敵愾之功遠懾
倭夷之膽李君之功於是爲大作出師禦敵之
圖予爲記其本末如此

太尉楊公墓碑記

漢太尉楊公持身立朝大節載在史傳燁然偉
矣至於却故人暮夜之餽左膾炙人口千載之
下能使聞風者立懦廉貪豈非慎獨之大賢振
古之豪傑乎迺宋儒猶竊非之謂天固無知地

安有知嗟乎是可與俗儒道哉凡質稟天地之
氣性受天地之理君子率性必事皆中理然後
俯仰無愧參爲三才否則人極不立此身若無
所容於覆載間是故目視手指儼若森乎吾前
如鑒如臨聖賢所爲兢兢不敢忽也亦豈真有
指示鑒臨者乎察乎天地之理故知天地不可
欺通乎物我之義故知爾我不可欺析之有四
凡言一心不可昧耳此吾儒誠意之功充其類
義不可勝用矣漢世去聖人未遠所謂明經蓋

皆精研其義非若後世支離章句之末彼其晦
跡湖城數十年覃思竭智顧不解於天人大旨
迺漫作應對啓後世之多口邪史載諸所論列
皆根極理奧援經證事鑿鑿有據不可槩見淵
源之學邪潼亭公墓所在余守關之暇謁墓下
蕪穢不治心竊傷之既畧爲修葺建置饗堂築
垣墻禁樵牧樹石立碑使過者知所瞻仰重有
感於宋儒之說漫論其事表其學術之大者云

重脩太平府知府端敏胡公祠堂記

有明太子太保兵部尚書謚端敏胡公浙之仁
和人倣儻瑰瑋精研道腴蚤有志於經濟起家
進士正德間由南部郎出守太平以治行卓異
進江西按察副使蕩平東鄉諸盜時宸濠陰畜
異志公上疏發其隱謂禮樂政令漸不出自
朝廷江右大可虞不在諸盜濠怒誣公離間
親王逮繫京師傍掠陷死言官交章論救得戍
遼陽濠反伏誅值世廟繼統召起行間拜
按察使荐歷臺省列卿左都御史改兵部尚書

加宮保公以十事要說大意欲簡閱團營宿勁
兵京師謹防北虜又勸上親賢講學遠媚疾
絕嬖幸憂深慮遠顧以切直犯忌諱不盡用尋
謝病乞骸骨章數上迺許馳驛未幾復召起
適無疾卒於家儼然衣冠危坐不仆余時爲諸
生每望見顏色聆論議所聞平生經歷皆卒卒
未究其志惟太平最久無負於民死而有知猶
依棲麗江百粵間也頃余承乏蒼梧亟訪郡中
果建有祠歲時蒸嘗不失問政蹟則故老相傳

謂爲廉明博大在郡勸學興禮築城壺關綏柔
土夷功德不可殫紀乃作而嘆曰嗟乎士君子
所至策立勲業行德濟世豈希冀聲聞當時報
酬身後哉天地萬物本吾一體分誼當爲時勢
不可已凡以盡其心事其事吾何得而與焉惟
澤在生民功施社稷維繫人心自不可解則報
祀之典所由義起而非其立德立功之初心也
公昔有言殆亦自歎未竟爲謙無已豈意民心
歷久不忘洋洋俎豆之存適契其依依故民之

戀非夫精誠上下感應孚孳無俟勉疆若是耶
今江右有祠吾浙有祠公所謂不足人愈多之
稱頌勲伐尤彰明較著至所自信若太平郡治
能無想見循良偉績入人深遺思遠哉茲郡之
祠信不容已矣夫表先哲以勸官師存遺惠以
惇風教固憲臣奉揚公明命之職亦一時共事
同心乃檄郡脩飾棟宇嚴潔祠事仍記憶大畧
勒諸貞珉俾瞻拜祠下者知所愛慕垂世無窮
云

冲霄山記

蒼梧鎮城北枕大雲通星東聳金石西峙朝臺
南俯大江江上諸峰龍從羅列如屏如案舊名
火山謂其上夜光燭天相傳水有明珠又云南
越王佗埋劔山阿莫可考證居民往往戒火十
日不雨閭閻祈禳獻賽金鼓相聞問之曰火山
相對故多火災不禳疑有害夫山川興雲注雨
利潤民物故曰說萬物者澤終始萬物者山奚
不察夫山本有利無害而徒稱名之惑也山本

無名由人始名稱名自我乃妄意詫山惑甚矣
龍劔在地則劔光生蚪珠在淵則珠光生闇然
彰明若錐處囊中其末立見賢才處世亦復如
是邇年梧郡人才幾於不振顧茲萬山盤紆兩
江縈帶當五嶺之中挹九疑之勝山高水深分
野在牛女河漢間謂非渾融佳麗濶達宣朗不
可也其所疑結會萃於人者豈不然哉今學宮
坐對此山尤近余竊於斯有深意焉改題其山
曰冲霄冲傍從水霄上從雨皆以制火且不失
夜光之義既以解愚氓之惑重爲士人祝繼自
今賢豪奮庸雲蒸川涌用匡弼我 國家以道
德文章豐功偉烈掀揭宇宙不啻山川之光芒
上燭卽靈鍾秀孕焯爍霄漢不在珠劔而在人
賢矣既手書三大字勒石仍識諸碑陰俾生育
斯地者永以慰且勗云

奚囊蠹餘卷之十三

奚囊蠹餘卷之十四

雜著

貞女傳

夫詩首關雎重化始也孰謂閭閻微賤閩閩柔
婉非有詩書禮義薰陶母儀傳訓爲之桀護而
能矢心從一金石不渝非夫天理民彝率性爲
道者哉陝以西周召所嘗過化遺風宜爾矣作
貞女傳曰楊貞女者華陰通洛里人也年十六
父雄納潼關郭恒聘許以爲妻潼華之俗婚嫁

論財恒以不足於貲不得娶將牟利商販間遂
去入楚居楚又不能卒致羸益留滯楚當是時
人謂恒已更娶楚女潼華富貴人又爭致之雄
於是謀改適女女不可曰業已許女郭氏即死
不二矧恒在邪已又斷髮自誓雄既不能奪女
志訴諸縣令微諭之知持堅不可奪聽令自裁
女廼益深晦藏謝絕鉛華見聞屋故傍土崖即
崖半爲營窟獨處其中垂鉄繩攀緣上下女既
入輒引繩入窟雖家人不得仰窺端居不事事
亦無怨慕凡歷寒暑二十六年而恒還自楚時
女已四十三歲始成禮偕老焉

虎林生日語云輕諾寡信以謂已諾必誠不愛
其軀故重也延陵季子心許人劍即死不負千
古誦義豈非人之所謂賢豪者邪貞女巖棲穴
避若將終身垂老必借夙約一念誠信可與昔
賢比倫矣士君子竊許國之義貞潔之操不聞
甚者猶懷二心雖儒衣冠乎曾不若婦人女子
悲夫

跋畢子石祿命卷

夫五行之秀人得以成形性以多偏駁是故人
之難全也迺其清濁厚薄倍蓰異齊區別於輕
重毫釐間是所謂命而精微奧眇非夫知慮所
及也夫子蓋罕之至立教亦唯卽已定之富貴
貧賤夭壽曰是卽命示不得倖致苟免則已若
必一一知來曰回殤由厄賜溫裕瞿有嗣云云
豈惟聖人不能卽造化亦不屑屑爾是卷畢公
所推子石使君命理余三復之皆本所生支干

與歲運相值較量生尅平頗著爲休咎蓋諄諄
淵水之戒其要居貞順應俟命樂天非日者致
期取應淺鮮不經語此大易消長之理吾儒神
知之術可易易言哉使君大玄搆謙處睽敦艮
當顯仁之時深藏用之慮有以夫淵源之學寧
獨奉是周旋已邪媿余學易未能漫書嘉慕之
意云

跋廣居交遊卷

右先朝諸名公翰墨遺昔文襄公子廣居者

詞義婉變締好奚啻膠漆乃廣居明經登科兩
貳州器歷廿載沈鬱以歿夫文襄爲國名臣
廣居象賢登進深結巖廊爭相推譽稍一攀援
何慮通顯卒不爾諸公畧朋比公任使耶廣居
安義命薄榮祿邪世多種露我雲蘿攀驥附謂
能投功名之會比於廣居何如耶廣居孫一書
君攜卷出示妄綴斯言

列祖像讚并序

夫衍餘慶者本諸世積監成憲者裕乎

後昆儀刑儼若干永思繼述允懷于克
肖遺謀不遠垂範在茲迺擬諸形容丹
青猶麗而稽於蘊奧琬琰難名爰命蕪
詞庶存梗槩云爾

於赫我宗肇迹伊洛南扈宋躡喬止雄廓眷此
桑麻時奠耕鑿山川效靈一厘始拓迨我高祖
介然磊落識悉典墳文綺金臚高軼侯王遠引
巖壑玄真志魚孤山籠鶴帳底梅花杯中荷葉
七政周髀六經筭篋培我弘基啓我儒業偉曾

繼志温温恭懿忘已宜人以義制利勞矣謙謙
眇焉事事廊廟隱施丘園高賁卓犖不阿允毅
無愧伯祖嗣哲願巧於拙克勤幹蠱益振丕烈
百忍身謀一誠心訣荆樹同春芝蘭森列命服
晚榮薄揚幽節載稽永福內德孔淑桃夭化洽
蘋蘩禮肅朗宣四教敦睦九族歷世無間永底
雍穆昌我庶嗣而康而祿孰是開先貽燕惟穀
言念本源瞻此瑤軸

王處士像贊

繫何人兮貌古神凝若先民之遺直兮非予之
所識也是歌咏淳龐之天耕鑿沃衍之域喻郟
駟之逕馳眇紛華于蹴躔衍丘園之容與秘巧
慧于惛惛者耶古聞擊壤亦云抱壅隳匪斯人之
徒與溷泰履于幽貞覺冥蒙之幻夢者與

錢通政見齋像贊

覩衣冠之儼若挹謹愿之温然祿既厚以心下
齒欲邁而神全道協淳良業專名姓大德曰生
比權司命藏慧運神以隆休慶金液涵精寶餌

駐色馴鹿與遊靈鶴與息坦慮存誠以願中極
商山羽翼元功茂密巧隨秦俗與衆同卹斯金
門之大隱兮信通儒之仁術也

野亭馬公小像贊

質稟五行之純道通四聖之理宰邑倅郡時行
則行惇倫薄祿時止則止身世流雲功名敝屣
一觴一咏興有似乎陶潛見大心安樂不改於
顏子雖被服如飛仙寔縉紳之高軌也

曹隱君像贊

憶故老之芳風覲遺容兮孔淑似內秀而多聞
乃藏輝以示朴世女效利兮蠅營獨履仁兮龍伏
族狐疑兮啓嫌寧蠖屈兮終睦詩書開文藝之
先禮讓貽家庭之穀包荒媿逋竊之心苦節破
侈靡之俗信身潤而情逸式如金而如玉是謂
隱君子兮名無辱

自箴

人皆有善爾獨何長自用則小取善無疆好而
辟樂而荒辯而逞思而浪難持者志易隘者量

悔生於戲謔氣暴於徬徨務恬淡以久要遵易
簡爲周行正太自不屈無妄乃有常靜御動經
緯章同而異不易方守爾防休且光

養愚軒箴并引

大名郡齋後隙地半畝許中有小軒三
楹四隅雜植槐柳蒨蔚幽邃不減山林
歲久稍敝予蒞治之明年撤而新之事
間卽默坐其間時閱老子至爲治非以
明民將以愚之予愔然悟曰嗟乎凡今

之治功尚精明績著奇偉運智攄謀訛
非明民而乃去彼取此子云民可使由
不可使知唐虞之民耕鑿飲食忘帝力
於何有孰明孰知哉堯舜神化宣聖昌
言允協斯道非玄虛也因題其軒曰養
愚復作箴自警云

維天降才本無聖愚長無師友蒙困則愚取善
者聖自用者愚好仁無尚不學猶愚玄德大順
去智以愚至人處世藏暉自愚甯武奮大節以

成愚莊生蘊大智於若愚不徑不竇柴也固愚
默識心通回也如愚博聞彊記聊以破愚困知
勉行庶以明愚閑邪守默靜以養愚開誠布公
動以行愚念下民至神而匪愚畏上帝居高而
鑒愚徂詐萬端率我性愚喜怒千變任我情愚
人謀就我畢盡其愚我謀就人不欺其愚坦蕩
蕩兮予懷何愚閭閻悶悶兮予政何愚予將效古
之以直愚無寧襲今之以詐愚

孟銘六首

孟銘六首

八閩縱橫命將徵兵臣職監儲給餉徂征鯨鯢
旣獲武功告成恭承大賚永侈恩榮

嶺表肆征監軍會寧羸曠前除海山廓清效有
勞績仰辱綸音藩叅踈逖拜賜帑金

嘉靖癸亥蕩平閩海臣始與謀微勞見采文綺
輝輝南金皚皚三錫榮膺垂世億載

歲寅月酉節屆萬壽廷尉趨朝鵷班適遶天王
燕喜慶均且厚奕葉無忘顧諟銘鏤

皇極鼎新紫宸壯建星拱微垣天開別殿臣貳

司寇式瞻歡忭隨例頒恩無功顏醜
歲在丁卯始元隆慶疏鑿濟沛河渠底定徭役
督漕謬承恩命鎡金斯蕪襲衣孔覲

奚囊蠹餘卷之十四

奚囊蠹餘卷之十五

墓志銘

江西南昌府通判野亭馬公墓志銘

余外舅野亭馬翁以嘉靖庚申十一月十九日
歿先是翁自為志曰余讀陶淵明與諸子疏云
天地賦命生必有死自古聖賢誰能獨免逮卒
自為挽歌祭文謂非齊死生而委順達化者乎
予生七十四年居林下三紀矣百齡易促歸盡
有期愧以謏行微名曷堪昭世然前無所稽後

將何述勉爲志之謹按世譜系出伯益春秋時
趙王子奢號馬服君子孫因以爲氏世家河南
郡屬扶風吾宗實宋太保默之後思陵南渡扈
蹕家杭繼遷海昌代有顯者宋萬十一宣教以
功能祀于鄉始祖搢元嘉興路總管同知高祖
昭杭州路總管府判從伯祖維周海道萬戶世
祖用周繼同知後抱道隱處海門號則天真居
士子昭昭生辰辰贅于陸籍芳林鄉實爲吾曾
祖以字行曰子春生吾祖壽是生先考履齋公

廷玉蚤有文名格于時命應貢歷光澤教諭母
郭氏成化丁未四月十六日生宗俊于福州學
宮旣長傳家易學補郡學弟子員每督學使者
較文咸寘優等丙子舉于鄉庚辰下第以親老
乞就祁門教諭戊子釋先人憂補弋陽尋陞直
隸來安知縣壬辰三載考績恭遇 皇上元祥
推恩贈吾父如子官母妻皆封孺人甲午進江
西南昌府通判時母年八十餘遂以終養不赴
配張氏政和主簿錢塘張浩菴女淡泊同志白

首伉儷子男長行健早世次行陸女二長歸福
建布政司右叅政張某封安人次鴻臚寺司賓
署署丞沈董孫男亦龍縣學生本鳳岡族姪文
奎季子爲吾兒行健後孫女歸滑縣教諭程近
齋子淞業儒生平質任自持不逐時好簡言寡
交人罕知之始爲親祿仕終辭祿養親良順夙
心家居讀書厭入城府角巾野服人稱野亭先
生時有素心人萬鹿園李岫嶠相與往來庶幾
二仲或招之遊亦問往不爲絕俗雖兩罹回祿

室廬蕩然無所動於中也此先生自叙云爾先
生抱道守正澹泊無營宦游十餘年所至不私
一錢在初門以明理脩身率諸生揭紫陽白鹿
洞規衍以經傳俾知嚮往爲今日專務德化不
事法術盡革浮費尤謹貯積適歲大侵恃有備
得無流亡撫臺某行縣入滁過責供張至厲聲
色先生曰吏本儒素不習奢靡請伏不敏之罪
某慙而去自是心厭折腰歸思不可遏矣會有
南昌之命弃官來還圖書數卷泰然自足郡

大夫捧檄詣先生先生辭謝使者三終不肯受
獨靜處一室陳書摘藻卽朝夕不自謀其於世
俗交際炎涼毀譽寧有介於胸臆哉先生每自
比淵明其嘗爲文壽先生亦謂神孚於靖節今
以耳目覩記奚古今人不相及哉所著正學良
規衍義內典要言各一卷經濟記要一百八卷
野同集二卷鈎玄集四卷藏家所不存者倍是
次年正月十二日葬棲霞山新阡與張孺人合
孺人別有志不述述翁自叙與其生平大節如

右系之銘曰繫宗伯益輔徙吳越兮儒林世家
簪纓奕葉兮疇則天真沉潜道脉兮疇罹播遷
芳林穎脫兮光澤有教從政猶缺兮政教式兼
云胡宦拙兮世情固多違兮過自任高潔兮一
錢不鱗五斗不屑兮手著楊玄身僵袁雪兮心
機息物我兮性靈徹生滅兮遠比黔婁近方靖
節兮悠悠林壑信美以樂兮餘富餘貴不愧不
忤兮

朱近城墓志銘

吾杭故宋舊都當思陵南渡時扈從多中原人
故今著姓往往系出中原有以也錢塘近城朱
公其先亦由彰德安陽徙河南偃師已而入浙
五世祖德貴元至正間始籍仁和我明洪武
初高祖元亮改錢塘亮生賢累贈中憲大夫直
隸廬州知府賢生鏞登景泰辛未進士歷官廣
西右叅政鏞生淇淇娶廣南知府沈好禮女是
生近城公公諱桓字司直居故傍城隅因以自
號自幼穎異習父祖遺書通胡氏春秋值家中

衰乃弃去服賈勤約謹守不墜先業顧自以不
終夙志悉心教子嘗以已意微激之子竟以其
父書顯發身賢科爲州刺史先業益振公於是
盡解世累日與里中二三老人徜徉湖山間縱
飲自適刺史君又順承其意凡事事不以溷公
唯恣所欲用爲取給公廼時時得劇飲爲樂間
就屠浮談空寂施舍不吝生平懃直寡耦儻
不羈與人游雖猥賤亦得近就亢禮卽貴盛輒
遠避若將貌之刺史君嘗爲公輸貲司農授散

官公辭以野朴不稱取冠服深緘篋中示不再
着曰使我正冠束帶局趣作勞孰與持杯笑傲
陶然無營哉卒之日猶引滿如常忽就寢瞑目
長逝是爲嘉靖辛酉正月十八日生成化辛丑
九月二十三日享年八十有一余聞往哲矯世
厭俗失意自放多寄興於酒或遺形見性輪迴
生死輒托跡於佛世稱陶隱君白居易豈不羸
虫豪貴泡影人寰哉近城公宜有心嚮慕其人
視世銖兩貨財愁居懾處孳孳無已者不可同

日語也公配陳氏石埭司訓東滄公女先公二
十一年卒子一孫炎卽所稱刺史君嘗知江西
寧州有治行女一適龍南簿沈思孫男一建北
充邑庠生文學世其家女三長適禮部儒士來
棟次許龍溪丞王君子有道一幼曾孫男二金
鼎金殿女亦二是年八月日厝公大慈山之
原刺史君以余曩舉於鄉附君驥尾金鼎又聘
余女孫分誼良厚當爲公作銘銘曰物不在羸
所貴能享陶然樂生適詣心賞冠服匪榮招提

延想既壽且康令終高朗悠悠素風永遺企仰

陸靜泉墓志銘

余友高光州應冕爲其舅氏靜泉公作狀曰公
姓陸氏諱深字淵之本陸績之裔十世祖金自
汴徙浙遂爲仁和鉅姓世多聞人澤州刺史某
清河縣令某陝西右叅政溥其通顯較著者也
曾大父安大父俊父欽母陳氏生三男子公行
二少竒穎善記誦尤喜諸家方伎雜言稍長奪
於治生又多疾受方外吐納之術疾瘳顧益壯

卒不獲終業舉子然自是善應對無市井俚俗
之言進退容止非禮不行與人交溫溫無忤至
商確古今裁度利害往往出人意外家世貨殖
公臨財充廉不詭譎取贏家稍裕輒知止足益
簡約無盛麗態年六十召諸子曰余承先業幸
以節儉力行不墜茲老矣寧能復爲兒曹作勞
其拆爾居均爾資各事以給我餘年自是謝
世紛專意方外傳攝生益謹是歲滿八旬忽減
眠食諸子憂之公咲曰死生命也命盡歸化往

余謹自攝正以俟命爾徧與所親未訣沐浴更衣而逝始公出贅於陳陳又爲徐贅壻皆絕嗣公不忘二姓廟祀于家歲率三拜墓所六十餘年不衰鄉鄰緩急相投卽昏夜不以他故爲解遇橫逆輒挽首下之里人以是多公縣令文階舉國家優老之典躬致冠帶以示榮異公謹謝之卒布素終身誠非其好也生成化已亥六月四日卒嘉靖戊午七月三十日子三楷榘榘女配指揮僉事沈希渭郡守空泉公子孫男六

科稷穰種穩穆女八長適張楫次庠生朱建北次王長春次許凌登名次周濂次崔羽蛟皆名家子餘幼曾孫男一乘龍女三楷等以八年八月日葬公法空埠新阡公躬自卜築云余竊謂光州論篤君子所稱宜不誣不驕不奢守玄去智以完天年所謂脩道養壽非邪道家之用主於無爲故能清靜自正壽考無疆聞公勤慎不息應接周詳終不以衰暮缺望於人豈其方外之傳非夫老氏之旨庶幾哉知雄守雌深

藏若虛者與易簣數語知命達天異於徇物憑
生者已是用作銘銘曰利以義將死與生忘其
心布素不辱冠裳天錫遐祉既裕且康手築斯
丘樂哉永藏

顧玩川墓志銘

余往歲與今博興令介亭顧君同爲諸生從博
士受易相友善迺翁玩川公又嘗與余先大夫
游雅知顧氏今年玩川公以壽終介亭君還自
博興持惠州君所爲狀乞銘葬公誼不得辭按

狀公諱瀾字道卿自號玩川上世出洛陽扈宋
蹕南來家焉其後遂爲仁和人五世祖節明經
起家仕元爲翰林編脩有文名節生傑傑生臣
臣生義義生鑑鑑配金氏生公性固質直亦醞
藉暢朗杭俗奢靡奢故易傾公獨不務奢靡歲
時伏臘男女婚姻並視禮制豐嗇先世有遺貲
田廬兢兢守之居常稍自給卽不過爲經營優
游徜徉澹如也喜談世故疊疊劇說間作詼諧
使人傾耳解頤卒歸雅正與人交款款各盡其

意或杯酒殷勤雅歌投壺視塵世事若無介於
胷臆迺所與亦人人樂就卽處踈忘其分處少
忘其年尤喜揚人之美能匿人之過故里閭識
不識咸樂公長厚稱爲善士終身無怨惡於人
公有同母弟二皆蚤歿公痛悼無已厚贖其孤
生男子亦二量才授業伯宜賈令廢舉與時轉
貨貫仲宜儒令業舉子竟能用其長各有成立
介亭君旣舉於鄉仕爲博興令政先愷悌嘉善
矜不能於民亦鮮怨惡蓋公之隱施云晚以例

授七品冠服以非志不絢侈於交親生成化戊
戌五月三日歿嘉靖丁巳五月六日享年八十
配姚氏初有男子四人相楫皆先卒今存者二
曰材曰楫楫卽介亭君女四景州知州施繼祖
省祭官馮鵬姚鎰沈槐其壻也孫男六曰方立
交京克豪交京皆學官弟子女七徐立德陳素
望蔣仁王體益陳其且皆孫壻一幼曾孫男一
曰汝霖女三是年 月 日葬錢塘東山街祖
塋之次惠州君云我太史公家聲寔振起於玩

川爲義方克成令子於是子姓嚮風爭務儒業
始彬彬稱盛因思公優游無營豈所謂急先務
哉已通達世故故混跡閭閻若和同然所含畜
輝光以貽後嗣意念深矣惠州君公姪孫言舉
進士荐歷郡守所稱不誣云銘曰無謂優游克
振爾後亦若和同培積彌厚頤人之寬康以壽
子孫繩繩繁且秀鬱鬱故阡悠以久我銘貞石
同不朽

滑縣儒學教諭程君墓志銘

近齋程君者滑縣學諭也余嘗守大名滑爲屬
邑君數謁郡治貌既古朴著敝衣冠曳履緩步
無足恭論事侃侃與商確古今必出已見卽有
異同終不阿私所好余諒君質直署上考至事
他上官無異狀時撫按監司多名公謂余非私
亦署上考會三載黜陟余轉官西去不及行攝
守事者卒以無禮惡之當路罷君官滑人士立
石紀思王侍御璜重許可所爲文無諛詞蓋深
惜云歸無何忽忽抱疾歿君自信誠過豈出處

未達於命邪彼生死亦命也君絕筆云乘風歸
去來青天與白日則已洒然達化豈其不達於
命邪君諱鑒字應物一字于民近齋其自號也
先世由汴南渡世家仁和謝家塘數傳至彥亮
轉徙城東忠清里彥亮生歷歷生震震奉例輸
資授七品散官配柯氏以弘治庚戌六月三日
生君自幼穎異解音律技藝十二喪父家漸落
攻金養母輒先諸金工值數倍弃去為商往來
儲賤鬻貴與時低昂日就溫裕會當佺辦為邑

吏廷辱耻之嘆曰用貧求富農不如工工不如
商迺遠耻不如儒也翻然業舉子時年已及壯
人以為難君發憤誦習手一經作息不釋不踰
年西蜀劉公五清董學政閱君卷竒之選充學
宮弟子再試高等收廩餼文名藉甚自以取青
紫等拾芥數射策至七不中迺循次應歲貢上
春官謁選得獻縣訓導獻令每缺巡院輒檄君
署縣事君首表翟烈婦之寃建河間獻王碑築
尚林堤吊死問疾士民感服事聞上官數與優

勞五年遷滑縣教諭至則脩講堂立饌會建巖
岩亭日與生徒遊息其中又榜節壽堂嘉將孝
子新白雲屋表揚先賢脩畫舫齋編滑臺志士
民感服如獻事聞上官又數與優勞督學使者
既雅知君能文令得與弟子員射策京闈又數
不中以君才藝取科第直等拾芥然竟不一遇
真命也夫君生平不習容止無城府信而有謀
雅有口辯能解息紛爭人人樂與游事母孝處
弟友馭童僕有恩教人先德行敏而好學垂老

彌篤所著有胥談八卷遇品錄四卷易經擬議
四卷藏于家歿嘉靖丙辰二月五日春秋六十
有七配李氏生子男淞仍業舉子女二長適同
邑唐夔次餘杭蔣燿孫男三作梅作楫作棟余
憶往歲經獻君伺余傳舍曰安得出君屬下少
舒意氣已而果然逮聲稱既起幾望轉遷益舒
展意氣不知嘆者已陰乘其釁向令卑疵而前
熾趨而言屈已苟容遇正士不好苛禮亦且心
非面訾之同見斥耳孰與委蛇順適信其辯智

以直節終身哉宜無憾已 年 月 日 葬

君 山之陽銘曰振蠱耻貧明經耻賤客與

儒林其塞不變斯事在勉强沒齒無倦者也彼

科第終遺功名不遠植節守義逢彼險陷則命

途之困也又何怨哉又何怨哉

勅封孺人張氏墓志銘

嗟夫余於張孺人之亡重嘆夫阨窮憂鬱之難
堪在天道固不可測云孺人錢塘人政和縣簿
能之子南昌府通判野亭馬翁之配翁諱宗俊

仁和人父光澤教諭諱廷玉始二姓聯姻以同

宦閩中翁與孺人生不家食已而翁游郡庠孺

人來歸無幾何翁以明經登高科就教初門擢

來安令孺人每相從官中怡然適也迨遷南昌

翁母老子喪從此弃去盖四十餘年始就里閑

所值固已不憊然猶守故田廬謂能窮約終老

已而家人不戒故廬燬則舍田結廬甫成海寇

至萬戶煨燼所結廬又不免於是孺然無朝夕

計翁猶善自遣迺孺人女也性本嗇既不堪目

前又追惟往昔坐而嘆仰而思潸然以泣問之
顧大噉異常傷心甚矣數月而病病數月卒悲
夫使孺人終身寧謚之地安享有家之樂豈遽
至是翁誠達士至是欲無少介於中難矣悲夫
悲夫歿之次年五月六日卜葬棲霞嶺之新阡
翁命之銘意內行不外見惟兒女輩能悉也志
曰孺人諱某父政和公治行節廉別於流俗母
方氏以弘治癸丑二月十六日生其稱孺人以
翁爲縣令任滿奏最得封生平寡言語摠內聲

不外聞無故足不及摠外卽出見內親唯諾之
外無他語亦鮮笑容深居唯女紅是事刺繡精
巧人人自以不及翁其布素孺人亦布素數浣
數補綴晨昏針線不離指馬固著姓在仁和無
繁支翁同行四五人歿皆無後翁又中歲喪子
一姓累傳將斬然絕祀可爲寒心孺人迺亟爲
置妾不孕輒易之又擇海昌遠宗子立爲子後
授以遺書今已爲儒生克承世業所易妾果孕
子人謂翁德厚宜然寔孺人容畜贊翼所成云

撫群下嚴而有恩歿之日無少長咸歛歔流涕
誠有所以感之是爲嘉靖戊午正月二十有一
歷春秋六十有六所生子女二長歸某以嘗在
郎署受封安人次適沈董鴻臚寺司賓署承男
曰行健庶男曰行陸健早夭遺孫女一適儒生
程淞所立嗣孫曰亦龍曾孫曰紹源某竊悲孺
人於馬氏繼絕之功良偉不食其報而重以憂
鬱亡也蒼蒼豈有意乎銘曰人亦有言入門見
姤豈不而姤嗟嗟衰祚旣孕而孽亦繼而絕如

綫如飀以延世業已貴不驕其與素守廉吏之
子廉吏之偶胡畀窮疲蒼蒼不謬棲霞迥秀振
振爾後

鄭母吳氏墓志銘

歲丁未二月七日鄭母吳氏卒先是鄭母疾篤
其子布請禱曰吾自幼迄今備歷艱辛寒燠初
不謂禱祠神佛可免疾苦矧脩短有命吾老且
耄寧復求不死邪乃勸之進藥曰吾亦素不習
藥餌竟不嘗已而出其自製斂具次第言治喪

之儀一如禮蓋迨死不亂云嗚呼世人誦瀆鬼神徼福澤採煉服食希長生賢知者所不能免死者人之大閑也若鄭母者雖達人何以加諸吳本吾杭士族父某從父瓚舉進士爲州刺史起家母楊氏寔生鄭母年二十八歸于鄭鄭處士孟紳先娶於王天無出以吳繼焉處士出自南京太常少卿環始太常歿於官囊無遺貲而家被燬時處土方貨殖江湖間災且亟鄭母地奉其先世木主以避不恤其他里人以是莫不

賢知鄭母既而相處士克勤內政擁全既疊之緒乃堂乃構繩繩而栗栗焉誨二子習舉子常曰爾備家子也母令先業自爾輩斬遇夜讀爲事女工相其怠宵分不輟於是二子苦心勵行咸補學官弟子卓有文譽處士家世禮誼凡事先睦族及昏喪宴會諸事事大略遵倣古制不龔世俗鄙瑣鄭母實周旋其中俾疏戚豐約一當於法處士既歿其長子又歿凡歷憂苦忽劇終鄭母之身其先世遺風不衰余於鄭同里習

聞鄉人言如此子布復謂余曰母素稟剛方不苟
笑語遇下嚴而不厲稔不理於紛華不惑於
施捨無遽喜積怒故終身無隱疾則其平生殆
有君子之行宜臨絕不可亂也詎生天順甲申
十月二十三日享年八十有四處士以嘉靖辛
卯卒先母十有六年其行在司馬郎吳君所爲
志中子男二曰存曰布存亦先卒孫男四曰蒙
亨謙亨存出復亨震亨孫女二長許傳其次幼
俱布出布等將以是年 月 日合葬于處士

墓墓在石壁山原祖塋之次銘曰終始天其運
乎修短命其殊乎曷斲其真而任其愚疇女質
而行儒達哉令終素心靡渝石壁高原君子是
俱於其永安以娛

廣東雷州府知府箕泉王公墓誌銘

雷郡太守箕泉王公諱子卿字元案上世籍錢
塘後更仁和今爲仁和人由邑博士弟子員以
通毛詩舉于鄉卒業成均授靈璧令擢南京大
理評事進右寺正值母喪還起補大理左寺正

尋出知雷州居歲餘勞瘁疾劇解官歸歸四月
卒夙賦清令爲文雋永精思髫年卽名聲籍甚
與余爲金石交當是時余弟中丞濂許方伯應
元童憲使漢臣方郡守九叙高光州應冕朱寧
州孫炎咸號才子竒特振奮浮英華湛道德同
爲諸生相友善已皆仕有祿秩公凡五上春官
喟然曰丈夫表見當世豈必盡出甲科哉遂試
吏靈壁境故多豪右宿猾爲鈎稽剔刷義厲而
仁柔之令行化洽卽專意拊綏又被飾文墨隣

境寇猝至邑素無兵人情洶洶公募士馳騎往
來蹂躪城下飛塵蔽野賊望見疑備嚴引去因
襲擊賊賊潰事聞拜中帑金之賜部使者廉其
實數上章列公治行卓異宜召拜清華於是有
廷評之擢舊都事簡公暇偕同志尋幽吊古篇
什日富在雷首却供億之費期以節儉導民黠
寇羅漢卿吳平剽掠海上公旣繕城郭嚴保甲
捕得賊嚮導寘之法民以無恐乃間招吳使圖
羅自贖羅果成擒寘陰剪吳翼將併薙刈無難

也功未就而寢疾彼其意志所注概可想見郡
民今爲建祠奉嘗非夫保民捍患之功有當於
人心哉公天性孝友事父槐庄公至刲股療疾
供奉後母不異所自出每推羸周急甚者依之
居食歲久不厭尤善交人嘉善矜不能所與遊
遠近厚薄莫不意滿摘詞染翰秀麗可傳所著
秣陵稿鼓檝浪言山中集旅寄冗談棘臺雜味
已粹行在篋者尚不止是公生正德庚午六月
二十日歿隆慶丁卯三月十八日春秋五十有

八槐庄公諱浩贈文林郎大理寺評事母羅氏
繼蔣氏贈封皆太孺人並以公貴祖輔曾祖惠
高祖橋皆隱德弗耀豁達慷慨振家聲啓儒術
實自槐庄始云配沈氏封孺人生子男三長紹
科太學生蚤夭次紹名邑學生次紹賢女二長
適鄭斯麟次張杞皆邑學生孫男二錫胤錫祚
孺人先公十年卒繼亦沈氏將以 年 月
日塋赤山埠之新阡憲副臯亭姚公以公仲子
爲子壻狀行甚詳余憶附公驥尾締交三十餘

年無纖介抵牾往歲待次銓曹公方下第就選
人有招公謁政府當得美除予聞亟勸止之公
毅然曰何往非自效地敢徇時局妄希冀乎竟
得令邑後余後西鄙橫被口語公時在棘寺孜
孜爲余述平生辨詆挫不啻身鱗而自解也嗟
乎世情言逆耳不相入懷忌嫉相機陷往往而
是公篤信不惑白首不渝所謂金石之交非耶
昔蘇文忠哭文與可謂不疾不徐不可得而親
踈文雅緼藉公奚忝於斯言媿無文忠之詞表

公貞珉然奚忍以蕪拙解也爲之銘曰溫溫儒
宗力不勝折衝何南金之純而利干將之鋒綴
文馮馮耻行不逮躬何屬詞之麗而執德之弘
開芳懋實敬事庸功怙恃情深金蘭永終河陽
頌岳渤海思龔輞川風雅逸少精工媲美兼資
垂世何窮豈直一節之士一藝之雄已耶

參將明溪周君暨配謝氏合葬墓誌銘

余蚤歲與兄風山光祿弟子清中丞同受經鄉
塾一時皆英特士而參將明溪在焉已各駁駁

貴顯明溪獨偃蹇不偶 世廟庚戌後四方稱
兵加意武備往往起閭閻韋布之雄立致將帥
於是明溪走都下當是時同宗容齋京已仕為
錦衣都指揮使因隸籍登武科尋以騎射韜畧
舉會試第一名動京師例授錦衣副千戶未幾
進指揮僉事守備贛州以功能再進都指揮僉
書吾浙專閩東省拜鹽城叅將再奉 璽書移
守嶺西高肇等處不數載累官三品不啻貴顯
崇盛矣豈非遇時而命也哉何前齋後豐也迨

余督兩廣諸軍明溪為裨帥一見輒稱病余察
知病狀方圖請易會有被逮之報覈之頗不得
實心跡既白而明溪卒抱憂憤以歿悲夫功而
得過信廼見疑古今聖賢豪傑所不免獨一明
溪哉明溪姓周氏名螯字嶸伯世仁和人曾祖
全祖信父傑母毛氏正德乙丑七月三日生賦
質清粹通朱氏周易義善詩文作真草書遒勁
有法性孝友事兄平溪巒終始無間為將多機
警馭下恩威並用孚心士卒故屢有平定功在

顧日威行諸山寇不入境浙中酌議屯政切中
時宜鹽城弭盜防倭保障允賴嶺西平尖嘴等
巢搗黠酋全仕侈等寨著績殊偉紀功者聞于
朝兩有白金文綺之一賜督撫巡臺庶其才咸
薦獎之若御史大夫南岷王公司空鎮山朱公
司馬自湖吳公推引尤亟陽春之後余猶勉以
力疾終事而疾劇竟不可強不知者方以避難
引疾疑之彼敘功受賞彰明較著如此顧云罪
浮於功曾不知中於謙者之口欲以服將士之

心作遠臣之氣豈不難哉元配謝氏詩人可山
惠之女婉慧貞靜主中饋旁及書筭技藝靡不
通解始可山本奇其女一見明溪輒又奇之竟
以女托焉處窮約以勤儉濟其無遇拂抑以命
數寬其憂當遠遊以振奮鼓其氣迨利達以患
害惕其衷至於謹祀事端闔儀相夫子匡不逮
馭臧獲均慈惠教胤子用義方凡此可謂克全
婦道矣嘉靖丙寅十一月十四日卒於家距生
正德庚午春秋五十有七隆慶己巳十一月十

八日明溪卒南雄道中春秋六十有五嗚呼明溪挾儒術以待聘卒不售而以武功顯誠命矣其不遂首丘之願與淑人敦篤懿範而皆不享壽祺孰非命運天定豈必憂怨能傷人哉子男沂隨征有功劄授冠帶武生女適順昌唐令子佐孫男某女二沂聞訃奔粵奉旅襯來還併舉淑人柩合窆焉因風山兄來乞銘且跽而泣曰遵遺命也余不忍辭爲之銘曰困維心亨豈不偶不知其人視其友錦組輝煌絢當晝蕩滌氛

稷勲伐茂煩言爍金內何疚我生不有命途邁武功既究文亦售婉懿同封世相守巖壑廻環洵明秀堅貞不磨銘不謬

大理左評事少渠張公墓誌銘

大理左評事少渠張公以隆慶己巳秋七月二日卒里第其明年冬十二月嗣子嘉穀子壻徐嘉成奉沈孺人之命將卜葬西山之陽乃持五橋徐公所爲狀詣余徵銘余拙且病辭至再終以同榜故不容已廼按狀爲志曰公諱鳴鶴字

九臯先世由汴徙浙隸籍錢塘高祖信當我
明太宗朝以明經起家歷吏部考功郎中曾祖
璘以子貴贈刑部員外郎祖銓由進士歷廣西
布政司左叅議父一源通陰陽五行家言例授
徵仕郎娶陸刺史女生五丈夫子公季子也賦
質穎異不類群兒授之書即成誦屬對句語意
諧徵仕公謂能繼家聲乃收先世遺書悉畀之
未幾失怙家益貧蓋累世雖宦達皆不黷利治
生無以貽其後故至是窘迫無聊昆仲稍稍去

爲商販自給公獨枕籍簡冊間誓死不渝當是
時楊水部南泉亦貧士妻公女弟共治易相與
砥礪游揚齊名里中先後補邑庠弟子員小試
輒高等廩食甲午歲公舉于鄉南泉亦應貢舉
京兆一時爭羨此兩人同志善相成也數上春
官不第至癸丑廼喟然嘆曰丈夫樹立勲名豈
必自科甲出哉吾兩人文不相下而彼信我誑
命也於時謁選銓部授定遠令邑東接廬江連
楚粵北走徐方達京畿當通道盜賊充斥豪右

梗化公宰制有術令行禁止四境又安值倭寇
犯淮甸將窺濠郡守以邑城堅且有才令悉載
貯積歸邑公密藏之陽取所盛器實他物遣還
示不納狀賊兩相疑懼去郡邑俱賴保全居三
歲餘諸臺多獎薦乃有廷平之擢既去攝邑者
故嘗有釁惡之當路得調外令曹在曹政行不
異定遠郡丞某方恣橫他屬咸順承不給公獨
與之抗故爲裁抑某深啣之又惡之上官竟罷
歸已而某卽攝曹多方媒孽不得漫坐私取贖

金移檄逮問公往自白實無私取事明某亦罷
去卒以是橫被口語甚者謂嘗侵河渠公帑同
宗一二輩不察事理亦呶呶相侵公雖置不辨
終鬱悒不樂抱病數月歿生平高自許丰儀整
飭見人冠不正衣不潔若將浼焉持論率出已
見不固從後言以此寡諧喜吟咏晚歲與鄉大
夫結社倡酬研求彌工親族緩急相投輒爲蠲
資殫力不悛知厚以此多之距生正德丁卯閏
正月二十三日春秋六十有三配卽沈孺人子

一卽嘉穀本弟鳴鷲次子以倫序相承女二一
贅嘉成卽五橋徐大叅子五橋亦同舉于鄉雅
相厚善一幼未聘於乎委蛇諛悅巧慧獵榮紛
紛欺世之術何可勝道顧直任其性甘犯訛怒
不顧豈所謂經德不回抑質稟所近多剛毅寡
柔克耶卽其宦跡行事亦既快壯心起衰祚矣
余獨憚少渠才有餘而惜其用未盡也銘曰孰
阿儻兮巧媚獨強力而任質務賤人兮貴已砥
峭峻以自適豈拂世兮摩俗甘翁訛其何恤紛

坎宮兮躡予懸輪轅而不飾嗣猶子兮靡獨振
清聲乎雅什莽林壑兮穹封貢斯文于玄室

奚囊蠹餘卷之十六

墓志銘

崔淑人李氏墓志銘

李淑人者指揮同知龍橋崔君繼宗配故指揮
僉事竹軒琳仲女也李系出中都崔出太原其
先皆皇明開國功受封杭州前右二衛世襲茲
土遂以聯姻吾杭俗固侈世胄之族恃有祿養
尤耽逸豫往往恣為奢縱以是衛所多自相婚
姻豈故遠別於士民哉然余從弟子明實為龍



橋壻龍橋飾武以文恂恂士君子也故雅好吾
弟儒素崔又少貧其舅氏李亦畧崔之迹而好
其文是豈尋常徇俗之見已邪本諸二姓可以
識淑人之賢矣按狀淑人諱瑛母蕭氏恭人以
弘治乙卯六月廿有六日生年十九而歸於崔
時崔翁樂閒以謝病屏居歲久無以自給里宅
久廢僦居民家徒四壁立淑人日黽勉中饋固
不戚戚俄而樂閒公卒凡棺槨衣衾諸歛且悉
出簪珥易之龍橋藉是得終大故如禮旣而龍

橋襲今官淑人謂祿當萬戶侯宜不為薄何至
以朝夕為慮迺節浮費量出人罄其奩資兼積
俸餘分命家僮貲貸以牟什一又親為籍記稽
其盈縮竟以是獲稍溫厚俾龍橋無內顧憂淑
人兩舉女子生男子輒不育憮然語龍橋曰吾
聞不孝以無後為大君今四十無子不以此時
畜媵妾廣生育將忘滅祖宗汗馬勞耶為擇宜
男者二人已而果生子時龍橋始拓故居增構
堂室門第煥耀子女充閭淑人亦不色喜猶勤

儉如窮約時值有子妾喪淑人嗚嗚泣數行下
蓋傷呱呱失恃所憂念深矣三日而淑人亦歿
是爲嘉靖丁未九月八日年僅五十有三嗚呼
葛覃樛木之風遠矣佚欲裕豐妬悍離家殆不
可一二數矧出世祿之家自富趨貧轉貧爲富
終始不渝若淑人者能多見哉竹軒公義方之
訓龍橋君刑于之德咸可徵云所出二女子一
歸舉人張洵卽吾從弟一歸武舉鎮撫陳善道
庶出子男二延齡延德女一許配李萬秀歿後

二載爲嘉靖己酉八月八日葬于錢塘玉岑山
之原銘曰豈曰無祿捐此金穀豈曰頽齡遜彼
小星振爾族渠渠夏屋介爾福森森樹玉食報
未幾奪何速延爾百世思賢淑

長姊鍾室張氏墓志銘

吾長姊歸鍾君梁以壬寅歲遘疾卒時余爲郎
京師不能撫棺盡哀悽然傷心久之已得鍾君
書謂已筮地將歸藏焉宜有文以垂不朽願遂
志之余旣痛不能言卒不忍以余不文使吾姊

壺德媿行無聞於後也爲記憶作志曰姊諱某
吾先世汴人扈宋蹕南遷居仁和家世累仁集
義多聞人吾父封承德郎工部主事亭山公諱
某配封安人李氏是生姊姊上有三兄皆蚤世
姊生吾父母殊愛慎繼得諸弟妹慎逾于初姊
能周悉調護解衣推食以體親心十歲餘卽儼
謚穎異宛如成人年十六而嫁鍾固鉅姓梁值
少孤家業中衰吾姊以勤儉相喻凡經營貨資
工作餼廩爲之籍其出入羸縮旦夕劑量心煩

于慮而身親其勞乃鍾子亡內顧益脩藝飭行
卒幹先人之蠱云歲癸未生子炳丁亥生子燿
吾姊皆口授書稍長遣就外傳俾習儒業嘗曰
讀書明理脩身匪直襲榮名銜鄉曲祇曰富貴
利達云爾於是二子篤行力學卓立不群孝友
尤深率母氏儀軌庶幾古人風焉巳亥吾母病
疽劇姊憂懣亦疽發乳吾母奄逝姊傷痛疽日
潰再踰歲竟以不起是爲嘉靖廿又一年三月

二十三日距生正德丙寅春秋三十有七吾姊

生平寡言笑性敏慧通小學論語諸女史善楷
書尤精刺繡纂組一切女紅事姑祖姑極孝敬
卽嚴厲過責亦勉底豫卒以孝終嗚呼吾姊事
親承歡相夫克裕愛子能誨德宜壽也竟以天
邪往見炳燿侍吾姊疾歔天變食割臂充飲歷
久憔悴骨立吾謂孝感必應竟無益邪天道遠
邇不可測吾姊獲報寧無期邪悲夫鍾君以歲
癸卯十二月 日葬姊于 里 山之陽銘曰
秉懿永嘏若淑罔不昌胡俾之殃貽厥嗣人開

爾芳宜此玄室兮有耿光

仲姊墓志銘

余先大夫有子九人其五女也所擇壻皆名族
儒生往歲余爲郎京師不二年三姊妹相繼夭
歿所存仲姊少妹仲旣蚤寡少又差貧傷哉同
氣之感已昨秋余自西蜀再如京師寡姊又歿
於家歸而哀之蓋悲吾姊竟以憂戚亡而重增
今昔之痛也踰年李甥柱馳書閩中將以辛酉
歲十二月 日附葬姊於李君之壙乞余爲銘

嗟乎余誠不忍銘忍令吾姊無聞邪姊張氏諱
德良父工部主事亭山府君母封安人李氏嫁
爲太學生東壁李君妻東壁父曰槐軒公母顧
氏初槐軒僅有子東壁愛甚於勞東壁本個儻
不羈雅志高遠爲郡博士弟子員厭苦約束輸
貲入國學益廣交游侈聞見於是增構堂室
多畜妾媵欲以高門戶蕃子嗣姊皆委曲承順
不拂其意庚子姊既喪所生子東壁又客死濟
上計至姊泣輒欲絕旣而強起曰吾死無足惜

獨不忍李氏百世之祀一朝絕也徧召族人咸
謂兄昊有子宜嗣族固多欲爲東壁後者姊排
群議竟立昊子未幾天復以昊子繼之卽今李
甥柱寔順序當禮故不可奪也姊愛若已出稍
長教以儒業妻以余兄光祿公子兄固儒生姊
以婦似姑且兩世一姓肺腑之托滋重所爲培
植李氏計念深矣姊以三十而寡含荼飲血以
緩湏臾死者徒以柱在庶幾成立而養不逮悲
夫吾姊生慧婉先大夫愛逾諸男里有紐媪通

小學孝經女史先大夫延之家以書授姊盡得其指卒用以自淑雖猝罹凶變百務總總如蠅終安定不亂忍死存孤以保世業天植純懿誠異亦教敕漸潤有素也生正德庚午二月二十八日嘉靖庚申九月七日卒年五十有一東壁之喪先姊二十年所生男女五人多不育今惟二女子壻曰金佶邑庠生光祿少卿廷瑞之孫曰朱民建昌丞壁之子孫男一 銘曰內則是依外傳是資令德令儀于時于歸天不勅遺逢

此百罹矢死靡渝繼絕持危爾宗百世繩繩自茲禮義詩書能忘爾貽

仲兄雙洲公墓志銘

余先君馴行孝謹口不言文章道德心切躬行身處富貴之中而樂朴素與閭里人游雖猥賤至忘爾汝閭里人其喜無驕氣親就亦忘其形又周人之急拯人之難舉貲於人往往折券棄責蓋坦然篤行君子也識者謂天道常與善人宜享上壽已而不踰七十仲兄雙洲公號克肖

子其積行累義恂恂浹洽動合先人遺架人謂
公卽不上壽當與先人同筭無疑歲甲子纔五
十有五忽病疽不起嗟乎是天之報施善人非
邪次年余還自京哭公靈下因憶公平生爲志
曰公諱某字子易別號雙洲世仁和人工部都
水司主事亭山翁仲子也幼與余共學業舉子
不相入去爲商又不屑勤銖兩計羸縮歸自念
曰吾幸有先世餘貲稍自約當不乏朝夕何迺
營營自苦效墮斷丈夫爲於是躬搆居室內外

整嚴有隙地卽樹藝草木灌花洗竹以爲娛客
至布碁局命尊俎雅歌投壺終日不倦或起興
深酌舉觥高嘯客非其任不力彊取自嚼之盡
醉乃已二三十年之間極遊燕之樂恣湖山之
觀偕昆朋之好扃幽曠之襟絲竹之聲不乏于
耳芬芳之色不絕于目其鮮之味不靳於口移
寒易暑不知老至名何必列儒林家何必多貨
殖悠悠樂事亦已偏矣邑有無賴丁某介其黨
求貸公輒舉百餘金與之去三年來還途遇公

日遠行良苦得利將三倍邪丁咈然去明日赴
御史臺訐富豪以高貴謀女爲妾女美而良不
願奉箕箒豪逼之父于命不保矣時御史某好
嚴刻往往以微事夷滅鉅姓亟檄郡收訊實無
女也御史終不釋強郡勿理誣執亦不償宿逋
一時稱寃而公竟不求直客有爲公致冠帶之
檄者公感其意不直拒亦不服以示榮非所欲
也公所友善傅給舍虛岩周侍御蜜菴高光州
潁湖沈比部南泉王豐城毋山每每過之歡然

不忍去從弟中丞濂寡群於鄉雖宗黨亦鮮親
昵兄獨與相敬愛皆樂其質行無僞簡易可親
也公娶柱史吳萬松女生三子楷檉皆治周易
爲諸生櫛倜儻克家諸子稍有過不譙讓第愀
然見面目更卽頤解如故於是諸子之率益謹
有四孫某皆幼生正德庚午十一月六日歿嘉
靖甲子八月六日余竊傷公之脩身善行而食
報未獲其常也悲夫楷等將以

年 月

日葬公山之陽余謹銘於墓石曰思昔先子

不言躬行惟余仲氏克嗣令名耻彼壘斷快我
生平樹藝適意枿矢解醒貧交不厭達士心傾
由由與偕不失其貞枉不求直寡不務羸疇曰
未竟視厥所生疇曰未揚問諸鄉評千秋萬祀
奠此佳城

明處士彬齋李君墓志銘

余母贈淑人李出錢塘世家素積仁累義大父
榮號存德存德翁凡二男三女淑人翁少女也
長男龍溪禎次桐塢祥龍溪公配高氏是生彬

齋應文字子質少穎敏與余張高二姓兄弟行
若光州刺史應冕暨余輩同學爲儒業漸知趨
向矣值父喪家且中衰竟奪其志世遺坊里之
役方弱冠委身任之令以爲孺子解事不怠終
不犯令怒已乃薄遊吳吳中樂其和易所交接
多文墨士則又如梁楚入京師由金陵浮沅湘
自以快賞心因之量緩急通有無牟十一之利
庶幾俯仰無累克復舊業輒飄然歸更不復出
時母氏春秋高桐塢公又無後獨處彬齋皆曲

盡孝敬各得其歡相繼壽終殯葬如禮性好吟
時時咏歌適意嘗曰詩本自然之聲亦有自然
之節本乎性情隨感而發從心中律審其疾徐
協於音調信指合拍其亟稱高光州贈遺諸篇
謂雋逸有巧思效法中唐樂護不爽分毫余詩
直率已見澹薄無色相詳味其旨若有妙悟凡
得於性靈與其交游浸潤非必學力能然也夫
里閭少年不得爲儒生卽恣睢罔利不知詩書
理義爲何物甚者淫蕩不檢頽其家聲往往而

是溷跡高賈之中雅有文藝之好彬齋信有足
多者比其歿也子先春走使淮甸乞銘墓石余
素知君且遺言命其子必托余言爲重悲夫余
言卽不足爲重忍負臨絕諄諄語哉距生正德
甲戌十二月二十一日卒隆慶元年正月十三
日年五十有四配顧氏子一卽先春女三長適
陳三綱次張治次葉懋林先春陳葉皆業儒孫
男一景葵西湖佳山水處龍山鍾塢之陽銘曰
仁里德裔夙諳道藝聲詩天畀慧心妙契遨遊

事事幹蠱用譽孝親不渝敬長克弟斯焉取斯
三姓相倚龍山佳氣潛臺是秘延休世世

明文林郎廣西潯州府貴縣知縣半村夏

公墓志銘

公諱美字宗美先名某以避

世廟諱入仕後

乃改從字別號半村其先隴右人唐濟國公魯
才始遷浙之慈谿歷五季宋元代有聞人入明
若大理卿時正其顯著者也自千秋遷定海又
五世爲南京刑部郎中與誠始遷仁和生承事

郎醇醇生翰林侍詔杞配賀孺人次金氏生公
少俊偉敏慧垂髫習禮成童授詩總髮游郡庠
補增廣生援例入南雍獲友四方英彥屢試上
等嘉靖戊子謁選天曹授貴州按察司經歷貴
陽地雜苗夷風氣稍異中土公在司幕以能稱
兼理有司之事如繕城池練兵馬運糧餉審軍
役點營堡理刑獄皆地方重務委攝都勻值凱
口烏撒土民相仇殺公躬歷其巢宣示朝廷
恩威咸感激聽撫按交章旌薦有才猷練達

操履清直等語乃擢貴縣縣務久弛至則振刷
脩飭首先學校治故瀕江城郭湫隘學宮舊在
郭外自內遷後久鮮科第公開拓舊址徙而新
之士咸感奮自是科目彬彬有人龍山三里徭
徭向梗縣化公爲建三老給以法服申諭禮制
遠近歸心遇徵輸以羊革裹糧相從邑中旣駭
且頌蓋前此未有也東橋顧司寇寄贈以詩有
看取漢家循吏傳獨憐卓茂最知名之句任凡
三午屢列薦牘會當考績有土官陰伺之遂愾

然歸次東津驛賦詩云雨霽東津日未晡洗添
新綠岸頭蘆而今歸買西湖棹不向潯江聽鷓
鴒歸田後詩酒自娛構小圃藝蔬種樹掩映書
屋自題曰習懶歸彭澤遺安卧鹿門親友相過
談碁論詩出所藏圖書把玩任客去留皆樂其
率真卒無忤也善吟咏垂老不廢蕪及繪事亦
如其詩有半村稿藏於家先是濟國墓在慈谿
夏魯歲久漸廢公歛歔憤嘆控訴於官勞瘁十
年盡復舊業乃已嘗誨諸子曰吾家自比部占

籍仁和已而廷尉內翰鷄澤孝感英山後先相
望吾獨不能繼述汝等其勉紹家聲今子若孫
果奮志有聞嗚呼公可謂克承世業貽謀允臧
矣距生弘治癸丑三月十九日卒隆慶丁卯七
月二十八日享年七十有五配鄭孺人生子男
三長垠次邨次培皆業儒女一適大理卿東瀛
陳公孫文灝孫男九鉉鏌鏘鈿鏞鏞鏞女十陳
香陳重光虞九經其壻也餘與曾孫女二俱幼
垠等卜以次年四月六日附葬於八都三峯山

之陽從先兆也銘曰植本厚其末茂勲伐售視
厥後於赫濟國開先良舊衍及仁明文林應宿
通矣膚功塞焉解綬貽厥未究其胤孔秀信無
德弗誦哉

明杭州前衛中所正千戶麓泉陳君墓志
銘

嗚呼是麓泉陳君墓也往余別君吳山里第時
方病風差瘥猶談咲引滿眷眷與決別未踰年
君竟以是不起悲夫君有投筆請纓之志今已

矣時四方多事 聖皇拊髀思將帥之臣以君
才智假令乘時見志曷功闔外所就顧可量邪
悲夫按狀君諱官懋字子政麓泉其自號也先
世居德安七世祖端賢由元進士倅括蒼因家
剡端賢生隆九以功授紹興路總管生紹興守
禦使勝明興奪勝官編籍杭州前衛遂徙居錢
塘傳至奉政公昱以子東瀛公珂貴贈刑部郎
中東瀛公起家進士歷官右副都御史進大理
寺卿娶淑人王氏以弘治己未八月八日生君

自幼英敏倜儻有大志涉獵經史不脛脣章句
尤好左氏春秋及孫武子兵法弱冠隨東瀛公
任閩中值盜起大帽山郡縣不能制君乃請從
擊賊賊平上功幕府授本衛中所正千戶未幾
湖賊湯毛九等匿安吉山中四出劫掠時大方
伯何公天衢廉君才檄君專捕緝賊果就擒功
聞得拜金幣之 賜已而東瀛公解組歸君亦
弃官屏居時諸第咸幼君獨綜里家政一切事
事皆身親其勞不以煩於親慮以是東瀛公得

無內顧優游林壑未終天年寔君孝養以娛悅
其志也迨東瀛公歿王淑人亦歿君喟然嘆曰
余昔有狗馬之心冀効尺寸時平莫展其伎將
啻所以自適繼先人之志惟吾子若孫耳迺築
室西湖之曲題曰漁隱約二三知舊定爲社會
觴咏爲歡又時訓課諸子俾興於學今其子若
孫果皆明經績文補學官弟子咸彬彬知奮云
君生平和易易親惇睦宗族周卹貧乏謹祭享
樂朋好處富貴善自謙抑士大夫咸以是多君

樂與之交然直諒不詭不妄悅人疾惡幾甚故
群小不無少訾君亦終率其性弗恤也嗚呼君
簪纓世家所居易溺乃一念啻惟樹立不忘報
國承家雖數竒不遇然猶出其十一明試功能
再受封賚非泯沒無聞矣世乃有游閒公子
藉世祿之資紈綺膏粱侈然驕其里閭而審其
智慮曾不能辨菽麥視麓泉君何如哉君歿嘉
靖庚戌九月三十日春秋五十有二娶張宜人
生子男四長文翰次文灝文濟文藻孫男五長

椿餘尚幼濟藻椿皆生員濟先君卒女一適余
子懷孫女亦五一許白戶侯子某餘亦幼歿後
二年爲壬子歲 月 日文瀚等將奉君柩葬
南山楓篁嶺之原從祖兆也銘曰南山有虎其
變爲豹文豈不耀武功是効旣懋厥功亦繩厥
宗高蹈令終頽靡以風隰有脩篁原有青楓維
子之宮垂蔭無窮

明贈徵仕郎中書舍人玉泉林公暨配贈

太孺人張氏合葬墓表

贈中書舍人玉泉林公諱竒字子俊世爲錢塘
人高祖贈通議大夫太常寺卿仲英英生才才
生秀秀生靜得處士巒巒有儒行宮保尚書胡
端敏公剛正寡交獨與厚善娶施氏生公與異
母兄宏爭相淬礪補邑博士弟子員飭躬善行
懋學績文聲藉藉起質本清癯重以勞瘁傷心
嘔血忽忽而歿性曠達不事家人生產作業舉
貲於人負者多不較事親孝處昆弟友與人和
易可親鄉人無遠近少長咸敬而愛之卒嘉靖

丁酉年僅三十二配余姊贈奉直大夫吏部員外郎應禎長女奉直公雅愛之擇所歸適玉泉身出世家嫁爲世家婦絕無驕泰事舅姑相夫子克慎於禮玉泉夫亡時遺孤僅四歲孺人抱而泣曰吾當從夫地下徒以呱呱兒緩死也自是不復近金珠羅綺蔬食布衣以儉嗇保其田廬尤珍藏遺書孤梓稍解事手舉授之誨以無忘先志方幾望有成而不克待矣卒嘉靖戊申年四十四詳見余第中丞濂所爲對中後七年

乙卯梓果舉於鄉又七年成進士授中書舍人奉使南還傷其親之不及見矧二木猶在淺土爰卜地西谿之鍾山始遷葬成禮焉又三年梓以秩滿例得贈父如其官母曰孺人制詞褒嘉闡揚潛德允慰孝思矣則又乞余文勒石墓上表諸人人余以天道難測有時而易人事不足恃亦不盡然方自得訕於時齋其志以異二子視青紫功名不啻執契券索負然彼以世積徵諸天力學驗諸人也竟乏一命之榮及梓幼

失怙恃僅以延其世系如綫不絕幸已奚意有
聞於時卒起家進士列侍從爲法曹駸駸位望
未涯何前嗇後裕耶數之所塞力有不能達理
之所開天有不得靳誠易測而可恃已世有不
務修身俟命僥倖未定之天蓋思所以昌熾而
後也其諸慎厥詒謀哉

奚囊蠹餘卷之十六

奚囊蠹餘卷之十七

行狀行畧

從兄東川公行狀

公諱洪字子容東川其自號云余族世籍河南
始祖某徙自汴京占籍錢塘高祖某遷仁和明
性理之學通經史百家言多著作我宗詩禮之
傳自高祖始曾大父某大父某是生愛山公愛
山公諱某後以季子貴贈吏部員外郎與余先
大夫同母出先大夫出後余祖故于公稱從兄

愛山公有丈夫子八人公嫡長也生穎敏倜儻
不羈能讀先世遺書業舉子爲制科文詞駸駸
成矣輒弃去習孫吳試劍爲搏戰勇已兼人則
又弃去挾高訾遊吳中通海益徵貴賤凡歷艱
險悉心計織齋筋力孳孳二十餘年乃益致富
羨然不爲異財別產悉歸愛山公愛山公以是
得優游家庭增構典籍延致師友旦夕課諸子
委心無他者寔公勞苦於外以陰濟之也已而
嘆曰大丈夫不能奮鴻鵠之翼赴風雲之會以

文雅雄悍垂功名竹帛而庸庸逐銖兩商販間
何以自明其志邪於是盡弃所嘗經營日泛覽
群書因訓迪其子暇則與諸弟商確古今或對
客彈碁六博登山臨水窮險極幽怡然若有所
得嘗憇北峯之巔爲詩曰躡足千仞危山風逐
衣颺徘徊蒼莽間飛鳥度青嶂聊陳一杯酒洒
洒多嘉况時當杪秋信宿山寺遇夜則又爲歌
曰天肅殺兮涼襲衣月流彩兮烏鵲啼撫景寥
寂兮掩竹扉孤燈幢幢兮暖幽惟時序疾兮思

徘徊萬物變兮心孔悲語義悽惋若憤懣不能
平者時季弟為選曹郎公忽給其家曰欲再入
吳尋舊游為樂竟買舟長往歷齊魯燕冀不遠
數千里訪弟長安旅邸曰選曹進退人才登崇
賢豪博採輿論為國得人民且受庇甚盛事
也人所屬意子盍慎之吾今知所學皆不適用
吾其歸老矣強留之數日怏怏不甘飲食雖
宮闕雄麗不一觀望縉紳縉紛不一交接飄然
南歸蓋晦迹以避請托防自黜以貽弟耳弟感

其言為出俸給納崇府引禮舍人榮之非其
志也歸即疽發背浸劇猶口占曰匣劍渾無用
熊經徒自誇醉中輸一局夢裏演三車自是不
復起矣歿之日為嘉靖戊申十月十五距生弘
治己未十一月二十一日春秋五十爾所著有
東川稿二卷藏于家公生平剛毅簡直與人語
恣其劇談不為巽避稍不協輒面折不能容即
遇顯貴人不過為禮然故舊交驩雖甚貧賤不
遺有緩急相投忘利害為之尚人亦以此多之

初愛山公疾篤自以多男子又異母出忽忽爲
身後憂公乃跽進曰大人幸自愛兒輩終不以
財貨之故傷天倫後果交相讓一無間言公以
孝友率先諸弟類如此馭僮僕嚴而有恩會有
遘告疾者醫謂不祥邇之將傳染爲厲公咲曰
少盡其力老弃其身仁者不爲矧老且疾邪至
躬親湯藥迨死不弃居常不喜飲酒無紛華綺
糜之習不惑於浮屠言惓惓誨其子卒業儒林
酬素志惜哉子且垂成而公不待矣悲夫即公

所自期待若舉天下事無不可爲使當一命之
寄舒展意氣必將有所建立不泯泯無聞也而
令壯歲蹉跎徒以五字沈吟鬱鬱負志以歿天
降之才何心哉先配盛民生子男曰榜補郡博
士弟子女一適蔣需盛先公十年卒繼娶金氏
生一女許聘徐浣金亦先公數月卒庶出女四
人一適蔣孜一許唐某餘幼榜將以次年冬月
扶公柩詣靈鷲山先塋啓其其母之壙與繼母
同窆焉欲乞銘墓石而屬余狀其行就所睹記

敬列如右

成都知府邵公行狀

嘉靖戊午九月七日故成都郡守邵公卒里第是歲予將使蜀便道來還其子棠生取公所自編年譜丐予作狀予從弟潔爲公子婿代懇尤切不得以蕪拙爲解漫摘所編事敘之曰公姓邵諱經濟字仲才別號泉厓宋康節先生之苗裔也南渡時自汴居杭世爲仁和人高祖純曾祖信祖琮父鑑以公貴封營繕員外郎母楊氏

宜人以弘治癸丑七文生公幼多智慧稍長習毛詩受家學於營繕公勤勵日進甲戌督學徐公蕃選充邑庠弟子員譽藉甚尤見賞于西蜀劉公瑞收列正員壬午舉于鄉癸未卒業成均時嚴少師嵩爲司成器重之因與趙尚書文華同舍相友善丙戌舉進士值揚宜人喪未授官歸己丑補工部主事專理清江漕船廠多積弊易汚公爲立規程嚴稽察事集而積羨倍昔有所集濟漕補畧可考任滿進員外郎督理臨

清甌敞區畫釐正如在淮時甲午進郎中督易
州敞先是各錢糧解敞多留難公隨至即發收
迺無留難又為節車輛之費定輸納之期商民
稱便乙未擢守成都成都劇郡訟獄既繁部使
監司沾沾指拾缺失公勾稽酬答事皆曲中歲
旱竭誠祈雨旬旬壇壝自為祝文泣與神誓遂
得雨如注農賴有秋存撫之暇訪求名宦鄉賢
祠於大益書院郡縣學宮稍敞輒為完繕至昭
烈武侯陵祠少陵君平遺墟凡郡中先哲祠宇

並脩飾崇祀以風勵百姓又博選茂才異等集
書院躬自教育間為授之章句稽其勤怠於是
士爭嚮風互相砥礪後歲大比褒然首選者多
省下士今御史中丞王詢張景賢周郡守倅尤
為知己會當入覲撫按皆薦公賢能不宜久淹
外郡未報值營繕公歿公歸自成都自是議其
後者起矣公聞之曰生本微賤幸得備位明盛
仕至二千石不為卑薄人不我與已矣夫遂不
復出郡人劉丹厓士元作德星亭記紀公治行

表遺思彼其親見行事宜非空言也家居以來
每好出遊嘗入龍虎山登匡廬齊雲浮舟鄱陽
富春淞泖遇當心處多信口爲歌詞自適比趙
尚書督師入吳則往與之俱張中丞撫南畿歷
雲間亦往雲間王中丞飭兵海上嘗往鄞周郡
守守信又往信率歲凡數往不厭殆苦城市喧
囂浪跡山川探竒涉險發舒曾臆以爲娛不相
諒者顧謂公宦遊已久何所希冀猶營營遠役
至有他疑豈其欲耶歿之日呼兒女輩命

以後事出所畜若干金分逮所親有差蓋公素
纖嗇深藏雖家人不知其有也所著詩文凡二
十卷生弘治癸丑歿之年六十有六配丘氏封
宜人先公八年卒子男三長棠生庠生次棣生
女二長卽予從弟婦次許江埭禮部員外郎曜
之子孫男三承廉承熙承默孫女承孝棠生等
將以次年葬公玉泉山瑩啓丘宜人之壙合窆
焉宜有銘以垂不朽聊述大都畀藉于名公
得采擇焉

唐府典儀正柴淳齋行狀

公姓柴氏諱龍字舜臣別號淳齋仁和人也宋南渡時有諱士宗者自汴扈蹕來杭因占籍焉歷傳至政政生質質以勤儉起家益開拓其先業有丈夫子二長靜菴銘次巽菴嵩嵩取南安郡守竹軒毛公女生三男子伯夔季臯公仲子也以弘治己未正月二十六日生而端凝不爲兒戲靜菴公愛之請以爲嗣靜菴配張氏得公愛尤甚無何張卒公方童稚哀毀執禮不異

成人靜菴固嚴毅難悅稍不慊卽盛氣厲聲家人咸嗃嗃公曲爲愉婉務得歡心逮歿哀毀執禮如其幼時自是歲時享祀必戚然悽愴思慕終身杭俗侈靡千金之家率以服飾輿馬侘里閨公獨敦儉朴所服布素數浣綴不厭深居簡出出又深自斂束不踰分爲高車與人交直諒不疑舉貲於人人有負者輒折券不責償遇貧乏及婚喪緩急厚卹不恡嘗曰吾寧損己益人必不害人利已然性善貧殖物值貴賤皆能預

料盈縮終始不爽又不緇銖取盈以是漸積饒裕非夫憑藉恣睢干禁壟斷歛衆怨以猝富也往年中舍君舉於鄉時方弱冠公自以僅一子當遠離念之不置中舍君承其意留止不上春官已而屢上不中公固不色也迨中舍君登進士高第授官奉使西藩便道歸省當是時司省郡縣諸大夫暨鄉縉紳士咸往賀里第冠蓋填門中舍君又爲公輸貲得授將仕郎 唐府典儀正父子被服彩繡 特貴盛矣公亦不色喜

顧愈自謙抑惇篤故舊卽市井猥賤亦必溫溫款曲人稱鞠躬長者謂淳齋稱實云歿之日省城內外知與不知無老壯皆爲咨嗟嘆惜彼其忠實心誠信於人也中舍君又謂余曰先君於物無好而好覽史傳涉獵往迹怕以已意評其是非多出昔人意表守身極慎隆冬盛暑不出內戶小有疾便偃卧累日非全愈不强起處吾叔友對吾母如賓教子無疾言厲色外祖南安公歿後家益衰子孫至不能保廬舍已又將及

其墓道石坊先君聞之惻然曰榛莽之中知有
毛南安者恃此八寸石耳蕩廢可至是乎爲償
其值得無廢其地由於輟重類如是晚築圃城西
八池結亭雜植花卉時借親友倘佯其間一日
折花對客曰花誠美麗幸與諸君劇飲明年花
發時不知幾人存也悲夫是歲之夏爲嘉靖丁
巳六月十九日一疾竟卒公於生死豈能預料
不爽耶亦其心誠實誠故明達非必身中其言
本聚散常理如然爾凡歷春秋五十有九配田
氏生子二長禎早夭次祥卽中舍君女二長適
余弟洽兵部武選司郎中次適庠生陳文濟大
廷尉東瀛公孫也孫男二長應椿聘余孫女次
應楠余於公家今昔聯姻積素累舊締好知公
宜莫如余併以所聞中舍君言敬爲序狀如右
冀立言君子採而銘之

高祖介然公行畧

介然張先生初諱某後更諱某字羽皋本洛陽
人仕於汴始祖諱某者扈宋南渡遂爲錢塘人

父彬以貴雄里中我 明天下初定嘗輸粟給
邊至通籍司農曰富戶母王氏以洪武甲戌生
先生自幼穎異噐宇冲粹少長精研儒術探抉
微眇五經六緯靡不浹洽而周易尤爲顓門旁
及九流百家技藝至推步天文占風望氣竒驗
出自性靈無假師授先生既深味道腴頗厭弃
財貨迨終親喪徙居仁和高訾悉歸其兄自是
脩學益邃聲聞藉藉宣德間兩廣多事時潘中
丞某將往視師雅聞先生自行迎除舍先生爲

設策乃請與俱凡所遣調一呼指畫一日坐帳
中望片雲隱隱起離震間謂潘曰事濟矣有頃
烈風南來此捷音也已而果然會潘欲疏請
召用先生誓不仕輒晦跡間道趣還易後名故
先生之名卒不顯晚歲卜居東西壁遊心著述
所爲詩文多不傳傳者若自述云有意欲嘗千
日酒無心去傍五侯烟夜寒荷葉杯中飲春暖
梅花帳底眠題像云丹青點染苦勞神寫出緣
何喚作真自己幻軀留不得却從身外更求身

臨終云我生原有數數盡復歸元來往自然理
何須求異端並根極理奧非苟言之也姚江馮
蘭輩以易學號知名士間從質難先生時年八
十餘對衆劇談一坐皆傾至羅拜執弟子禮去
年八十有二無疾終今子孫多以文學政行表
見當世明經世其家云

大父質庵公行畧

大父質庵府君諱某字用綱上世出洛陽仕宋
於汴南渡時扈蹕駐杭遂占籍錢塘當始祖時

吾宗素饒益高祖某雅尚文學禮義盡以推讓
其兄所取不及十一遂析居仁和之義和里而
曾祖某以下始爲仁和人妣毛氏南安郡守母
弟也有丈夫子四人伯授散官仲贈通議大夫
季封承德郎皆有稱號府君以景泰辛未入日
生幼稟竒秀授書輒通大義頹清弱不任煩勞
居常苦疾患恐年壽不永爲父母憂每以親醫
藥廢誦習然終身意不能忘垂三十始娶終以
多病鮮生育所育仲兄子竟以爲嗣卽先子亭

山君也間出累歲所乞諸家禁方脩合藥餌旦
夕孜孜不厭歲率費百餘金施人無不立應遠
近求請如市竟不取償一錢歷三十餘年歲復
辛未再得孫里中父老咸詣賀曰德積厚矣是
兒生不偶也日者又推論五行不賤府君心竊
喜字之室中與大母孫淑人鍾愛出諸孫上成
童遣就外傳居常謂某曰曆火寒灰之下積薪
其上光焰燭天美在其中發於事業如此無火
不然薪不積易滅敏而好學不當若是邪又曰

陶台不持斧斤追琢不施楮聖凡業貴精專乃
成博綜遠獵得無兼及而不工乎自是某始知
趨向專意經傳然卒不能率教以副所期待固
多也生平不惑於佛老素奉儉約習俗奢溢僭
差視之厭苦若將挽焉惟歲時追祀祖先必嚴
潔致敬宗族親故有不贍輒分所餘振之鄉人
無遠近大小莫不愛慕里中首舉高年有德為
鄉飲賓郡守敦請累歲竟不一赴八十後又舉
加冠帶亦不赴但謝曰吾德薄不足以辱盛典

嘉靖壬辰二月壽終後二歲而某舉於鄉又三十餘年今上登極覃恩以某總督漕運得贈兵部左侍郎兼都察院右僉都御史嗚呼學道無成仕無偉績茲老矣僅僅以一命賁丘壠某之罪負可勝言哉聊記憶行誼大畧將以丐於立言君子表章潛德切有望焉

先考亭山府君行畧

先大夫亭山府君諱某字元錫生成化辛丑九月二十五日自少端慎爽朗有成人之度與諸

昆弟贈吏部員外郎愛山公刑部主事兩山公蘇州府倅封兵部主事半山公齒相若也以文業行誼相砥礪後刑部蘇州相繼登甲科仕有祿秩府君與吏部咸奉例輸貲幾望寄一命以自表見值大父夙嬰弱疾不忍以遠遊廢定省竟弃所入貫與吾母李淑人共極孝養食飲必躬佐烹飪乃敢上大父既耄益多疾常在床箦時時侍湯藥無間寒暑已而考終盡哀毀瘠見者爲之隕涕終事詳慎以禮伯兄嚴毅稍不懌

輒厲聲色府君俛首長跼稱說委順繼之以泣
兄每爲感動罷去晚歲相與驩甚間私語曰弟
德度醇篤恢閎非所及吾不能享祿養生沐
恩光如弟已疇昔有言能無忘之當是時府君
已膺承德封而兄子中丞濂始有南宮之捷自
是兄竟不祿府君追思遺言悲慟無已故郡人
無間識不識咸稱孝友府君愈自損抑有司歲
舉鄉飲郡守李公冕躬請懇請僅一赴成禮而
已益脩締故交金太史近山童封君賓山高封

君東園金山人蕉泉皆以詩酒娛悅結亭泛艇
徜徉湖山悠然樂也雅不好治生舉貲於人往
往見負不較久乃漸廢落吾母以爲憂府君曰
義利不同途富貴不兼得旣自勉遵禮義顯有
榮稱卽富厚非所宜擅又嘗謂某日兒往試吏
得無私家是恤故廬無恙薄田不乏朝夕無庸
增益慎守節廉以求終與暮年之奉不需汝爲
給也悲夫親誠無藉祿養不孝竟不能躬奉左
右承一日之顏豈所以其爲子職哉府君生平

樂易犯而不校喜稱人之善不顯言人過失雖
訓諸子亦無暴色嚴聲吾母又以慈愛相之家
庭之間雍雍如也與人亦卒無忤史稱敦厚慈
孝君子長者何以加焉吾母以己亥七月歿又
七年當嘉靖丙午府君與客夜泛舟渴飲湖水
遂患脾泄不起某守廬陽委身公家湯藥不侍
殯歛不親終天之恨忍言哉忍言哉詳見督學
憲使豫陽田君所為志中始嘉靖丙申 先皇
帝以祀 天覃恩封南京工部主事母曰安人

隆慶元年 今上御極 詔例得加贈兵部左
侍郎兼都察院右僉都御史母曰淑人 誥勅
褒嘉兩詞粹美人謂當其實貝云

交囊盡餘卷之十七

奚囊盡餘卷之十八

祭文

祭包孝肅公文

廬郡本宋龍圖學士孝肅包公故里城南有讀書臺土人呼爲香花塾莫詳所自公圖像告身遺焉在焉其始至謁像既訝其大異昔聞復厭遊觀者會飲歡呼褻狎非禮乃建亭堂前奉公於中令不可狎既又題其臺曰流芳爲文以祭之曰嗚呼天下事以意想擬人必失其實以憤

激稱名鮮得其理公風裁勁節歷世世罔不企慕雖愚賤童稚皆知之至繪圖貌像則備極竒恠今覩遺像乃清雋古雅殊無異於人人議擬公行輒取廉刻深文發姦擿伏至考其實乃敦大體黜慘酷殊無戾乎中和然後知習俗所傳皆曲億深索激於時者也宋以忠厚立國其敝也流而為弱縉紳雍容相諛悅公獨持骨鯁務尊主庇民不為雷同附和以坐鎮流俗故天下取立懦廉頑之意獨以嚴厲歸之而畧其博大

流傳既久匠氏務極嚴厲為狀差溫雅即慮弗肖宜乎竒恠之形嚴猛之政愈傳愈失愈遠愈信且堅也公嘗疏戒天下觀察使務存體要無事深求焉有以此倡言朝著顧自食其言即是可以槩公之行語云夷齊不念舊惡聖人不先介而亟稱其量懼未覩其全也則天下未及覩公之全亦久矣余忝刺公郡仰公汗顏敢因蠶測用以為質英靈不昧尚默啓所蔽以陰惠公里也

重瘞古塚文

嘉靖丙午仲春廬郡東北郊盜發古塚一弃骸
穴外易材於市吏逐得既正典刑仍爲治棺收
瘞故所郡守某遣大使朱希持酒肴祭而慰之
曰吁嗟乎何人世系無傳生當何代壽夭德凶
男女富貴香不可知顧茲封砌完密材木堅美
應非常人豈形生猶豐盛之年終嗣絕在衰微
之後已致慎乎葬埋遂厄窮而莫守邪荒原蔓
草上下牛羊常祀久廢濡雨隕霜已足爲生人

之憐傷矣又以土人悖戾罹茲慘慝啓枯朽於
黃泉暴泥砂之白日彼誠見利以忘害幻軀既
委其何恤莫謂生前之不修實亦廢興之數值
也守念政不格於頑悍因之熱中然尤情難越
於同胞重爲泚頽今來瘞汝庶幾有知歎此憫
惻永依原魄無因爲厲

祭長姊文

嗚呼悲夫茫茫天道果可測邪福善禍淫栽培
覆傾夫順以信天人祐助稽古斯言皆虛語耳

不然孰謂秉德如姊不但之壽又孰謂有子克
孝卒無應耶方吾姊在室余諸弟妹皆幼將順
寒燠怡吾親心書史伎藝成吾親教撫暹向氣
濟弱扶穉均吾親愛遺惠種種筭而于歸流涕
牽衣情傾少長乃今二十餘年吾弟妹時時興
言猶酸心不已孰謂吾姊奄逝永隔幽明吾弟
妹摧裂肺肝攀號可但已邪往年先安人見背
余自南水曹匍匐歸廬吾姊每慟哭欲絕旣而
積氣沉鬱宿中乳毒乘哀毀卒發時召醫者有

難色余竊謂吾姊以孝思得之雖厲不爲害胡
爲乎天不監于孝女竟以殞其生邪吾姊有二
子皆穎敏純恪比侍疾時刻不離躬極勞瘁乞
醫投餌顛天變食甚至吮吸潰積割肌體爲飲
以進經年如一日余見之未嘗不咨嗟嘆服謂
其必能全母胡爲乎天不監于孝子竟無益于
死邪嗚呼悲夫藥藤療風石英全患姊之二子
宜無愧于斯人天果不可測矣德基五福賢者
永嘏姊之仁孝夫何歉于斯言理果不足信矣

天不可測理不足信信乎吾姊宜天也余何忍
言余何忍言惟德在人不朽惟子顯親不死孝
慈溫惠無間尊卑威鳳伏龍佇見翔翥茲天道
在遠猶邇吾姊得自慰于重泉而亦弟輩藉以
少慰哀思者也

祭朱母文

梁分厚裔吳傳茂族令澤潛流芳華煒郁時凝
坤載迺滋巽育誕啓玉儀朗宣蘭馥教崇維四
藝精踰六是典凡媛是基永福好逯君子卓哉

元谷志並鵬騫道隨龍伏疇能曲慰頓輕榮祿
天禡其儔矢心栢舟植節明義振蠱承休紹揚
先烈貽厥孫謀孫謀允藏彰志闡幽秉心搗藻
石介川流式爾前徽壯于帝猷方隆遐祉奄
逝莫留萊雛失豫報劉養弃靳茲生榮遺之隱
施嗚呼哀哉維天難測惟命不易聚散如然死
歸生寄夫復云何所要不愧宜家者睦明分者
智節凜者貞教成者義有美克家亦終繼志永
慰重泉冥冥不昧

祭魏令孫禹麓文

伊會稽之名岳實神禹之舊疆帶三江而襟海
誕聖哲而興王緬自昔以逮今紛懋實而開芳
嗣孫令之挺出殆鐘靈而降祥蚤誦法乎典謨
振清響於琳琅吐白駒之優游指青雲而激昂
鳳穴英飛於桐嶧龍門角奮於桃浪劔光騰於
出匣錐穎脫於處囊臨汨作宰惠此魏方允恃
允怙爲紀爲綱歌聲聞於武城花陰滿於河陽
飄仁風於畿輔馳妙譽於巖廊列宿方耀曷掩

其光質易罷鄭人之市大音絕單父之堂翺翔
未離乎叢棘蔽芾徒咏乎甘棠嗟哉哲人罔不
盡傷余昔射策同舉於鄉飄蓬久歎於契闊彈
冠初慰于相慶僅十年而一遇不再見而遽亡
苟徇善猶難測人何恃於彼蒼若夫脩短命定
於不易又奚恠乎不俾之壽臧嗚呼禹麓身天
名揚樹偉績於明時托不朽於文章已多取諸
造化復何憾乎靡常越嶠雲迷漳河水泱悠悠
旅襯孤寡相將縱遠觀于聚散情胡忍于頓忘

薄郵爾後慰爾冥茫未訣臨舟雨泣數行

祭十二弟子德文

嗚呼余聞弟之變且三月矣每一念至痛不能
言憐余者曰盍宣諸詞以舒其悲余既無以自
解乃述哀衷而寄奠曰伊河洛開吾宗之源兮
入西浙而派分世種德而累仁兮紛內美而脩
能三台孕秀而鍾祥兮迺佑啓於後人嗣吾弟
之始降兮屆昌裕之嘉辰表文明於威鳳兮侈
聖瑞於仁麟傳一經於四聖兮諳詩禮於趨庭

載五車於三冬兮煥絲筆於高文遂脫穎於鄉
闈兮尋射策於 楓宸既簡注於 巖廊兮亦

流譽於縉紳托鎖鑰於東闕兮念地阻而遺親
寧踈逝於南天兮甘祿養以娛心除戎器於武
藏兮掌三銓以持衡品藻允諧於庶職兮董正
克振乎五兵既黽勉於官箴兮尤兢惕於檢身
羽翮奮於漸鴻兮溫恭協乎謙亨胡禍善而夭
賢兮奄膏銷而蘭焚鄙余浮沉於冗賤兮再握
符於陽平第方奏最而還轅兮暫把臂於衛濱

折津柳以牽思兮傷朔鴈之離群風雲期盛世
之績兮湖山訂晚歲之盟胡在耳之未忘兮竟
永訣於云云嗚呼哀哉繫白髮之在堂兮遺弱
息之零丁悼孝友於九族兮懷仁厚於鄉評悠
悠旅襯歸何日兮山城鬱鬱故壠藏何處兮幽
扃恨撫棺之靡及兮時浪浪以沾襟媿脫驂以
爲賻兮聊束芻以寄忱諒有知能諒余兮庶來
格於冥冥

祭顧方伯六泉文

維天之道虧益無私維聖之訓禍福有基常理
如然今也何稽謙謙君子展矣醇儒開芳振玉
實緜聲蜚脫迹鴻遠筮仕雲司遵彼三尺詳於
五辭出守清漳千里保釐仁澤覃被清譽遠馳
乃持邦憲文教敬敷起衰崇雅雨化風熙翱翔
藩臬秦楚雲霓四國是式一節靡渝載陟東省
漸騁天衢胡弗少延隆棟遽摧豈厭溷濁潔身
全歸抑有定命脩短莫移殃善覆栽厚積薄施
天誠難測理亦難知 國嗟矜式鄉悼表儀矧

我姻契誼重心悽陳詞侑觴敬祖靈輒冥冥不
昧洋洋格思

祭孫柳西文

猗與封君周文之裔散處吳中雲間流寓 明
興驅逐編戎入蜀歷世累仁含光守璞或宗夢
得蘊藉詩書或承思邈醫隱閭閻迨公崛起克
濟世美庶人在官冠服是被流賊紛擾所過靡
遺義激諸鄉宣揚武威萬家如堵五里無虐粵
歲戊子綿漢大侵奔殍載道泚頽酸心闢地給

力惠沾枯骨冥漠有知何以報德篤生令子蚤
奮天衢詳刑西省剖竹邦畿 巖廊重望 朝

野清譽惟 帝念功推本自公 龍章再錫進

秩荐隆鼎養方盛生榮未既胡然厭勞奄忽仙

逝嗚呼哀哉魄寢柳西計聞恒嶽君侯奔號士

民悽愕嗚呼哀哉掩骨曰仁禦難曰義陰隲既

厚明功亦試輝煌紫誥亦既食報榮壽及稀繼

述克孝桐岡鬱鬱佳城屹屹梧月松風相將窈

窈生順歿寧胡弗安懌某托交令子誼黍同遊

仰德有日執紼無由誠無不格我心悠悠

祭劉安人文

毓德世族夙稟淑姿作賓賢雋式慎壺儀蘋馨
禮肅琴瑟家宜佑翼鴻舉奮迹天達翺翔郎署
澤國保釐載陟臨邛邦憲是司敷歷中外靡往
不隨處貴思約不驕不移事無攸遂勞罔內虞
人知克相 帝鑒孔徽翟冠象服玉燦金輝躋
榮方茂食報未幾胡天不融乘化邁歸蜀山岩
岩易水瀾瀾夫君嗣子日慘心悲其等分同寅

雅情其凄其遙將薄奠陳此俚詞

祭張封君文

紹世德於故家聿潛脩而誕發浮菁華以藻飾
湛禮義爲輓輒贊郡政兮爲郎眇暫試兮錐末
蚤厭籠樊超然從脫盼桑梓兮徜徉孕桂蘭兮
芬馥多畜啓兮詩書義方授兮英傑尋挺出乎
白眉侈大來之朱紱譽振兮雲司名聞兮 鳳
闕恩錫褒封兮輝煌綸綍養遂鼎裊兮委蛇闕
閱舞筵翻兮編衣省闈駐兮憲節正悅豫兮未

央胡嗟生兮大耋某等托交令子計傳悲咄遙
致薦兮芬芳望冥靈兮淪忽

祭蔣僉憲環山文

嗚呼士君子寄形宇宙凡砥節礪行確不可拔
者心能自盡其顯晦得喪紛不可定者勢固難
必是故隱約能安盛滿不溢惟順應之不遷迺
御動而常逸嗟嗟環山胡然不憚蚤脫穎於衡
茅飄仁風於劇邑繼鳴珂於郎署凜紀法之脩
飭爰秉憲於滇南再分符於川北侈彼豸繡舒

我胸臆方將屈指功名等之何有詎意轉盼妍
媿如斯莫測夙以虛羸因之憤抑貽戚孔多返
真何亟果自信之過高豈未達乎通塞嗟嗟環
山胡然罹厄諒有生之脩短本定命而不易信
有來其必往總生勞而死息悟萬有之皆空奚
隨感爲欣戚惟有子爲不死惟令名爲不忒永
以慰於沒寧亦將解於生惻

祭周母文

夫女德不外見不於其夫則於其子是以表坤

順者與其承乾式母儀者本諸賢士惟茲純懿
夙成於名家作配克媿乎前美蘋蘩知婦事之
宜純綺戒冶容之侈夫君得助而內顧亡憂嗣
賢有托而忠勤是矢已迺倦遊節鉞奉鼎俎於
北堂競秀芝蘭娛桑榆於錦里方永日以祈年
胡珠沉而玉毀余輩服官巴蜀又企家風傷素
娥之歸月慨婺曜之墮空遙將牲醴用寄哀恫
敬啟祭李封君文

攻文弱冠味道疆記博聞精研深造飛藻奪目
說詩解頤鬢宮萃拔月旦里推自勝者學不偶
惟時晚膺宸薦寔匪心期幡然龍伏後人是啓
明允名家長公濟美甲第英聲掖垣芳軌朝
無闕事告有嘉猷蠶叢遠使澤滿西陬孰匪隱
施如源見流祺壽未央 褒封甫及宜臻遐紀
鼎養天秩士永師資民留表率胡命不延返真
孔亟某托交令子企仰淵源計傳心測執紼無
緣束芻萬里歆此不虔

祭郭聚菴侍御文

嗚呼何木非材喬樹凜其凌寒何士非名特立
嘉其峻節伊惟雲中之彥允出儒林之傑穎異
聞於垂髫天固縱之睿哲蚤鵬奮於鴻遠試牛
刀於鷄割肆花縣之聲蜚歛蘭臺之萃拔始霜
清乎畿甸繼春衍於蠶叢鷺卓照水隼翮搏風
表正旌良而仁賢有恃繩回殫惡而狐鼠潛踪
遠甘却肥粃水齧蘼採辦不避火煙嵐寢食恒
忘於勞劇松栢比其志堅天日照其心亦宜荐

登於華要庶骨鯁於

楓宸何風淒而雨泣奄

鶴化而雲乘某投分既晚傾蓋方新蘭心易洽
石介難倫乍黯然於訣別遽永隔於幽明敬楫
辭於里第紛涕泗之沾襟

祭方室王孺人文

毓德世家淑姿誕啓耀彼瓊璫鬱若蘭芷施衿
結禱作配君子締綌既閒蘋蘩是擬戒於攸遂
遵茲婉孌君子儒紳翱翔上林出倅南粵翊懋
官箴芬芳五桂燁燁森森爲婦爲母克儉克勤

肅肅家庭雝雝瑟琴既裕且榮承謙履約厚集
休祥長垂矩矱食報未幾遄還冥漠石瀨悠悠
雲山磅礴崔嵬佳城仙靈永託輶輻即路酌此
清酌眷我姻誼洋洋來格

祭郭封君文

含章緼璞樂道凝真韓陵雲履洹水葛巾豐藝
多材沖曠軼倫人倚爲王德飲如醇姻族雝雝
里閨恂恂皜皜霽景煦煦陽春介石秉義博愛
敦仁儲靈毓秀佑啓後人篤生太宰爲國純

臣鳳池染翰

天部秉鈞任隆列辟

寵溢

楓宸器使允諧贊翊維新望流知源隱施在民
鼎養未艾奄謝紛塵嗚呼哀哉孰生匪榮表德
恩綸孰歸匪全耄耄是臻喬樹在庭叢蘭牲牲
樂哉窈窕長夜棲真衛秦緬邈執紼無因楫詞
寄奠洒淚西津

祭朴齋李公文

天植樸茂不斲淳龐允有剛毅亦克慈祥恤難
給貧勸善抑強教刑於族善蓋於鄉篤生賢嗣

教以義方策名 天府邦家之光計曹振譽文
部晉陟品藻清濁衡懸水澈蓋其始教於家也
累仁集義猷畝而期廊廟之業繼成於國也開
芳布德簪紱而敦泉石之節方渭水不乏弘濟
之謀猷在商山奚啻逸民之高潔雖年齡定命
之有數而功業已託於無疆俟勲庸之煒燁皆
隱德之滂洋宜瞑目於泉壤慰純孝之盡傷仰
賢間於百里致哀悼於一觴

祭封君勒公文

山鍾道脉川發靈隅茂開人傑間氣夙儲在魯
曰濟謂蜀爲眉明允掘起獨負恢竒規爲弘遠
運智知幾誕啓二難玉潤金輝長公穎脫命世
鴻儒仲亦冲舉步武亨衢翱翔南北岳牧聲蜚
有隕自天金章紫泥里閭赫奕簪組委蛇懋
臻孝養永介壽祺豈其仙蛻終與世辭嗚呼哀
哉才匪不施視彼田廬矧茲嗣賢勲業未涯德
匪不酬安享耄期亦旣寵褒祿食久綏高朗
令終造化爲歸笑謝塵壒寧復嗟咨某早從伯

子附驥以馳微垣表率藝苑師資蘭心孔洽芳
軌莫追分均猶子遠計酸悲酌酒東嚮脩此蕪

詞

奚囊蠹餘卷之十八

奚囊蠹餘卷之十九

書

寄沈廷尉

廬郡僻在淮西六安充偏西南當荆舒汝潁間
士故鮮儒術 國朝開設州治建學立師百七
十年于茲文教誕敷衣冠儒雅彬彬接踵民間
靡然嚮風矣頃侍御馮先生奉璽書來董學政
適值荐饑刺史將發粟賑窮因取公田歲租周
諸生之不給議既允行且圖為可繼之業謂田

卷之九
係之公非民所得私亦非官司可得專也政之
公者莫學校若其以田係之學永以爲諸生之
需乃檄郡悉查得先守林華所置書院田二十
有一石在州城之北州守鮑德所沒入民互爭
田十有五石與前田稍北而近凡入租石百二
十有二預發所積易材鳩工建倉于學宮之東
以俟收積計所宜優卹諸生定其數有差掌之
學正歲終籍其出入盈縮聞于郡議成僉謂宜
請文勒石以紀其事仍核田之四至爲圖附于

碑陰俾後有所考以爲有司勸學養士樹之風
云顧文以信遠文傳則事亦不泯立言之責在
門下不可辭也敬走役臺下伏冀俯念斯文特
濡彩筆庶嘉惠後學之意表彰不窮而六士誦
法明訓歷世世亦無窮也

寄謝巡臺

頃得邸報伏蒙謬取不才上塵薦剡法本激揚
詞多誘掖感激何量竊念少困蠹魚旣乏鄉曲
之譽長淹泮水尤鮮麗澤之益僅飾章句見收

甲科一試水曹三司法比十年即署祇自蹉跎
千里封疆何堪簿領顧茲鷄鶩雖眇志鴻鵠于
雲霄駑鈍未疲企驕驕之風電若失足于泥滓
而恣口于稻粱非唯不敢亦所不屑也頃者荒
穢初治節鉞遙臨隼翮橫秋唯驅燕雀鷺車照
水不及淵魚表率群僚整齊庶政某分當奔走
之末仰承師帥之餘驚惕四知持循三尺頻年
苦旱雨不隨車萬姓其咨春慙有脚徒恃孔叔
守已之義遂冒仲儀便人之稱况乃事上禮踈

防身氣直在鳥非善鳴之鴈處卉豈附樹之蘿
自分沉淪何堪汲引豈期海嶽不棄滄埃遂俾
槩鉛誤蒙鑄造取以克數已爲過情列之首行
尤難服衆士元拔才得五故逮凡流梁公備藥
籠中兼收常品此大君子包荒之雅量門下吏
意外之竒逢也更惟今備末屬逢迎之敬獨簡
昔斯同朝殷勤之歡未協先容無地後效難期
遽累至明特垂心賞比中丞之得唐介時赧面
以自慙若陸亮之負巨源敢剖心而爲誓深諒

敬侯忠度固不以知感爲重輕竊懷鞠詠心知
詎敢昧玉成之德誼肆陳愚悃俚澁不足展宣
干冒威嚴慈仁尚祈鑒察

寄劉沂東侍御

某吳越瑣材衣冠下品也無技能取譽鄉曲仕
爲冗賤浮湛莫可表見逮守荒僻幾欲少盡生
平竊高潁川渤海之行砥節首公拯災卹患不
憚勞瘁凡以仰承 國家爲民任官之意然而
識鮮通明行多峭直竟何裨於元元徒取憎於

尊貴幸辱門下越拘攣之議任偏私之見謬垂
心賞直取鉛刀魚目欲令增價連城豈故好僞
無深識哉必將有誤塵冰鑑以爲斷犀照乘不
是過然某豈其倫哉傳聞薦牘所署若將等龔
黃而上之每一念至未嘗不心忤頰赧跼踖難
安嘗聞管子鮑叔知我之言豫讓身殉國士之
遇謂人生相知古今人何不相及自今視昔宜
無不相及顧報稱不知何似耳久處憂痛無由
一申鄙悃頃聞少枉相途暫試畿輔西浙密邇

清化切欲匍匐行臺緣初春終制入夏多疾情
耽丘壑心憚舟車不克適往偶便預啓通誠臨
楮馳神惟慎綏台福

寄韓司馬苑洛

頃白水溫令以公所撰新城碑文送閱懸之中
堂莊誦數過其間論虜勢強弱適當鄙心夫元
以瓦居火食游惰燕安之懦當 太祖練習百
戰奮迅精銳之雄若猛虎驅群羊不待覩影聞
聲先已奔命恐後迨 成祖三犁虜庭亦席餘

威震龍彼積衰固難遽起也今種類日蕃自
英廟北狩以來百有餘年本以禽獸驚鷲之性
習食畜衣皮之俗彼益騁驕此方厭武兢兢自
保不給寧復望 二祖勲烈哉宜不當輒與較
武即郡邑村鎮城守之計何可緩乎白水城中
公衙之外民居不數十戶關外乃及十倍方虜
犯宜君僅隔一山心竊危之故倡率吏民躬爲
畫地分工閭閻歡欣子來僅月餘竣事緣彼所
畏殺掠在虜所恃捍蔽在城順人情以利導故

覺易然何敢引以爲功猥蒙稱諛不置祇增慙
悚又嘗步入山後於小秦嶺上度得峻削處路
所必經而四面陡絕因鑿斷其脊爲深溝架木
爲橋橋南壘石爲券門門左列營房數椽置弩
兵五十人遇警但抽橋張弩可保無虞惟黃龍
堡濶遠坦夷無險可據賴北有九溝稍剗挖疏
濬胡騎即難奔騰念非道屬已關行矣前書謂
臨晉夏陽昔險今夷要皆承平歲久人樂行旅
之便無復深遠之慮爾道體康寧由自上天有

意斯文

聖君久道化成

聖世多壽誠然若

曰某有小惠境中亦能滋益遐祉未敢承也

寄翁冶山郡伯

暫還無幾值春雨連綿南望樸堂渺渺吳峯雲
樹只尺千里會不得數非我心也津亭別來懷
思轉劇居人念客將無同之憶昔冶山嘗借伯
生訪我悟空禪林談及一時朋好謂朝鳴魁岸
英爽可屬大事子春清雋和厚必躋顯崇良用
強毅質直節義之士余拙鈍非所及倘寄以民

社當不失爲循吏伯生雖自負惜骨相非爵祿
器也言猶在耳三十年間伯生已化爲異物邵
許咸致位藩臬駸駸盛矣虛岩上書忤旨罷
諫垣歸冶山底績廣平乞休故里彼各在離隔
而兩人者得其蕭散湖山適情游藝嬉悅桑榆
之景累仁集義敦篤故舊衿式澆噐之風則固
士林鄉曲欣欣羨慕謂不可及也何乃因小有
言遽成絕跡僕竊以爲過矣君子以同道爲朋
固不輕易定交亦不忍情中棄小人則勢利是

圖故易親易踈今數子皆高朗之士其始磨礪
於布衣常帶之時非文藝相觀則行誼相勸已
而仕國彈冠結綬赴功名之會尊主庇民致蹇
蹇之忠並翱翔道義之林無所謂勢利奸其中
也今二君之忤也豈有壟斷可登勲名可獵相
競不能下哉不過論議偶殊各持一見務以求
勝靜言思之祗當發一大噓烏用喧喧較論效
賈豎女子爭言束髮投分今皆白頭片語參差
遂爲吳越人將以此窺二君素養矣矧時俗下

趨友道大壞齊民後覺方引領側目視賢者爲
矩矱忍自處靡薄致風俗之益偷乎遠則許邵
聞言必驚詫不遑寧近則伯生有知猶睜目於
地下僕誠忍不盡言誰復爲二君言者人去既
以此意解於虛岩而充諄諄爲治山告願修舊
好息間言安朋儕之心毋爲後生所指

而以上內閣時事

某竊祿關中無分毫裨益兢兢奉法循理供役
不敏錢穀是司所關心過慮者亦僅僅計量盈

縮攝事兩月見其中有關係安危分不能轉移
者輒敢直述一二奉備採擇倘蒙垂察而留意
焉實西土之幸也謹按秦中八郡惟西安鳳翔
漢中猶爲善地今錢糧出辦亦全賴之延安慶
陽平涼臨洮鞏昌皆密邇虜患民窮土瘠額征
錢糧拖欠累歲雖嚴刑峻法終無完期以是貯
積空虛軍需每缺一難也近年自增絨服之供
歲率費銀六七萬兩正項織造銀不過萬兩餘
皆補湊欲加派則民不堪那移借辦每每不繼

二難也邊境素無畜積虜已熟諳往年犯涇邠
犯鄜延入中國數百里不厭其欲獨垂延涇陽
三原使虜得逞即大防撤矣防守固不可一日
懈今額該給軍之資京運歲該七萬餘兩秋防
正急戶部尚未發解萬一軍中脫巾內變可慮
三難也境內各王府祿糧秦肅慶雖漸加於昔
數猶不多唯韓府宗室日繁歲供至十三萬兩
積欠至五六十萬兩每歲以諸項湊補大略十
僅得五啼饑號寒含怒畜怨上年已擁衆辱撫

院毆郡守矣此後不處將不止是四難也四難
之中韓府之事尤亟往年題有 欽依闔省賊
罰皆聽截補祿糧今部劄紛紛猶謂各衙門賊
罰不許存積上納事例不許停留悉以解部是
絨服軍儲祿糧所謂湊補者何賴恐各鎮官軍
之變韓府宗室之變不在數年之外也今撫按
以皆有續奉 欽依不敢抗疏隱忍釀禍異時
誰當任其咎者至於各邊兵威不振蓋自昔已
然今幸虜入無所掠欲有所掠必在深入深入

則往返途長人畜水草不利失不償得頻年虜患不大以此若使連營大舉各鎮之兵必不敢攫其鋒始至惟擁兵傍伺出掠輒引避自保迨去又徐施其後求免損軍折將不蒙吏議是幸然虜猶計慮萬全知有兵也稍知忌憚但不宜分各鎮之力使疲勞道路有入衛京師之名失捍禦諸邊之實也今各邊旣分兵入衛必抽腹裏之兵以補缺額腹裏旣虛又招兵以益防守於是遣發有盤纏之費動調有行糧之費招募

有供裝之費一軍數以千計即費以萬計是調兵募兵之議起而邊境腹裏皆困矣今幸時事漸康莫若遵復祖宗舊制盡撤調遣之兵稍倣二十年前事規責成巡撫兵備官各將所任衛所嚴行較閱力不堪者易以壯丁數不足者聽其召募務足原額技不精者立法教習務令精強始於京師達於各省民間團結社兵如浙省近日之法責令有司覺察聯屬其心有警則軍民併力驅勦勢果不敵就近調發庶幾人懷內

顧家自相保較諸自遠調征若秦越人之不相
顧也固不同矣今請罷入衛之議職已上於撫
按倘幸得請卽每歲可省數萬費恐終隱忍未
敢明言且邊兵始抽於營聽擇良馬輒以疲力
易之名曰捨兌臨去鑄其妻子於人却爲其妻
爲之子名曰提養捨兌行邊無馬矣提養行兵
無家矣公法人情兩不能堪妄議謂宜留止入
衛之人令其攜家常戍遂室家之願於彼收糧
扣此原衛之供可以別募一役無復更番之擾
馬亦就彼查給可無捨兌之弊兩地皆得克實
營伍人馬獲免道路疲勞似亦一策也

寄張臨溪都臺

得接尊論仰辱愛念卽同氣至情不足過是鄙
陋何當居半載自分蹇薄之命無通顯之望
雖知厚當途寢寢嚮往有地輒罹意外之讒時
行復尼終將奚所希冀而猶策旣蹶之足飾已
倦之羽邪擬入山之深無意人間事矣繼思束
髮仕國三十年君臣大義忍不分明而去宰執

臺省共施再造之恩士爲知己死何敢忘國士
之報遂翻然出門冒暑入秦不敢自惜顧憤心
鬱氣一病瀕危急切歸思遂不可遏夫士之仕
也猶浮舟也進則進否則退不幸而遇淺阻徒
費篙師之力不若勇退免風波之險也再疏具
如別幅伏望轉達銓部得賜優允幸之幸也生
死肉骨之恩也如必不然將投牒遄往甘擅離
之罪必不攢眉俛首重足坎壈之途屏息嗟伺
之側忍辱以延眇小之榮利也前書語及是非

毀譽念公方總持紀法紛紛論議皆將取決於
隻字片言竊疑尚有未破之惑不敢不罄胸臆
以求事理之當夫是非者明覺之自然固有之
智也見善而好見不善而惡出於天理合乎民
彝太公順應之常也毀譽者將迎之偏見有我
之私也黨同阿好逆詐臆不信物蔽其明欲損
其智徇情滅性之變也吾心之明既有一定之
是非自無偏駁之毀譽語云無毀無譽若毀譽
亦是非之心則是煦煦亦仁孳孳亦義據流行

之似不遡原泉之濁也意發於心意乖心累本
於是非之心出於愛惡之意萌動僅毫釐之差
發見實千里之謬也人言君子指小人爲邪小
人亦指君子爲邪邪正昭然在人耳目而彼獨
不信則私意蔽之二說不可易矣竊謂君子亦
指同類爲邪夫曾參雖不殺人殺人固人情所
有校人烹魚子產嘆其得所校人誠欺而畜魚
於池非理所無也然則人以情理所有之非加
君子欺以其方必且見信豈必小人毀君子哉

其云賢必先覺是沉幾先物堯舜尚失之四凶
三代以上固已難其人矣孰謂當今之世有能
洞悉情僞而不惑者乎至謂人毋蹈可疑之跡
必小有出入人乃增議無瑩然美玉而人指其
瑕此言青蠅不點白璧尤不敢遽信昔直不盜
金儀不盜璧二子之心非不洒然自諒其潔而
卒買金償失甘受窘辱如此其汙也當是時有
不薄其人而耻其行者鮮矣此豈微有盜跡而
人甚其罪乎疑跡必不可蹈則是瓜李之蹊必

不可徑冠脫履解不得整且結也夫錢穀刑名
藩臬所有事猶行人必經瓜果之叢而繁枝觸
之蔓礎牽之不容不整結其間自以不動彘顧
之欲則無媿矣豈能却所有事而瘳曠養清高
之望乎是以必徑必竇科頭跣足責諸衣冠之
儒也可乎不可乎又謂誰復似某之枉是信張
而疑直局於所知而未擴昭曠之度非所望於
高明辨論議之得失別人品之高下察好惡之
公私定進退之權衡維持世道替翊盛明

朝野冀望不淺不特知己區區之私也欲因請
益輒復縷縷伏惟鑒諒

上督撫公

近得通報獲觀激揚大疏舉措一出至公好惡
允孚輿論片言隻字輕重不爽毫釐表正旌良
光寵有踰華衮其材同樗櫟質類駑駘力旣倦
於長途何堪鞭策任不勝乎隆棟誤辱斧斤信
大造之鈞陶不遺纖細豈允員之蹇鈍亦有微
長不媿四知徒恃素心未變無聞五十自憐白

髮相侵每以棄置自甘何意引援猶及是使處
身突奧得覩白日之輝濡跡泥塗驀遇清波之
濯爽心快目莫知所裁自今伊始將慷慨激昂
奮勵功名之途回顧碌碌非所能也欲循常守
故羈縻升斗之祿愧心中冲不忍爲也進旣無
可仰攀退且猝乏善計斗筭其量覆餗是虞鹿
豕何求林莽爲快薄田數畝敝廬一區眷眷故
山時勞夢寐悠悠 天闕徒負 恩私此實知
止知足之積忱不敢矯情飾僞於明鑒也孔懷

厚誼莫副心期永矢弗諼圖報何地

其二

恭聞海宇廓清竒勲峻茂光膺綸命晉陟保衡
爰上應乎文昌 春宮啓沃復瑞騰於天柱
紫極輝煌申重巽於楓宸允荐升於槐位秩齊
元佐表三台心德之同寵冠文班授千載風雲
之會慶均朝野喜溢東南職等素辱鴻私猥叨
屬末共濡波潤幸托二天時憶節麾神馳千里
未遂樞趨之願倍增歡躍之私謹專後代申薄

將惘款極知鄙陋溷瀆崇嚴無任悚慄

寄孫蚤川司寇

曩者奉啓不度猥辱華札嘉幣惓惓愛念不減
夙昔此非近世人情也一登樞要不問故人蓋
仕路常態矧蹇拙踈略自宜見擯有道門墻而
猶憐察如此銘心刻骨何敢忘之某自甲辰歷
兩郡六省奔走二十年崎嶇險阻不知幾千萬
里惟兢兢畏四知守三尺非有踔絕之行瑰瑋
之才能自表見又中遭擠陷益畏縮不敢吐氣

伸眉獨懷枉鬱不平之忿時或顏赧發熱流汗
接踵家嗣既夭幼子孤孫方垂髫未解人事素
不事生產作業僅守先世敝廬無一椽半畝之
益衰鬢秦關孑然形影時因秋風謂不動季鷹
之思矯元亮之首豈人心哉欲借量移之便徐
圖出處方今二三同榜皆當路鼎峙片言出口
聲價百倍所謂有力者當其前矣在門下豈惜
舉手投足之勞也惟台諒之

寄毛介川中丞

伏自附驥迄今結兄弟之誼垂三十年屈指仕
路十不存一吾浙稱最盛茲僅僅臨溪方崖蚤
川與門下耳鄙人盤桓冗賤亦復覩顏其間追
惟夙昔感存亡之異世惜聚散之靡常相見能
無悽心頃訝鄙人非復舊時之態即衰索可知
上不能立德與言遵孔孟之旨次乏殊偉之績
藻麗之文聊自表見荏苒至暮何以爲顏猶蒙
不卽弃斥寵以盛筵規之道論蓋誦習十年不
如開導於一夕也豈無畏雖遺於五十而知非

尚冀於朝聞別來靜思旣喜且懼鄙人入當紛
拏都下又將走晉陽上事瞻企光輝日遠不審
嗣是尚得聞性命之奧示操持之訣否爾行次
彭城使還預布悃款舟子復命尚圖申候

寄高南宇司成

昨冬服役晉陽聞報榮轉門下守正不疑屹然
山峙於狂瀾波蕩中視浮湛流止略無介於真
靜之體此豈近世隨俗就功名者可同日而語
往年奔走都門數蒙見過又辱探以岐路示以

周行似若與意氣而維植之惜蹇拙而矜憐之
仰承道誼肉骨之愛惟有感刻年來朝政維新
人情士習頓改縉紳間稍稍循三尺謹四維矣
更得慎修恬雅如門下一二者宿同秉國鈞亟
引賢良布列庶位即泰運可躋足待也某委瑣
蓄縮自甘退保桑榆但庶幾一日爲熙皞之氓
是願是快爾走役代候不盡悽悽

寄許茗山右使

頃還家不踰旬百務叢集如蝟所期放舟湖上

與野老劇談終日竟不可得惟候督府赴公宴
因得一偕笑語回思省中歡暢何可復得冗中
既辱留款別日復勞遠送攜來珍品遍逮同舟
惠至渥矣感倍感倍行次冊陽不自意有晉陽
之報如得在兩月前可無勞役顧不在五月後
何從便得推正也天道人事如循環然極則變
變則通頻年鬻官售級盡出權門賢人端士動
輒得罪卽幸不譴逐亦棄置不錄誰能不受羈
勒得騁康莊血汗益車困踣槽櫪凡幾何人矣

宇宙不平之氣冲霄貫日彼安得不及於禍乎
今時事一新鈍拙如某亦欣欣彈冠門下宜益
快意滇南知不必行但安意需後命耳

寄王鑑川憲使

歲月同心倉卒分袂彼以乍聞訕詈憤懣難堪
雖賢達傍觀猶冲冲爲之不平况以身當之坐
是草草爲別長途奔走歷崎嶇涉風浪則知軀
命重外物輕既入武林故廬無恙老稚歡迎則
知倫理可樂當官多戚已又泛湖登山時熙地

勝玩物適情較諸東池西局冠裳束縛前瞻後
顧惟恐失官常招物議雖忘形二三知己猶謹
相戒期無荒也則豈若此中葛巾芒履尋幽吊
古脫然無憂懼乎彼擠排傾陷焉知非造物假
手以貽優厚前此怨尤盡已霧釋冰消惟懷人
感德馳神數千里之外不敢忘耳勉畱之報寔
出意外顧跡危心怯進退維谷但亟自引退庶
可遂初心免後議已專疏北去倘幸得遂即野
鹿適豐草之性倦鳥安故林之棲衡門之下樂

事偏矣青雲故人會無期矣猶冀惠問山中也

寄陸五臺

昔人謂人生相知貴相知心略形骸忘爾我遇
坎窞不疑聞流言不信故管仲身冒貪忍不忠
之跡而鮑叔能諒其心以爲各有志爲百世之
下語交誼不是過矣是所謂知心者邪某鄙陋
迂踈省躬誠無一善獨兢惕四知持循三尺庶
幾無悖官箴迺萋菲之言正攻其生平所自恃
嗟嗟人情殺人市虎理本可欺則惑矣誰復諒

不肖之心如吾門下者哉都門經月每辱相過
輒論心道故夜央忘疲甚者執禮過謙餽遺逾
厚察門下之意真若諒其心畧其跡不減昔人
知我顧鄙人無可見知每一念至未嘗不赧顏
汗背感激銘鏤時刻難忘也別來奔走未遑寧
不自意復有秦藩之役吹噓汲引知出門下居
多行將冒霜雪歷崎嶇捧檄惴惴恐後南望故
鄉能無兒女之念耶區區之意殊不能悉

其二

夏初得手教體念周悉既不雅令謝事又溫詞
誘獎移文撫按以飾媿赧之顏且銷邪比之私
皆非意念所敢及也屏居五月庶幾量移已不
可得度 明命漸久又不敢偃蹇恣意不得已
冒暑奔馳烈日紅塵之中經月甫至以厭苦煩
懣之餘當登涉勞頓之極憤心病體兩不能堪
嗟嗟五臺知耻自愛某亦嘗奉夙昔之教矣今
將若之何哉左使之轉知出委曲造就敢不祇
承但自以心怯行餒欲伸眉吐氣漸積宿之弊

振頹靡之風如前日徑直安可爲也苟且偷惰
竊祿自全生平賤惡不忍爲也晝夜思惟展轉
至廢眠食以是病久骨立萬不容已再草一疏
馳上更乞走見相公傳達苦難情狀必得優允
放還幸之幸也某先人敝廬僅蔽風雨有田二
頃可繼饘粥一子二孫二三年間向平事畢將
黃冠白袖蕭散方外安往非適意處寧能俛首
鞠躬視眉睫聽指揮以蒼顏白髮老人尚效小
兒曹受村學究約束邪恃愛縱言及此然悽悽

無聊不堪之懷不能盡述也

奚囊蠹餘卷之十九

奚囊蠹餘卷之二十

書

上存翁閣老

某頃以表賀闕下因得瞻謁禁中當宮殿
鼎新之秋正天地泰交之際二十年來積習一
旦改觀五百歲遇昌期斯辰允協某質慙桃李
久玷門墻力本駑駘誤蒙鞭策維時歡欣鼓舞
慶幸既倍於輿衷重以折節垂情沾渥更踰於
分誼憶昔盤桓求退寧知天定無難繼今黽勉

不遑翻懼恩私莫副一麾廿載岐路何長數月
再遷亨衢非遠矢心狗馬謹竭力於衰遲永念
甄陶尚益勤於砥礪時惟報謝將言囁嚅遠役
戒程寸心難已草率代候并上感忱伏願天
助碩德合垣耀而百祉隆長 聖眷同心庶事
康而萬邦寧謐無任瞻仰感戴之至

其二

自晉投秦已歷春夏啣念國恩瞻依台範無時
能忘迺畜縮囁嚅口欲言而不敢上達者將仰

體獎恬抑躁勵士維風至土意寧蹈踈簡之跡而
不忍違肅清之化也今者門下秉鈞軸代絲綸
已朞月矣始焉仁賢正士踴躍以喜繼而儉人
駭愕以懼終之各得其所喜者益堅志飭躬懼
者亦心悔面革今且喜懼兩忘士習定而風俗
回往昔飮聞三不朽之訓門下一身兼之宗社
斯文幸甚然某竊意門下尚有未慊於心者夫
革苗有德而羽檄猶馳安民有政而瘡痍未起
經國費則內外稱匱振軍旅則荆棘滋生誰謂

禁苑容與之嚴旋乾轉坤之運能頃刻而置於
懷乎嘗見居肆之工十人所就一人毀之有餘
十日之所毀未能亟成於一日也為政在人取
人以身門下既誠心端本矣願優游以需成化
急則煩苦而難齊敢以是代芹曝之獻

其三

恭惟 天篤貞良台垣康泰 聖心孚格相道
光明膏澤覃敷均節閭閻征歛廟謨丕振驅除
江海頑冥革士習於既蠱之餘萃民心於思渙

之際勲名不朽治化維新曷任欣忭某踈迭冗
員日惟引領率循錮陋時復懷慚妄意輸溟未
涓莫効豈能助嶽織芥竈持敢附短牋馳候崇
祉

其四

方竣秋防輒蒙改役久甘狗馬寧辭驅逐之勞
素分拙踈不憚勤劬之補誓圖尺寸夙夜未遑
荐辱恩私慙惶莫措伏念官名廷尉職在詳刑
清欲如淵平瀕似石宜得習律令如朱博秉廉

貞若傳賢庶幾執憲可冀無冤平民亦以弼教
委瑣多過忝竊奚堪卑恭不類釋之誰相引重
經術如何定國自量無裨信雷電之章明不遺
益覆致陰幽之槁朽亦麗春陽敢不益淬初心
勉期後効叅法比之末議時宣欽恤之仁感知
遇之非常永砥生平之節謹候得代兼程赴

闕

直躬上悃誠

其五

兩領溫諭尋得部檄仰荷慈愛終不惑於囂詞

大造竟并包乎棄物君天相地等高厚之難
名沃萎沾枯信生成之有自拊心感泣稽首慙
惶念某學術空疎命途蹇薄非適用行每招
尤一罹往歲煩言已甘退伏再遭茲辰警訾敢
望優容方思初服故山恨嘶環之無日何意積
愆累罪感垂鑑而不疑豈以任賢不二之公誤
採寸長片善抑亦人惟求舊之念私憐益壯益
堅犬馬有知猶懷報效迂愚無似敢昧生平三
十年慎飭陋躬寧渝晚節十五任虛糜厚祿忍

負明恩謹自鐫銘莫申祝頌候代未能離任馳
役預主謝忱外諭密事敢不仰承其人世居河
西離省二千里而遠羈縻夷族部落萬餘衆之
多往頗驕揚今已病廢積勢既重非可易圖且
密邇疆胡本其種類苟懷異志勾引非難似不
應泄謀於散漫難合妖邪借力於中國烏合柔
脆也頃據川省公移言亦草略無當重大情節
止聽口攀竊恐泛及衆而貽害遠何以安反側
而保生靈即如某某系出晉之陽曲誤稱漢之
扶風昆弟三人謂爲五子語皆失實事碍施行
鄙言或有可採乞下本兵熟計彼於兩地無不
精詳議定速行寢秘其說不使風聲漏泄致啓
群疑機事稍踈激成他變地方幸甚

其六

前月蒙賜手札不勝感激方訝時事之殊謂非
聖世宜有已而得報乃知無情之人恣詆讒之
口自棄冠裳之外甘心無忌憚之爲洪水猛獸
莫喻其災北虜南夷寧比其烈孰謂聖世有

此我師身繫社稷安危天下治亂方今聖明
眷倚百辟歸心願順群情承一德副先皇之
付託開維新之泰運勿因私惡之言益堅夙昔
之意天下幸甚大抵人生處世君子當其難小
人處其易前此蒞事之人放言冥行治亂勿恤
欲厭志盈侈然無復顧慮奚危懼之有今也中
倫中度兢心惕憲往苦藏身之不密近增意外
之相傾遭時邁會何積愆難諧平治不偶也可
以想見操存之惴惴矣然盛德不孤天祐順信

相道既得斯文在茲普天率土喁喁想見太平
彼蒼寧無意於斯世斯民者耶大疏至三至四
有志之士皆解體功名各思自保此時爬羅搜
剔俊乂者英雲蒸騰舉以赴交泰之會吾師亦
何忍遽棄斯世斯民灰志士之心靳不朽之業
耶幸垂意焉歲運稍早方以得效分毫何意霖
潦驟溢至漂沒百餘艘糧數萬石軍亦多溺於
水前此未有適與妄言會皆非常之災也雖知
貯積不可減額獨念疲乏追賠良苦安得天

恩俯察特賜蠲豁在部中恐不敢輕議爾

寄冢宰嚴公

某仕爲冗賤久乏功能歲易嗟咤徒慙廩祿頃
奉雍秦之役已及衰遲夙懷兢惕之心忍踈砥
礪獨緣迂愚無術益以質直不阿坐是取憎因
之多口信若人言指謫卽竄逐有餘幸仰賴衡
鑑公明在隱微猶見察蠲彼私惡慈母釋投抒
之疑洞悉物情容光照覆益之下破尋常之議
示殊異之恩使旣涸之鱗沾清波之沃已摧之

朽回大德之生非木非魚能忘再造高天厚地
僅比弘庥莫宣感激之悰願祝宗勳繁祉緬思
報稱之日祇先鏤骨銘心顧當鬱蒸之餘遂抱
虛羸之疾疲馬非無高軒之戀局趣不前倦鳥
欲安故林之棲羽翮難振謹馳短疏敢乞歸田
詞本由衷情非得已仰祈垂鑒終望曲成

其二

頃方具啓申謝卽有論劾之報積行不孚動干
物議取譏乘負貽辱龍門罪死罪死然某之鄙

陋粗率非有加於前而感激振奮不敢懈於後也服役未幾防秋無警竊爲地方慶幸何意新進喜事反謂無事爲怯徒以一人之毀爲據不顧生平之脩積堪憐苛禮責人黨同求勝夫復何言三尺之童猶知有耻某誠不肖亦嘗克勵於君子之塗承誨於大賢之側矣寧能緬顏忍辱詆排至再尚不墜青雲之志邪濟濟在朝非夔龍稷契鄙陋如某豈有涓埃可以塵汚海岳敢塵大造垂神無已肝膈情私惟乞優賜歸田退保桑榆於兩湖三畝之間幸甚幸甚圖報未盡之忱山中無事不敢忘芹曝之獻也

寄余午渠憲伯

奉違良久南北渺然不能通問緬憶閩中旦夕晤語歡然忘形雖同寅結誼維均而吾兩人尤相厚善以其攝武平出入之踪跡政務之關白風晨雨夜之追逐兵戈擾攘之憂勞時靡不同門下精明練達博雅弘曁鄙人十不及一迺涵容誨迪使得苟延二載終掩其瑕以及于今皆

至德盛惠何敢諼也頃古原來按關中傾蓋如
故當嘗議洶洶之時既體察其心任棘院使令
之役又憐卹其病槩借維植真若惜涸鱗而亟
欲沃之清波此豈借視於耳信風鼓柁若近世
拘攣之見耶詢所由來皆出謬譽得閒常品藻
之言深信不惑念鄙人何有片善寸長上塵知
愛如此古原之還正防秋遠戍不及把臂青門
遣役代送因附此代候緬想閉戶著書樓直游
藝道遙物外眇逐逐塵埃之人猶不暇瞋白眼

及之矧復牽情於毀譽得失之既往者哉望示
近作以開茅塞

寄郭一泉督府

恭諗秋防事竣節鉞榮旋范老甲兵素制三軍
之命令公膽畧久宣單騎之威是以數萬黠胡
竟遏南侵之犬豕然且重圍主將克全東伐之
熊羆夾擊僅及於柳門祇清漢界窮追不踰乎
明水何異周師彼鎮靖一矢之亡本期射雉在
鄜延千里之獲幸已無禽喜動旌旄歡騰士馬

某夙塵末屬近被餘輝禮宜躬迓遠郊奉揚茂
績適奉傳來成命輒敢遄行敬循自昔之規聊
將不腆之禮專官代獻用表賀忱尚冀照存併
原不備

寄楊朋石中丞

某自束髮誦習孔孟思欲飭行修詞進思徇馬
之功退不失枕嗽之潔視富貴利達藐如也一
入世網浮沉三十年生平意氣銷爍殆盡取嘲
笑於山靈呼馬牛於兒稚譬之馴鶴甘稻梁豢

鹿飫芻梗循除伏柵人見其可侮可賤而不諒
非其所樂悲夫何意高賢獨鑒其隱時時感念
竊聞上書 新皇宜有微言大略足以格心意
善政治昔人所謂剛毅正直守之以寬忠恕仁
厚發之以義要在有所感格非夫倜儻矯異非
常驚詫之論逞辨智以塞言責而已 天閣乍

啓 王心中融未有定向不當汨以紛紜揉雜

之言是非攻擊之口使玩易淆惑成不繹不改
之習門下歷覽諸凡書疏能無意乎靜思及此

便欲鼓吻嚙毫一效區區而漕務敝壞至極殫
精竭力尚無分毫之益寧能伸其意志爲芹曝
之獻附有道之未耶慙悚羨服併切於衷適便
附上興居中夏漸炎惟爲道珍重

其二

西鄙枉辱教札謂有棘寺之擬已而果然代者
數易經年始得釋負再依龍鳳之光叨廁臯夔
之後知皆門下誤憐樸樾雅意栽培感愧感愧
未幾出鎮再領重計寢食不遑未緣布悃預塵

愛念瑤函遠使開示肝膈言本蘭如誼同金斷
鄙陋何敢當然不敢不勉五臺銳意品藻過於
自信所論偏拘誠不盡無然瑕不掩瑜瑩然之
本體自在謝請托絕朋昵不畏貴近不避讒嫉
卓然以世道人才爲己任此其心真切果確可
以質神明貫金石大略舉措當人心快公論嘗
多一二詫異乃其篤信本心或誤中人言又未
有逆耳力攻其偏者以是直行不疑因之斂怨
速謗不得免爾悲夫知人聖哲所難何獨求全

於彼哉略迹而諒其心欲何爲也假令善自爲
計循繩守墨不激不忤奚不相容而必伸其意
志如彼可謂工於謀國拙於自謀已往聞殺南
之日值歸德盜起輒爲檄走家僮入賊中諭令
悔禍時賊亂已成家僮竟以遇害平生任事諸
如此類今其歸吳初服故園盡捐物累有超然
物外之意用捨毀譽應無介於其懷亦惟知厚
信之不足爲他人道也

寄郭東野閣老

伏聞年伯捐棄祿養厭世仙遊門下百解
式遵典禮某叨辱驥尾誼均猶子曷勝驚遂
役西鄙不能匍匐奔吊積懷未安繼思封崇
階壽臻耄耋備人間難得之福沐清朝寵異之
恩在老伯固已忻慰重泉命世人賢功垂宇宙
生有鍾鼎之養歿貽竹帛之名在門下復何歛
於純孝也尚冀爲道爲國以禮制情上副
聖皇眷倚之隆下答士民屬望之切

其二

往歲拜謁 禁苑語及被論謂幾欲爲某泣下
某何人也敢當斯誼祗啣結於衷頃見邸報二
三元老皆有煩言事出意外豈此 聖明之朝
人情論議猶紛紛不可齊耶仰而思俯而嘆真
令短氣悽心已聞溫綸留慰辭至再而 聖眷
益隆則知上天有意啓迪 聖心猶將乘交泰
之運垂平治之休也踈逖無已之心惟願五嶽
同其高大一德孚於 聖神勿櫻箴頌之恩某
翊唐虞之化 朝野瞻望均切非直厚昵之私

也

寄黃司寇葵峯公

某委瑣蹇拙才本不堪致用行復不能隨時蹉
跎冗賤垂三十年中遭宿釁之人橫罹不根之
辱左官入蜀深切慙惶自惟投杼之疑雖慈母
不能釋然於賢子矧分隔於尊卑跡睽於踈逖
者耶服役臺下曾未幾何詎意薦揚之章謬以
充數因之增價遂獲遞遷寔由臺下昭明博大
越拘攣之見秉衡鑑之公誤信而不疑也閩中

期月出荆入棘曾不遑寧武瞻槐府未效寸敬
已又歷晉投秦徇馬之力猶屢勉在途鸚鵡之
翎已厭倦思息終知上負知人之哲矣茲聞榮
躋八座寵並三台振起肅清之風贊翊維新之
化 天眷彌隆台祉駢茂矯首廊廟企仰何窮

寄孫侍御

僕忝辱龍門托知厚於大賢十年矣非特感汲
引之仁受規誨之益若尋常監察藩臬意氣相
投而已寔仰企砥節礪行弘道績文有兼濟之
才而藏之以靜具大受之量而執之以貞蓋中
心悅而誠服竊冀不日躋華陟要將爲世道斯
文慶幸何期道大莫容求全致毀聞報之日真
令驚駭狂叫旣憤懣而難平卒嘔嘆而短氣也
頃奉教札始知繫端在彼蒙議有由何言何言
然毀譽無與於身心出處素定於命數達人遠
覽當付之大嘯枕泉漱石攬經綸之具舒吟弄
之襟宣諸詞翰載諸方策所謂不朽之業以彼
易此明公以爲孰軒輕邪僕與鑑川亦嘗被口

語每相對輒取以嘲笑吾兩人者固自相信
明公能無信此兩人者邪屈於不知已信於知
已古之聖賢豪傑亦僅以自解爾豈以高朗如
門下有不釋然大噉者哉俗吏多冗不盡欲陳
伏惟鑒諒

寄黎樂溪叅伯

都門一別忽焉五祀受桀深情永懷弗諉劣弟
直慙無術拙於處世進咫退尺盤桓藩臬十餘
年六省所經岐路崎嶇不知元幾萬里塵緣難

割薄命宜勞每一念至未嘗不懊恨歎息終自
哂而莫知所裁吾文高朗明哲當位望之方隆
輒抗䟽以遠引何啻鵬搏鳳舉回視鳧群鴈隊
就樊籠甘豢養直霄壤矣此中心愛慕媿服非
敢爲佞也遠隔不知行踪向稽申悃慕承翰貺
依戀彌增惜不能縮地攜手傾倒積累之衷矯
首節鉞川雲時時在望願爲世道斯文順綏多
福

寄李麓南侍御

某材本委瑣行之䟽通冗賤盤桓蹉跎遲暮曩
昔閩藩之役卽已厭苦自棄何幸獲遇明臺曠
度海涵靈心燭照懸不塵之冰鹽持有定之瑤
衡表正旌賢繩回瘴惡一時舉措誠快清議而
愜人心矣鄙陋如某何意亦辱龍門是猶愛玉
不必無瑕砒砒亦蒙善價掄材不遺旣朽撲檄
誤登明堂身非木石豈敢遺忘每拊心注念未
嘗不感伯樂之顧惜槽櫪之拘激切思奮而猶
惶悚未能也昨聞再起蘭臺輒賦詩以賀則

使車預發僅隔旬日悠悠積累之忱竟未及通
左右自是力疾入覲卒卒東歸未幾復撫舊地
時屆秋防躬軀遠戍田思旣晚餘榮寔本當年
汲引懷德揣分益切惓惓遙想節鉞星臨所至
春溫雷厲草樹回錦江之色輝光開玉壘之雲
彼中士民曷勝欣幸某叨忝知厚百倍恒情顧
久遠師資日益錮蔽責任稍重愈見綿薄尚丐
訓言俾得持循黽勉少副心期卽造就彌厚矣

寄楊盧坡冢宰

恭聞令嗣首擢武科喜溢縉紳光增 廊廟文
雄武傑萃集一門此宇宙清淑所鍾 聖世禎
祥希覩可以驗碩德之格於天而積慶之昌於
後矣遠羈嶺表不及樞趨門下又不敢以尋常
禮幣溷瀆惟有欣躍企羨之心嘯喘難已爾某
虛縻厚祿秩滿無績可考又以多病廢事討賊
未即成功皆亟宜斥去仰仗優容題覆兩荷
恩綸曷勝感激又手札責以大義益增跼蹐然
豈敢推事避難忍忘報稱實抱犬馬之疾恐負

重大之寄死無益於事也頃已前勉東來造舟
募士雖稍稍集終倚俞將率師南下庶勢順力
全數日閩省兵船已入潮夾擊幸而功成則已
萬一賊復西遁即省會雷瓊皆為危急造舟既
不可坐費月日舟師不集則將領怯於航海非
得暫借彼中見在之船何以爲目前追逐之濟
計無所出乃敢疏聞先已一面移文彼中知會
議者每謂但練土兵自可足用此所謂三年之
艾在今固當預畜若借力未援以消醞釀之毒

則蕩滌黃硝之劑又急攻之不容已者也統惟
鑒察

上內閣諸公

歲稟交承即已且啓馳謝入境諮諏時事山猺
海寇縱橫四出獸聚鳥散叛服無常蓋自昔仁
化之所不覃威武之所不籠由來非一朝夕而
於今爲甚則以兵力日薄兵食相湏而頻年財
用匱乏計歲入之數不足以供額設之需卽有
調遣又將何以爲計今海寇之黠莫曾一本若

頃徵三參將之兵備四萬之費主帥不親統領
衆將各一其心失律喪師損威虛費欲再整已
無備矣不得已調取西鎮俞大猷前來暫攝東
事頗聞將士歸心賊亦素憚日下理舟航括糧
餉申嚴號令查覈行伍至日將併力滅賊不敢
不殫竭心力仰答明命但茫洋巨海追逐良難
成功與否不敢逆覩也某未諳軍旅况值衰年
竊恐懷恩圖報之心不勝罷憊委靡之氣貽譏
負乘慙負任使此某所爲薰心刺骨廢寢忘食

遑遑莫知所措者也尚望廟謨指授使知遵承
幸甚

其二

某入境暫止肇慶專意東方二旬後乃抵蒼梧
祇承 明命恨不朝滅賊而夕就食顧事有難
於猝效未敢刻期也兩廣軍務大略藉兵於西
資糧於東東素無兵西兵又不習水戰故前此
驅而出海者皆懦弱不教之人三叅將各自爲
謀原無紀律總兵官遠在潮惠漫不綱維曾酋

醜類本吳平之黨桀驁有年出沒波濤艦舸之
間尤極便捷以此素怯之氣加以不齊之心當
彼慣嘗之雄共出必死之命其爲勝負不待智
者而知兩被折挫悔何及已今俞大猷已至計
欲萬全前轍是戒但須假之月日將爲不可勝
以待之日下整搦舟師度賊又將東鶩隨所向
往嚴督併力視後舉爾某臨事無策極知非才
惟有朴忠天日共鑒伏惟憐察

其三

待罪南粵憂危移日習見時艱詢訪故事信嶺
表自爲一天風聲氣習曼異他處人嘗謂兩廣
盜如落葉隨掃隨落蹊徑無光潔之日真切喻
也良由滄海渺茫林菁深遠易以伏匿難於驅
除人本恣悍株引勾連一呼四集又聚散倏忽
暮而剽掠不知其爲民朝而耕犁莫辨其爲盜
何忌憚而不爲然自明興以來假借名稱雄肆
山海者幾十百人矣卒罹鋒鏑正典刑小者捕
滅大者征誅率無苟延五七年者而卒不戒則

其性其習信殊異不可解也方今東省山獍水
寇縱橫雜遝雖殺戮無虛日而亦不知畏其尤
黠悍者曾一本頃緣主將不統兵偏裨持異見
我軍氣懾虜得長技失律喪師本自輕敵寡謀
非必賊有勝筭也此時聞已東驚潮陽本賊故
穴俟其定泊然後可圖俞大猷力任其事將士
舟航稍稍整搦一鼓成擒尚籌畫於萬全之後
度此釜魚鼓鬣終當就烹不足櫻 廟堂之慮
但西省亦苦山賊俞將之東也議者謂爲耘人

之田意不甚愜不知大征之費非二十萬不可
近歲軍門糧餉不足供額設之兵二省貯積皆
匱無已將請發內帑審時度勢尚落落難合
斟酌緩急豈敢顧彼遺此蓋撫按各有所重總
督兩地關心意見不能盡投也至如嶺南有始
興二源遺孽嶺西有羅旁淥水負固府江有兩
岸峒寨出劫海上有林道乾輩數夥妄意好生
惡死人所同心此輩誠愚豈無一隙之明亦由
互相疑畏招者每誘而殺之縱欲悔罪向化不

可得今將責成合屬覓取間諜之人往示朝

廷威德又值新皇赦宥萬方無論盜賊猥獍

悉聽撫處爲兵爲民各適其願深山窮谷自安
耕鑿者苟無犯於地方悉不加征遠近並許自
新開誠布公深懲既往貪功殺降故習稍稍有
見信來降者縱不盡然姑以養威蓄銳俟恩信
旣行察擇強梗間一出擊卽力併事專庶可示
警是或一道也頃聞譚一華有薦進俞大猷其
事之疏此時方區畫勦賊將士帖然心服賊黨

畏龍臺未降一月以來鼓舞招來漸可幾望成效
蓋其人久習水戰老猶矍鑠若即取去則有臨
敵易將之忌地方益無所恃縱使郭成倅至安
能遽諳地利得人和如此賊益蔓延不可收拾
矣展轉思惟萬不得已具疏但乞暫留終此曾
寇之役必不久淹以妨京營大計也伏乞垂察
百凡更望指示迷惑俾得持循某勉策駑鈍終
非素諳未效涓埃忽忽頓衰多病伏惟憐察歎
惻延佇台垣不任瞻仰

刻奚囊蠹餘序

古之為詩人人而能言之初無顯名
之家下至閨巷田野之賤其所歌者
往往感發聽聞而關乎政教故季札
能言列國之風亦以所言出乎性情
攷驗者有所因而辨其俗此道變於
漢以下其間騷墨之徒擅材爭驅體

法顓門以詩賦名家者接武而起其
病在挾竒挾氣傲世調俗嘲侮造化
題品萬類使後來之儁希附流風引
脰掉吻睥睨叱咤甚至準體肖字抵
掌優孟履亨順而有餘悲富盛年而
傷搖落槩於詩家之道未得其似尤
得其病然此惟材高者有之而近習

尤甚故昔人評詩上下千年間獨無
憾於晉之陶潛非謂其言出性情而
有古詩之遺耶今讀

大司馬元洲張公之集必知其為有
德者之言矣蓋公夙稟異質書無所
不窺奮迹東南裒然為人士之冠冕
釋褐以還逾三十載足跡所窮幾遍

天下所至輒以道德文章為陶士宜
民之具其雅操大節不能與世浮沉
宜其德性之醇深而言之可觀如此
今集中所載群體派分而殊貫嘉言
颯發而霞舉短章大篇成聲合節自
漢後諸家所以名世者無不會其精
駁以鎔裁於無迹若廼雕擬不施性

靈洞見方諸元亮天趣雖同而制作
之該備邁會之昌隆勛名之駿烈又
元亮所不能兼者昔王維柳宗元卓
然為天寶貞元之鴻筆聽其言非不
瀟遠有致惟名檢凌遲而言有餘辱
如公之因物寓言因言明志不惟不
蹈材高者之病即古今能言之士何

以加之竊謂公詩不當與櫛字釘句
刻鵠效顰者共論直當追三百篇而
嗣其響使千古之下知言者起想見
公之德業必於斯集乎攷驗矣公今
開府二廣總文武之憲綏馭既暇出
次往作荏大叅應禎偕夏僉憲道南
謀佳胤請梓而傳之歆與功烈並衣

顧佳胤識陋無以窺測閔深居嘗獲
公隻語寸墨藏之甚珍不意今日縱
觀武庫之富而更得托一言於簡末
佳胤之生豈徒也哉

廣西布政使司左叅議銅梁張佳胤
頓首謹序

